


Дагъусттаннал агабият

16+

ISSN 0235-0165

ЦӀубарз

ЛИТЕРАТУРАЛУЛ ВА ПОЛИТИКАЛУЛ ЖУРНАЛ



КӀуркӀуллая Щаза

6/2018

ноябрь - декабрь

Сурам Д. Аклиева



ЦІубарз

КІива зуруй цал буккайсса
литературийну-художествийсса
ва жяматийну-политикийсса
журнал

6/2018

Двухмесячный
литературно-художественный
и общественно-политический
журнал

Учредитель:
Министерство печати
и информации РД

КАЯЛУВЧИ - ХЪУНАМА РЕДАКТОР
Мурад АхІмадов

Итабакълакьиссар
1952 шиная шинмай

Аь. Исмяилов - хъунама
редакторнал хъириувчу

Журнал основан в 1952 году
Расулом Гамзатовым

РЕДКОЛЛЕГИЯ:

6/2018
ноябрь - декабрь

С. АхІмадов
Э. Аьбдуллаев
Р. Башаев
М. Давьдов
Х. Илиясов (редактор)
К. Мазаев
Сс. Увайсов
С. ХІажиева
И. МахІаммадов
С. Къасумов

Государственное
бюджетное учреждение
Республики Дагестан
“Редакция республиканских лите-
ратурных журналов “Соколенок”
и “Литературный Дагестан”

Электронный адрес редакции:
litdag@mail.ru

ПОЭЗИЯ

Ккурккуллал Щаза. Шанмарду.....	3
М.-З.Аминов. Ккурккуллал Щазаха.....	4
А.ХИажиев. Рубайрду.....	5
К.Мазаев. Буттарссу Залиххал ва куяв Хъисул аьпалун.....	14
М.Давыдов. Хъинбала.....	15

ПРОЗА

Х.Илиясов. Суй кIулу.....	18
---------------------------	----

ИХТИЛАТРУ

Карашатусса ишбажаранчи Аьлиев Аьбдуссамад АьлихИажиевичлуцалсса ихтилат.....	34
---	----

ДРАМАТУРГИЯ

М.Давыдов. Ккурккуллал Щаза.....	37
С.Къасумов. Оьттугу, макьгу.....	63

КРИТИКА ВА БИЛИОГРАФИЯ

А.ХИажиев. АьбдурахIман Оьмаршаев.....	81
--	----

Регистрационный номер ПИ ТУ № 05 - 00360 от 12.12. 2016 г.
Выданный управлением Роскомнадзора по Республике Дагестан.

Новолуние №6

ноябрь - декабрь
На лакском языке


Выход в свет 4.12. 2018 г.
Тираж 290 экз
Печать офсетная. Бумага офсетная
Формат 70х108 1/16
Усл.печ. л. 8,4. Усл. изд. л. 8,7
Заказ №301
Цена свободная.

Типография: ООО «Издательство «Феникс - пресс»
Адрес типографии: 367018, РД, г. Махачкала, пр-т Петра I, 61

Редакция и издатель: Государственное бюджетное учреждение Республики Дагестан
“Редакция республиканских литературных журналов
“Соколенок” и “Литературный Дагестан”.
Адрес редакции и издателя: 367000, РД, г. Махачкала, ул. Даниялова, д. 55.

Поэзия

Ккурккуллал ЩАЗА



ШАММАРДУ

*Бюхттул барзунттайсса
ЩютІ учай ссулий,
Вила ахІмакъшиврул
РатІайн багъунна.*

* * *

*Щюлисса ардарав
ТуркІутІи къахънуй,
Балайрду сававну
КъатІул бувгъунна.*

* * *

*Ва дуняллул пикри
ДакІнийнгау къабагъай,
ДакІнин ххирасса ина
ДакІния къауккара.*

* * *

*Багъдад буттал шярава
Вайлул хъуну лавгукун,
Зунттайцири щаращив
МикІ лавчІуну, къавкъуна.*

* * *

*Мизитраву луттирдайн
ГъалатІ багъайсса кунма,
Ттул тахсир бакъа чурххан
Шярал махъру ххи хъунни.*

* * *

*ДурцІуну дур ва ттул дакІ,
Ккуллардал мажарнияр.
Мажар битай, бачІва шай,
ДакІнин дарман къалякъай.*

* * *

*Хъамаличу учІайва,
ЧчатІ букайва, лагайва,
ДикІуву дакІ дукасса
Ина акъа къавхъунна.*

* * *

*Арих нани оъру чуй,
Аъв къюллу мабуккара,
Сальян¹ зунттуйх нанийни,
Буки кисаран чІапІи.*

* * *

*Зунтту зунчала буккай,
Ар микІирала дуккай,
Дуккан дуллай, къадукай
Вил хханххирава ттул дакІ.*

* * *

*Бюхттул зунттай ав хъурдай,
Вил ттупангирал бутан.
Зунчалу тІутІи хъурдай,
Вил оъру чал хъап учин.*

¹ Сальян зунтту – Азирбижаннавусса зунттун цІа.

* * *

*Алхъа бури ратIаву
Бурандалул лиявай,
Нания къалияра,
Дуниял лиярчагу.*

* * *

*Укунма личIанавав,
Уква ратIух гъанавав,
ЩинчIаввагу къакIулну,
БивкIуну лякъинавав?*



**МахIаммад-Загъид
АМИНОВ**

ККУРККУЛЛАЛ ШАЗАХА

*Душру-хъаннил цIа дуккай
ЦIай бур тIий, даву дай тIий,
Агъ, ттулгу цIа дурккунни
Шярал шаммарду бай тIий.*

*Ччергъилугу дав-дав тIий,
Ттул дардругу давраннай,
Нава тIурча цакънива
ЛухIи гъаттаву шанай!*

Алексей ХИЖИЕВ



Р У Б А И

1

* * *

(ХъхъичИмукъун кІанай)

*Куннал ттуйн «шаэр» тІар, «Лакрал Хайям» тІар,
Амма вайннал тІимур гъич къатІайлассар,
Вай ххару ккалайсса, буккуй, виннияр
Лавайну шеърирдал хІал ттун къакІулссар.*

2

* * *

*Ярунних ишан данна,
Лишаннай бувчІин банна,
Хъярчирдай хъяврин бувну,
Хъуву мина дан банна.*

3

* * *

*ДикІайрвав тІий ччаву цал ккавккун шайсса,
Найнма бур бяст-ччаллу къуртал къашайсса.
Цал ккавккунни шайсса мйяжансса ччаву –
Так къюкІлил янинни ккаккан аьркинсса.*

4

* * *

*Дунгяллий инсаннал оьрму ссигъа бур –
БувчІлай бувчІин къашай, къакІулмур чІявур,
Оьрмулуксса гъира къалещанишвирул,
Чивчумур инсаннан кІул къабувну бур.*

5

* * *

– Вин ккаквив? – Къаккаккунни.

– Баврив вин? – Къабавунни.

Рахлатну оърму бутлан,

Дус, утти вин лавхъхъунни.

6

* * *

Ва оърмулуву ттун чIявусса ккаккссар

Нех наймур чулийнмай найсса арантал.

Инсан кIункIу шайссар лахънийн, бюхттулнийн,

Нехмур – лахънияту лагънийннай найссар.

7

* * *

Дунъяллийн бучIару бачIва-кIачIану,

Дунъяллия гъару бачIва-кIачIану,

Амма чIявуссаннан ва зад къабувчIай,

Нажагъ бувчIунангу бувчIай чIал-чIалну.

8

* * *

Вида хъхъичI тIиртIукун неъматрал ххунча,

Адаврай къацI уча, бусраврай ххув ча,

Ссавнил улттуй Заннал чивчумунивун

Я ххи бан, я чан бан къабюхъайссарча.

9

* * *

Хъурдай цал уттигу вихъ зума ахъан,

Ина ва на хъурдай барзунттайн лахъан,

Мурчал щютIуххухун дакIру балай тIий,

ХъхъичIва кунма жува марцай бялахъан.

10

* * *

Яруннал хъхъириву, оьвкъун, акъа хъун,

Хъазамрал ардарав, лявкIун, акъа хъун,

Ччива цал микI лавчIун, яла авссун махъ

Вил мякъ хъусса мурччай, къавкъун, акъа хъун.

11

* * *

*Жагъ шикку, жагъ тикку дъявилул лама,
Исламрал ххуллийгу даркку дулама,
Дуниялмур гъанай – цилла къяйдалий –
Цилла лагма цурда, бургъилгу лагма.*

12

* * *

*Вана на уттигу кIюрххил чантI увкун,
Вайнна лелуххантгу балай тIун бувккун,
Къудратрал Залуннайн – Аллагънайн цукру,
Вана ттул ужагърайн ттигу инт дуркIун.*

13

* * *

*Уттигу урганна ссавнил някIшиврух,
Ссавнийн цусса зунттай зунчал марцIшиврух,
БачIва ччаннах бивтсса жегъир ххуллурдай
Лугланна вайларгсса цюлли оърчIшиврух.*

14

* * *

*Сивсуну ласира оърмулувун ша,
Зунма чивчумурди бучIантIиссача,
Ва оърмулул ххуллий, ччаву хъумийннан
Алжан хIасул буван гъассар тIар ца чIа.*

15

* * *

*ХъункIултIултIул чIапIал кIукIлушивугу,
Къанкъ нахIушивугу, ранг ххуйшивугу,
Вил тIабиатраву дирхъусса Заннал
Бивхъуну бур архIал къутIай хъицIивугу.*

16

* * *

*МакIрагу, чIихърагу ялугълай ивкIра,
Урттуву, тIутIаву вих дуглай ивкIра,
Зумавагу бавхъсса ина бакъанма,
Асарду на вил хъхъичI аьч буллай ивкIра.*

17

* * *

*Мудан кунма гъанссар хIакъинугу баргъ,
Аьдатрай букканссар гъархъхъунугу барз,
КIава баргъ, кIава барз ссавний личIанссар,
ХIайп, ттун къаккакланссар вил иттав баргъ-барз.*

18

* * *

*Утти бусраврай бакъар я гъунар, я чувшиву,
Ас-намус буруччаяр дуллай бур лавмартшиву,
Ва дуниял гъанайссар – на вихра, дучIантIиссар
Бюхттулнийн гъаз дурсса чIун цявн дагъсса Инсанишиву!*

19

* * *

*Хъунил къарал – къурайзу,
Инил къарал – гъарайзу,
Жува цачIун къабиян
Вил къарал – кIяла ларзу.*

20

* * *

*Жувалу жсапрай бивкIру Оьмар Хайямгу, нагу,
Цаннан ца бувчIлай бивкIру, лях аьсрурду ларгнугу,
Гайра диркIун дур дардру, буруккинтту, къайгъурду
НукIу Нишатурдайгу, хIакъину жул Ккулувгу.*

21

* * *

*ХIукму бачин байми хIукумат дацлай,
Аьдлу-диван байми гайннацал канай,
БуриIурдил ва ккаччал душиву хъуну
Жулва яттил ттурзан бур бухлагавай.*

22

* * *

*ОьрчIний на цIанная нигъа усайвав,
ХъхъичIава хъхъуния ттун ццах бикIайва,
Ччаврил дакIгу, чурхгу сасан байхъунссар –
Тти ттул дакIнил хIал бур хъхъуних мякъ шайсса.*

23

* * *

*Дунияллул мяъна ттун вийну дурчГай,
КъакГулмур кГул буллан ттун вищал бур ччай,
Элмулул луттирдай къалявкъумургу
Заннал аятруну лякъай вил мурччай.*

24

* * *

*Ттуцал тарс дарккун дур щалла аьрици-сса,
Ссавруннал къацГуххай ци чча , ци къачча ,
ХГалалмур Аллагьнал чан-чанну дулай,
ХГараммур ЩяйтГаннул къадулай тачГав.*

25

* * *

*Дунияллий оьрму лахъисса бакъар,
Тяхъасса чГуннугу чГярусса дакъар,
Инсангу бизарну, ссахрив ялугълай,
Аллагьнал дулуннин щяивкГисса акъар.*

26

* * *

*Ччаврил кГункГу дайссар макънатГисрайн мах,
Ччаврилли чин дайсса чарива цГу парх,
ДакГурдиву ччаврил цГу духъурчанни
Гъилину яшайсса ужагърай вилах.*

27

* * *

*Жагъ чГирай мяр бищун, жагъ чул бан тахлий,
Жагъгу занан, щарсса дирхъуну хъатлий,
Ужагърай арантал аьркинссар хъаннин -
Куннин оьрмулухун, куннин ца гъантлий.*

28

* * *

*ХъхъирицГ яхъанай ивкГиссар цалла Къарищал Къужа,
Зуккух кушулий Къари, балугъру бугълай Къужа ...
Гихунмай къабусланна, магъа зунмагу кГулссар,
Къарил увк-увкмур байсса ахГмакъ цувари Къужа.*

29

* * *

*Инсаннан дунгъяллийн уккан къисмат шай,
Гъантри най, шинну най инсан хъунав шай,
Дус, хъунав шаврия аьсив машара –
Хъунав хъунсса къисмат гъарцаннан къашай.*

30

* * *

*Баснячинал Моська дацуй бивхъссар тIар,
Ай, ганил Пиллануйн хIап куссар чай тIар,
Вар, гъан хъунайн хIап чин буржрихха ккаччил –
Пиллануцал данди га къабувккуссар!*

31

* * *

*КIюрххил, чантI учайхту, карамат ккаккай,
Эмаратсса сурат янил хъхъичI дацIай,
ХъуручIул цIай бусса кIизул хахливу
Заннал ттун чирчусса вил симан ххал шай.*

32

* * *

*Ссавруннаяр дуркIсса жунна марцIсса щин,
Шюша ина миннуй кару ва лажин,
Пикри-аьмал марцIсса, лажин-ка марцIсса –
Аллагънан ххиранал укунессар лащин.*

33

* * *

*Аллагънахсса ччаву, оьрмулух ччаву,
Нитти-буттах ччаву, ххиранах ччаву –
Аьрцарайва ччаврил ччучлай къаивкIма
ЦIарал ччучлантIиссар дужжагъираву.*

34

* * *

*Аьрцарай оьрму найссар чани хъанай, цIан хъанай,
Инсантал вардишну бур шад хъанай, пашман хъанай,
Баргъ ттуруллул бувгънийгу нарив ура ххарину –
Баргъгу бур, ттурлугу дур, нагу ура яхъанай.*

35

* * *

*ЧIаравсса мурхъирай сунурду чIалай,
Дияннин ялугълай, гъантригу ккалай,
Хъурдай тIий икIара чийяту къюлтIну
Мурхъирал ххютулу цяикIан, канай.*

36

* * *

*Гъар затралла дуссар дайдихъу, ахир,
Аллагъри дакъама аввал ва ахир,
Вин дардру дуллайсса буруккинтралгу
Дуссия дайдихъу, хъунтIиссар ахир.*

37

* * *

*ХъхъичIра кунна ардай тIутIив хъятIий дур,
Зунттай журужсайнтту балайрду тIий дур,
ХIисав хъанай дакъар утти вин цичIав –
Утти вил бакI баиттан кIяла шавай бур.*

38

* * *

*Душманнал душиврийн ина вих машав,
Дуснал душманишуву багъишла мадав,
Лавмартсса дусталгу арх буцан бувну,
Вихшаласса дустал ябува чIарав.*

39

* * *

*Ттул мачча-ляхъин чIявур – дакIнил вичIан уцара,
Жулла ларзулу ххют дур – вил ххютулун учIара,
ХъункIултIултIул багъраву чIярур къанкъ ххуйсса тIутIив,
ТIутIаву ятIул тIутIий, вил къункъал къауччара.*

40

* * *

*Ачара: – «Чунна?», – чара, оьккину буругара,
УчIара: – «Чувъяв?», – чара, оьккину буругара,
Я лавгун, ягу увкIун, ци бази дуварчагу,
Ина ябакI бутара, оьккину буругара.*

41

* * *

*Вил ххуйшиверуцал ччалай ххуй хъункIултIултIи дур тIар,
ТIулIаву паччахIри тIий, гания буслай бавссар,
Ялу-ялун ххуй хъанай ина заназу, ххирай –
ХъункIултIултIул ххуйшиву так ца-кIива гъантлийссар.*

42

* * *

*Аьрцарай баргъра тIий ина унугу,
КIа ссавниймур бургъих ина уругу,
Гъан дувай аьрцарайн нурданил тIинтту
Бургъил, цилва къимат цинма кIулнугу.*

43

* * *

*УрчIва барз лякълуву, ца шингу карав,
Яламур оьрмугу, бавай, вил чIарав,
Абад дуняллийн инара найни,
На цичIа къаитав, цийн аманат ав?*

44

* * *

*Зунттал цархъавугу чагъирай гъи дур,
Щарнил кIичIирттугу урттун ххявххун бур,
Къатлул хъулий ххярхсса тIултIив чIалайни
Чагъирай гъи дуна, дакIний дяркъу дур.*

45

* * *

*Хъамитайна дуван Адамлуя лине
Ласавриву Аллагъ къааькъьуссар хъис –
Ня дусса ттурчIая га дурссания,
КъабикIантIиссия инсантурал жинс.*

46

* * *

*Циняв дуняллийн тархъанну буккай,
ЧIун ларгун, оьрчIая аранталгу шай,
Яла дуцай щарду, бачай ширугу – (
Куннал никъуртталу, куннал хъаттирдай.*

47

* * *

*ДурчIлан къадикIайва Эйнштейннул элму,
Утти, къюлтIну бивкIмур аьч хъунни ттунгу:*

*Ххуйсса хъамитайпа чIарав бухъурчан
Анаварну дачай чIунгу, арцугу.*

48
* * *

*Гъарзатраву къарал дуручлай хъинссар,
Ччаву хурда дуллай занай къаххуйссар,
Ккавк-ккавкмур юбкалул хъирив занайма
Цува хIажак дакъа личIан бюхъайссар.*

49
* * *

*ХъхъичI ца коньякрал рюмка,
Хъирив чяйлул тшала,
Агъ, ца ххирарча вищал
Вай шанмагу нахIала.*

50
* * *

*Сиясий ишккаккулт- хъами чанни тIар,
Политикалия вай архну бур тIар,
Хъхъурай хъинну дайссар хъаннил давуртту –
Дяхтта иширттаву вай къачIалайссар.*

51
* * *

*Вихъ мукIру шайссияв ина ччишиврий,
Ттун яруннин, дакIнин ххуй бизлайшиврий,
Утти мукIру шара ттухъа навагу,
Навагу вил чIарав ххуй хъанайшиврий.*

52
* * *

*ХIисаврттал дарсирай, ттигу бур дакIний,
Цаннийн ца бивчуну, кIива шайссар тIий,
Алагънал карамат, элмулул гъалатI –
Оърмулул дарсирал ишу бур цайми.*

53
* * *

(Махъмукъун кIанай)

*Чивчумур букваву сийлуву дакъар,
Инсантал шеърирдах аьшикъну бакъар,
Вай ххаругу цилчIав, та бухъурчагу,
Буккинхъуви тIисса умуд ттул бакъар.*



Мазяйхъал КАЗБЕК

БУТТАРССУ ЗАЛИХХАЛ ВА КУЯВ ХЪИСУЛ АЪПАЛУН!

*Хъиншивурттал, агъ, бутIа
Бусса кунма ца цийва;
Ттул буттарссу Залихха
Так баймуръя хъинбала.*

*Вихълив бия цар хъуну
Ттул буттарссу Залихха.
Валлагъ, цила Хъиссуцал
Хъиншиврул щарацця.*

*Арснацал Оьмардуцал
Шанма душ бувна хъунма.
Цивтта кунма оьрчIругу
Инсанишыву бур лахъсса.*

*БацIан чIарав инсаннал
ТачIав къахъанай махъал;
БучIаймияв зу Къянив
КъурчIишыву кIидачIин.*

*ХъатIай балай учингу,
Буттарссий, бияв пагъин.*

*Пиша учительницал,
Агъ, ххирая вил дакIин!*

*За лахъхъин буллай оьрчIал,
Зу гъан бувссия оьрму.
Жьаматирттаву зуяв
Бусса хъинну бусравну.*


*Зуяв бацIайсса мудан
Га учIинал чIаравгу.
Лап ччяни къадиртунни,
Агъ, ва дуниял зугу!*

*ДачIлай так хъиншивуртту,
Гъан бувссия зу оьрму.
Къаритай ва дуниял
Зу кунма хъинминналгу.*

*Щукру бан бур буккайсса
Зу кунмами инсантал.
Дуручлай зу кунмами
Бур мяъна дунияллул!*

2013

Мирза ДАВЫДОВ,
Дагъусттаннал халкъуннал шаэр



ХЪИНБАЛА

Амуттинхъал Амучин

*Лакку кІану ххирасса цума лаккучувнанни
СумбатІул бюхттул бувсса хъуна Гъазу къакІулсса?
Дакъахъурчангу гъайкал мунал гъаттай хІатталлив,
Гъаттай кІалазурува уруглай уссар жухва.*

*Хъуниминнаву къужа, жагъилтураву жагъил,
МаслихІатирттал бакІчий, ка-дакІ марцІсса зунттал чув,
Щарнил хъун ккурчІнил адав, бусравсса Иларкъадий,
Ярапний, чІяву баннав зу кунмами лакраву.*

*Зу насихІат бувсनावав Амуттинхъал Амучихъ
БачІва ччаннахъ оърчІацал шяравух лечлачийни,
Мунал хасиятраву бурхха виричувнал ццихъ,
Ниттил увну иявав барз ккуркки лавгсса къини?*

*АхІвал чанманал чІарав, цайва ахІвал буссаксса,
Зунттуну ацІантІиссар, дакІнил нузру тІиртІуну,
Барчаллагърал махъругу мунан аъркин бакъассар,
Барчаллагъ шайссар инсан зума авхъний пиш куну.*

*Хъурссул кІамайму бугъан буттал лахъхъин бувнавав,
Мунияту бурвав вин аърцарал къадру бусса?
ОърчІний чІамучи дурну инимечІ бувкунавав,
Зунттал уртту-тІутІал тІин мукссава ххира хъусса?*

*Заманалул аьтарттул цинцигу ларсун гьантIиссар,
Хьуслил бусрав-сан бувми гьантIиссар хурда хьуну,
Так хьинбалар абадлий аьпалун личIантIисса,
Мунил залуннал цагу дуссар гьар хьиншиврву.*

*Ххиранал бакIраяту халкъуннал ссахIру бичай,
Илданун ссахI бичача СумбатIуллал, вин куну,
Зяивминнан ххирама гуже цIакьнал душманни чай,
Лякьиннавча инагу Аллагьнан ххира хьуну.*

МахIачкьала, август, 1996 ш.

ССИХIИР БУССА КIИСРИ

Пианист Хан Башировлун

*ТIуркIутIисса хханссар бавчIаву дакъа
Оьрчи-кIури чIиру тIутIал бизанттай,
КъавтIий ,тIуркIу тIий бур ссихIирчи-кIисри
ЛухIи роялданул кIяла пардардайх.*

*Барзунттал хIикматсса дюхлудул хIукъу,
Хьяллава ливчусса щарацал жюржу,
Чуннив левххун найсса гьан-суннал щурицу
Къявхъа тIисса хханссар гай кIиссурттала.*

*Муруллайх ахьния дагьну нанисса
Арицул жюружанттал гьалаксса гургу,
Зунттал тархъаншиву дуручлай бивкIсса
Хханссар тай вирттаврал някI турдал чIурду.*

*Ца-цал хIала буххай цинявта чIурду,
Дарардавух чавхътIи мугьали хьуну,
Ца-цал пахъгу багъай, щюлли урттувух
Щуруци щарацал макъан дуриуну.*

*ЛухIи роялданул кIяла пардардайх
СсихIирчи-кIисри бур парха тIий, къавтIий,
Гайннул ляълурдава лирчусса макъан
Лехлай дур тархъанну цала дуньяллийх.*

Июль, 2007 ш.

ХІАЖИ

*ХІажі хІажлийн къалавгссар,
Цува хІажі кунассар.
АхІвал-хІал лагънал чІарав
ХІажі кун аѵцуссар.*

*Хъун неххал ххурххулуву
Дуссар вил цІансса хъхъурду,
Ччяравсса царацуву
Ччаврил хІикматсса жюрржу.*

*Цимилул ххурржинттугу
Хъара-хъарайх дирчуну,
Хъиншиву дачІлай уссар,
Аллагънал вахІид куну.*

*БачІвасса ччаннал аьширу
ЛирчІссар эжегъир ххуллаву,
Ххяллал къянкъашивриву
Дуссар вил зирангшиву.*

*Къалякъай усса кІану,
Уссар гъарцанначІагу,
Магъриблия – Маширикълийн
Иянтіссар ца къини.*

*Дарардал куртІшивриву
Буссар вил дакІнил угъру,
Хъун зунттул лахъшивриву
Дуссар вил бюхттулишиву.*

*Мажлисирттай тьямада,
МаслихІатирттал мяъдан,
Мукъуй цІу-цІантир бусса,
Цананияр чин ума.*

*Муниатура ина
Лаккучувну ляхъусса,
Лаккуйсса чарил чІучІа
Мусину чІалачІисса...*

*Гъухъаллал лахъи къурух
Лечлай бур мюрци оьрчІру,
Ларгсса вил оьрчІшивугу
ТтуркІу тІий дур гайннаву.*

*ХІажі хІажлийн къалавгссар,
Къалавгна ХІажі хъуссар.
АхІвал-хІал лагънал чІарав
Малаикну аѵцуссар.*

КІЯЛА ЧІМУЧІАЛИ

(Айгунхъал МахІаммадлул аьпалун)

*Лавгссарав жул авур ахиратравун
Ялув дуняллул аьзавгу ларсун,
ТивтІуриѵ къапурду вил хъхъичІ алжаннул?
ТутІайн ссунтІ чин уврал хІурулэнтурал?*

*ХІайн бакъаяѵ лакъин вил лухІи яру
ТачІав къатІитІинну Заннал ках куну,
ХІайн бакъаяѵ лецан вил мурччайсса шиш
Ххяххабургъил зунттайх дирхъусса накъиш!*

*Бюхъайссарив ина ухлавгссар учин,
Баллай бунуѵа вил шаттирдал чІурду.
ТивтІунма бур къапу – къатлул нузкъунтту,
Дакъахъунссия гай ларкъусса чІунну.*

*КІяла чІимучІали – сунттул хъаттирду,
Къатлуѵун бувххунни чІучІитІ къабувну,
Ва карамат таллагъ духъунссар вил рухІ
УттаѵаминначІа уттараннасса.*

Проза



Хизри ИЛИЯСОВ

СУЙ КІУЛУ

Дацлай авадан шайссания, яла аваданмур кІулу бикІанссия

Ттул ниттил чайва

На ганашал кІул хъуссияв ца хъинну машгърсса, махъ нанисса чувначІа. Машгърсса чувнал «урчІа кану» икІайва га. Гьалбатта, цала залуннашал цала дуняллул лагмагума увккун ия. Машгърсса чувнал альбомраву ганал цимирагу сурат ттун ккарккуна: ччарча Хасбулатовлушал, ччарча Руцкойлушал, ччарчагу Лужковлушал, улу, цумурдив ца Аьрабнал Эмиратиртгал паччаІнащалгума дунуккивача.

Машгърманащал на Маскавлив ца институтраву ккалай икІайссияв, мунияту ганачІан лях-карах уххайссияв, яхши-хаш бан. Ганал чІалааьрдаву даин чІявусса халкъ бикІайва. Ттун хІисав хъуна, чак байни, мудан имамну ца илтІа-къирисса чув ацІайшиву. Жу кІул бувнав.

Щира куна, кІюлацІасса зат ия цувагу.

- Ттуйн Суллай чайссар, - куна ганал, кагу дуллуну.

- Ттуйн Саид, - куссия на, ганал кагу чІувин дурну.

Ганал ка хІал бакъасса, хъхъарасса дия. Чурххайгу бурчу ва ттаркІ дакъа, цичІав дакъая. Так яру бия хъунисса, бьав-бьав бивкІсса.

Зад къакІулсса ивкІссания, бигъа-бигъану «урчІа канугу» къаитанссия. Тиха-шиха вичІилухух чІу бивщуну, улу, га кІулминналгу ца яла кІулмарича тІисса.

Дин-чаклия, иман-исламрая ттунма къакІулмур на ганахъ цІуххайссия. Циняв суаллахъхъун жаваб дулайва. Га жагьилсса аьлимчу ия.

- Вин му дин та, чув лархъхъуна? – цІувххуссияча:

- Ттул бутта аьлимчу икІайва, аьпа бан цал, 92 шинаву ивкІуссар, миннува 17 шинай, ца лях къакъадиртун, зума дургъуссар. Ганал на 5 шинава шинай чак буллали увнав, Къуран буккин лахъхъин бувна, - увкуна.

ХІатта, бусурмантурал хъуни-хъунисса вакилтуралгума диндалул иширттаву ганашал маслихІат ккаккайва. Ттун цимилагу ххал хъуна Суллай мизитраву рузнамалий имамну авцІуну, дявват-насихІат буллай. Цувагу мавлудиртгал минахур ия. Цайнма къаовкуну мавлуд дарча, къаччан бикІайсса хасият дия.

Жу кІул хъусса шин хъинну аварасса, ччанарккусса дия. Халкъ хъямалашиннардахун, гьарарахун, къача-къучшивурттахун багъну бия. Ганал хъунама,

ттул дусгу, бивтун увтуна. Аъжаивсса иш бакъарив: милицанал мюрш-кюрш-ссса хулигантал бугъарча бакъасса, цайми хъуни-хъунисса давуртту аъч къадурнура къаритайва...

Жу цанначІан ца шаппай буххайссияв, буккайссияв. Ганал мусил кІичІру кунмасса, мюрщисса, школалийн заназисса душ ва оърчІ бия, бувну шин къархъусса ца наннагу бия.

- Вай ттулва оърчІру вилмиксса та хъунавав тІий икІара, - чайва ганал цал-цал.

- Хъунхъуви, ина ттуяр ца ацІра шинал чІивиссарахха, хъунав хъун ана-варну урав? - жаваб дулайссия на.– Мюрщину буна, хІаз ласи винма оърчІая. Хъуни хъувкун, минная так ца бакІ цІуцавур дайдишинтІисса...

Ганал арснал, на увкІтари, ттул цІа хъама дитлай дуну:

- Папай, вичІан лухІисса дипломатращалсса дядя увкІунни, - чайва.

Цал тІурча, буттал:

- Цу ур мийх? – кукун.

- ЛухІисса дипломатращалсса дядя ур, амма хІакъину ванахъ дипломат бакъар, - куна.

ЛичІлулсса оърчІ ия. Кулпатту ганал ненттабакІ тІивтІусса бия, хъамаличу увкІний, думур хъхъичІ дишайва.

Та уххарчагу ганачІан, ттун га, цабяла луттирдугу хъхъичІ бивхъуну, ккалай, чичлай лякъайва.

- Ссаха зий ура? – куну, цІуххуссияча, ганал:

- Къуран таржума буллай ура, - увкуна.

- Бунмассания бур, - куссияча:

- Ттун гайннуи дакІ къадакъай, - куна, - на, цайми куна, ингилис мазрая, парсерая буллай акъарача, тІайланма аъраб мазрая таржума буллай ура. Вай луттирду чІалай бурив, вай комментариярттури! Аллагънал калам, хъис бах-хана къабувну, бусса куццуй биян бан аъркинссар инсанлугърачІан!

- Ваппабай, муниярч жапасса даву дур!

- Гъай-гъай! Чичул бюкъавхъу хаварду ххай урав?!

Ганал укун цал ттун къутІинсса махъругума увкуна, амма на, къулагъас къадурну, лултту-ялтту гъан бувссия. Гъарзад тІайла бацІан буллан къашайхха, туну. Га тІурча буслайна ия:

- АцІра шинни ттул ва давриха зий, яругума цІий бур, чани чан хъанай бурив къакІулли. Аллагънал цІаний ура ва даву дуллай, багълух, харжирах акъарача. Итагу бавкъуну, уква халкъуннайх бачІинна циняв луттирду.

- АцІу, чан-къансса арцу ларсун, вила захІматрах, кулпатрахъхъун дулав-риву оьккишиву дуссарив, ягу шариаьтрайну къабучІиссарив?

- БучІиссар. Амма на мукунсса акъара. Ттун цичІав къааъркинни. Ва на ялапар хъанакъисса двухкомнатнай квартира бурив, вагума лая къаттари. Ттун цичІав къааъркинни, на Аллагънал цІанийра зузисса!

- Ургу инава, винма кІулхъунссар, - чав на.

ГаначІату увккун махъ, на пикрирдай ивкІра: «Вагъ, цукссава дакІ мар-цІсса, иман дусса икІан аъркинни, бувгъусса къатлуву ялапар хъанай уна, чани ласуннин зий, ацІра шинай бувсса захІмат Аллагънал ххуллий харж бан бюхъайсса?» – тІий.

Га 1-мур МахІачкъалалив ялапар хъанай ия.

Цал на ганахъ цІувххуссия:

- Ина ссай ялапар хъанай ура? – куну. – Вилния чІалачІисса, ялун нанисса цичІав дакъар.

- Зукъазисса хІайвантгу, жанавартгу, лелуххантгу ябуллай урхха Аллагъ, - куна ганал. – Ляхъан увниавхъур, нагу ккашил ивчІан къаитара.

- Муния тІайларча, амма вил кулпатгу зий бакъархха.
- ОьрчІал пособияртту булай, - куна ганал. – Навагу чІиви-кьивисса ма-ша-ташулуха зий ура, духсса арцу-мусил мухІлу-ххаржан, муму-тамур дахлай.
- Яварч, ттучІагу дуссар ца ххаржан, - учав, - кумаг барч даххан.
- Ларсун ухъхьу, бурганну.
Цаппара гъантрава, ххаржангу ларсун, на СуллачІан увкІра.
ДалухІигу ттирирхІуну, ххаржан ларсун, хъунисса яругу мюрши бувну, личІлулну уруглан ивкІуна:
- Ва вин чая?
- Увсса кьинилушал барча ан, пишкаш дурна, - куссия.
- Туну, цан дахлай ура?
- Арцу аьркинну дур.
- Ванил яла лахъмур багъа 1000 щюллимири, - куна ганал. – Амма арцу анаварну аьркинну духъурча, бучІиссар бачІи багълунгу дулун.
- Валлагъ, хьинну аьркинну дур, - чав на.
Къадиртун, лавгра.
Ххаржантирттая зад бувчІайсса ия га. ГаначІан ухлай-уклай уну, ттун хІисав хъуна тивумур къатлуву шанна-мукъра тур-ххаржан, ца камал мухІлу ва бухсса варакърай чивчусса диндалул луттирду.
Ганахъхьун ххаржан дулуну барз лавгуна, так арцуми цалсса дакъая.
ВичІиврагу чІалай дакъая.
- Суллай, - учав, - дус, на му ххаржан чІяру хъуну къадуллуссияхха, хьинну арцу аьркинну дуну дуллуссия.
- Ма цалсса вай ттуршва щюллими, - куну, ганал ца ттуршуннил чагъар буллуна, - гайми мукъттуршвагу хьирив лаян банна.
- Хьинни, - учав. – Дарагу-даххавварч?
- Дулав цаннахъхьун, амма ттигу арцу ларсун учІан увар.
ХІасибул-калам, ялагу барз лавгунни.
- Суллай, ци тІарарч, дус, ци ккаклай бур? – куну, цІуххав.
- Валлагъ, щийнчІав вихшала дайсса замана бувкІун бакъар, хІакьинну-гъунтгий тІий ур.
- Ссавур дан багъанссар, - чав.
ТІайламур бусан, пашман хъунна ганахъхьун ххаржан дулаврия.
Цувагу, нава оькъавкуну, янин ххал хъун ириллай акъар. Цал на ганачІан шавай лавгра. Ухханнийна, айивхъунни бувчІин буллай:
- Уссу, Саид, валлагъ, ца учІиакъул хъяврин ивхъунна...
- Суллай, - чав на. – За бакъар. На му ххаржан хІалал дитлай ура.
- Ци-и-игъ?
- Ттун цичІав къачча, - чав.
- Барчаллагъ, барчаллагъ, ттул махъ бакъар, - тІий ливчІунни.
«Ваксса Аллагънайн вихсса чувнан баннача хьинбала», - тІий уссара ттувува нава. Диндалул инсаннан бувсса хьинбалларая барачат бияйхъуви.
Ттул ца дуснал, цувагу чичул, цІувххуна:
- Бусила, чакгу буллай, бунагъругу буллалима хьинссаривкъай, чакгу къабуллай, бунагъругу къабуллалима хьинссарив? – куну.
Суллал, пикривагу къабувна, хІадурнасса жуав дуллуна:
- Чакгу буллай, бунагъругу буллалима хьинссар.
- Цан?
- Бунагъру чаклил лиххан байнутІий.
- Ттуннив, чакгу къабуллай, бунагъругу къабуллалима ччива, - куна чичул.
- Му вила иш бур. Къиямасса кьини жуав дуллан винмар багъантІисса.
Суллайл къянкъасса, зяй-зяй тІисса чІу бия. «Ва цукссава духІимирал

увчусса, адав дусса чув уривав?» - тИсса пикри букІлан бикІайва, ганах вичІи дирхьунан.

- Чакгу буллай, бунагъругу, хІараммургу къабулларча? – куссияча:

- Гьаксса хьинни, бюхъарча, амма оърму жапасса бур, хІалалсса бутІа бириян ялу-ялун захІмат хъанай бур, - тІива.

Жу архІал мавлидирттайнгу занай бивкІру. Ганал Къуран махІражрай буккайсса ххуйсса такьва дия. Суллайл чІу экъи нанийни, дакІру дарссуну дачайва.

- Такссава хІайран буллалисса чІунил заллу цури, валлагъи, малаик ххансар, - тІун бикІайва хаснува хъами.

Кьинирдал ца кьини ттунгу арцу аьркин хъуна. Буржлувссаннал: «Ци-дунугу дула, за бакъар, арцу дакъанагу», - увкуна. Мунийнма кунма, Сулла ия лагма уклай:

- Ци-дунугу машин ласикъай ттуща, цябала задру дуну даххан дуллусса, гай чун личІинсарив къакІулну урача, - тІий.

- Ци дурар? – куну, цІувххуссия.

- Вайнна ххаржант, ччарча, вана гурдай-тургу, НикІалай заманнайсса.

- Вагъ, мяйжаннугу, див? – увкуссия.

- Гъай-гъай.

Га кІикъянцІасса, чІатІаракІрал ккуртта кунна, лархІусса тур дия. Цийрагу накъич дия: кІира бакІ дусса барзу бивхьусса мугъру.

- Ванил багъа цири? – куну, цІувххуссия.

- Зувиазарва щюллими, - куна ганал.

- Да, къаикІуварч, ина ци тІиссара? – куссия.

- Вих акъахъурча, кьимат бишучІан гъанну, ачу, - куна ганал сивсуну, на къаачинсса ххай ияв къакІулли.

- Ачу, гъаннуча, - куссия.

Сайки-масала, жу шагърулул хъун майданнивсса музейравун лавгссияв. Гиву багъабищу ия. Га лахъи-хъаласса, бакІгу кІяла хъусса чув ия. Цувагу духсса хялатраву ия. Гурдай-тургу хъхъичІун дургъуну, гъанагъи дуллай, цІунилва-цІунил, явш бивтун яругу, ганих уруглай ия. Ахиргу:

- Ванил яла ххирамур багъа кІиазарва щюллимири! – увкуна.

- Бувагу кІиазарва? Ина ци тІиссарарч? Ваний НикІалай паччахІнал мугъру чІалай бакъарив?! – тІий ия, рязи акъа Сулла.

- Ва дур укуннасса штамповкка, - увкуна усттарнал.— Аслийсса НикІалай заманнул тур дакъарча...

Микку на ихтилатравух хІала увхссияв:

- Ургула, - куссия ганахъ нахІуну, - винма магаришгу баннуча, мунил багъа ацІазарва щюллимири тІисса справка дулакъай.

- Ци-и-игъ?! Гъич, къабюхъанссар...

- Туну, ххюазарва щюллимири тІисса дула! – куну, ганал жиплувун ттуршва щюллиминнул чагъар ливкІуссия (100 доллар).

- Зу на туснакъравун авкъуну къаитанссар, валлагъгу, - тІий уна, чирчуну справка дуллауна.

ХІасибул калам, утти ттучІа турданул багъа ххюазарва щюллимири тІисса справка хъуна. Суллагу му багълий дулун рязи хъуна. Багъа бишухъ, кьимат лавай ба тІий, гагу миннат-ссуннат буллай ия...

- Цуксса хІаллайсса буржирай дуллай ура ва ттухъхъун? – цІувххуссия на Суллахъ.

- ДачІи шинайсса, - куна ганал.

- Хьинни, - рязи хъуссияв на.

- Так, ургула, ина, дус, расписка чичала, - куна ганал, ттул вийн вихшала дурча, амма му чил хъус дур.

- Ва цлана чичайссар, - куну, чирчуссия.

Гурдай-тур Маскавлив цуриг ца коммерсантшагал хъуслих даххана дурссия. Багъа бившусса музейрал справка ларсун, ххюва щюллиминнунсса муму-тамур ларсун, МахIачкъалалив тIайла дуркссия даххан. Цаппара гъан-трава Маскавлия оввIун бивкIуна.

- Жу къякълухун бихълан вин мюрщи оърчIруяв? Ласи вила ссалчIан дакъ-асса тур махъуннай! Зана дува жул хъус! – тIий.

- Цукун зана дави, на зул хъус харж давхха, - тIийра усса.

- Винма ччиния зана да!

- Даххана къадан аьркинссия. Тти ттуща бан шайсса цичIав бакъар, - куссия.

Му шпурттуву ца чариввагу къякъулсса мичул ттухъ:

- Чан-къансса строительный подрядру дурча, предприятие аьркинну дур, виннагу ци-дунугу къадитаннуча, договору даннав? – куна.

- Ттунма хайр бухъурча, цанни къадан, - куссия.

Сайки-масала, ца михърансса хайр нава лавсун, кIиссурансса ганан бувссия.

Ттун гай хIарамсса арцу къадаркъуна. Хар-хавар бакъа силисттачитал букIлай, цIухху-бусурду буллан бивкIуна. КутIану учин, дирхъуну каруннай «къармахругу», мяммал къатлувун авкъунав. Судрал ттун тамансса танмихI бан куну хIукму къувкъуна.

Му куцуй, арцу цайминнал дуркуну, нарандай на щяивтунав...

Байчара, ясирнал тагъар туну ци дикIанссар. Дукан, хIачIан къадуллай, ккашикал уллай, аьз чин уллай ивкIра. ЧIявуну дус Сулла дакIнийн агълай икIайва. Амма муния ци хъунссия, ганан на хъама ивтун унуккивав. Бизарну най дия чIун. Ттуштал ахIал чIунгу ясир дурсса кунна, гагу пашманну дия...

ЩинчIав къякъулну, камералувун цIуну увкIсса ца «клиентнал» цащала, - зу вих къахъунссару, телефонный трубка лавсун увкIуна. Чип мазралу лабивтун, трубка хъаралун ливкIуну, надзирательнашал маз лякъирча, гивун ччимур духхан дан бюхъанссия. Хъхъувай, пахъ багъний, циняв, аьнакIив кунма, лавкъуний, цаппара чансса тIирхъами, бивзун, телефондалувух гъаннайн, вихнайн оввIий, ва гъан дара, та гъан дара дачкалувух тIий, ягу силистталий ва учара, та учара тIун бикIайва.

Нагу ца-кIийла ниттичIан шаппайн оввкуссия. Ниттил вас ссил даин ттучIан дачка гъан дайва, аьркинлугъ дирхъуну. Гайннал Суллагу ттуя цIухху-бусу буллай чIявуну лун-ялун учIайшиву бувсуна. Ххарину уссара: «Вагъ, ттулания мийжаннугу дус ивкIун ур», - тIий. ТIайлассар, цалагу дачка къадуркIуна. Ци-бухъурчагу, барчаллагъ-яхха хъирив уккаву, ци бур, ци бакъар чин учIавувагу. «ХIакъсса дус ивкIун ур вил Сулла», - тIий дия ттул дугъарасса нину.

Цал тIурча хъхъудяризал ттуин Суллал оввкуну:

- Ссалам, Саид, цукун урарч?! – тIий ия га. – Щуллу-сагъшиврул ци тIар?

- Ура да, вайми куна, ци банссар, - чав.

- Къянкъа дува, бигъасса чIунгу дучIантIиссар, - кунни.

Яла цакуну:

- Щийн-бунугу ялун бивхъуну, му ттул бурж зана бан къахъунссаривкъай?-кунни.

- Ци бурж? Суллай, ина ци тIий урарч? На цлана бурж булайсса даражалий чIалай урив?

- Ярч, на цичIав къатIрача, амма турданул заллу ия, къутIи дурсса чIун

ларгунни, цанна ччиния дулача тий. Хатта, ина чув ялапар хъанай уссар, кулпатрая, ниттия талав данна тий ия.

- Му цуксса итгав шин дакъасса чув урарч увагу?!

- Гьакссагу дин-чак дусса, иман-ислам дусса ур. Кьутти дурсса чун ларгунни, гихунмаймур ттул иш бакъар тий ур. Акъарив килийну ххишала ялун процентру бичинна тий ур.

- Цигъ?! Процентру? Бусурман чувнал?

- Гьай-гьай. Бусурмангу личи-личисса бикайхха.

- Ттул вихъ тавакъюври, - чав, - на шива укканнин, ссагур дува уча, ацан ува му инсан, маз-къаз биша. Даъар цана каши. Хьхьичва хьхьич ва къатлуша итхяххан бур. Яла ххал банну ци бан бурив.

- Шаймур банна, - кунни ганал.

Ва иширал на махатгал увнав. Цалчин ттуйн дуснал туснакъравун овькуна. «Ци ка-кумаг бави?» - чин кланттай, цала арцул буруккин буллай ия га. Щукру, шинма дачиннува на условно-досрочныйну итаавкъунав. Суллал овькуния махъ, дурусну ца барз лавгукун.

Шанма гьантлуну цанихсса дус левчуна увкуна:

- Цукун урарч, сагнувагу ливчсса щукру, - тий, га ттуйн хьямала агьуна.

- Ттивагу бурж бакрая гьанссарча, акъарив турданул заллу уклай, няккул увну ура.

- Ургула, Суллай, - чав на, - ттул иш-тагъар винна чалай дур. Милицанал на, къаз куна, ивтгунна. Бурж бушиву кулну, на Маскавлив ца дуснайн овькуссияча, ганал багъа яла булунну, цалла дача дуллунни даххан. Га дарххуну, шагьи зана банна, - чав.

- Хьинни, - рязи хьунни га, - та бачинну Маскавлив?

- Кьаккуллихха...

- Ачу, гьунттийва бачиннуча.

- На уссияв цал ца хьис хал, нюжмар-кира кулпатрача, оьрчача дан ччай, - чав, - яла гьан-маччами бавтун, мавлид дан, туснакъраша мурахас хьуну тий.

- Мавлидру дуллай яла иканссарача, - кунни ганал. - Бурж буна дурсса мавлид Аллагнал къамул къадайссар. Гьунттийва бачинну!

- Банну ина тийкун, - чав.

Лахьи-утта къалавгун, поездрай ххуллийн багъру.

Ххуллийхгу бусайсса хавар бакъая, гава буржирая гьалгъа тий:

- Вин къакулссар ттун ккаккайцири, - тий ия Сулла, - вилшиврий ивчавай ливчунна. Турлил заллу увкун, хаятраву вев-гъарай тий, къалмакъал дунни. Чахху-чарахан баябур унна. «Чув ур му аферист?! Ттун ккаккан ува му, на баннача мунацухсса», - тива.

- Суллай, - чав, - ттун турлил заллу ссан аьркини, на виша ласав. Ганан бувчин бан къавхурив ттун ккакмур, на тивун агьшиву.

- Бувчайсса ухьурча, бигъая. Гарив ур, гьайгу-дайгу, винна ччиния дурккун, ттул арцу зана дува тий, цирдагу ва зурул ахирданийнин.

- Хакьину ци кьинири?

- Кьуния килку.

- Дурагу нюжмар лирчун дур. Муниннин къахьун балики?

- Къахьурча килийнусса процентру талав банна тий ур.

- Цакьсса бусурманчув усса ур!

- Ганал цувгу цавай даргиян буржну уссара, тай ттуя талав дуллай бур килийн ххишала, нагу ттуна буржлунманая талав данна тий ур.

- Ина – танан, та – даргиян! Читул – куллухъ, куллул – магърахъ. Миккуния мараз хьуну бур! Му ци миллатрал ур?

- Яручу ур.

Гьалбатга, щала ххуллийх, ккарччив шацІ хьуннин, гава га тикрал буллай ур. Ахиргу, Заннал цІимиллийну, Маскавлив бивунну. Жу, гьунттихавай кьуннийл цаннайн-ца овьчин кьутІи дурссия, яла сарану хьуна бакьин куну.

Хьиривмур кьини на багъа кІул бувссия. Дачалул, яни участокрал багъа ца сотка ацІазарва долларданун бия. Цанчирча, участок Клязьмалий, ххуйсса тІабиаьт дусса кІанай дия.

Сарану бурган лавгру.

Сулла увкІунни дустурашчал машиналий. ХьхьичІ - кІия ганал миллатрал (ярусса) дустал, махъ – на ва Сулла.

Гай рянхъ бивкІсса, кьудурсса джипрай бия. Хавардугу уголовниктурал кунмасса бия. ЩунщубатІивгу вихшала дишинсса бакъая.

ХІасил, Дмитровское шосселийх Подмосковьелийн, Мытицилул чулинмай бавчуру. Ахиргу, участокрайн бивру.

- Гьагъ, варив? – тІий, лечлай ур Сулла.

- Ди, - учав.

- Шикку цими сотка дуссар?

- Ххюра.

- Багъа цири?

- Ца сотка ацІазарва долларданун.

- Ци-и-игъ? Му ци бутгал багъариярч, чансса кьюкьин дува.

- Цуксса?

- Ца ххюннийн-ряххуннийн, - кунни ганал. – АцІуннийн сотка дуннасса кьатрашчал ласун бюхълай бур.

Микку ихтилатравух ганащалсса щупир хІала увххунни.

- Мийжанссар Суллал тІимур. Ттун кІулсса ур мукун дахлай.

- АцІуннин сотка щил ласайссар?! – кунни гама ххуллул ахІалчувуналгу. – Хаснува ваксса хІаллай буржирайгу ивкІун уна...

Гай шамагу ца мазрай гьалгъа тІий бия. Гайннал гьарца калималул ттуй путру дахІлай бия.

- Хьинни, - чав, - ххюннийнгу кьюркьури, 6 азаруннин сотка хІисаврай дулунна.

- Ява, кІулша, - кунни Суллал, - ина буржирдала укканшиврул кумагру буллалисса. «Къачча ттун участок, арцу зана дара!» - тІурча ци бантІиссар. Маз-къаз бихълай, га лахІан ан бигъасса иш бакъассар.

Муний бавцІун, махьунмай зана хьуссияв. Хьиривмур кьини Суллал овькуна:

- Турлил заллу арцу тІалав дуллай ур, - кунни ганал.

- Жувания лахъхьу цамур кьутІи дарду.

- Рязи хъанай акъар. Ягу участок 4 азаруннин сотка хІисаврай цан даххича, бурж лиххан бувну махъ, лирчІми ялун дулунссар, ягу цал арцу дулача, ягу тур зана дача! – тІий ур.

- Суллай, 4 азаруннин лапра кьюркьуссар, «Недвижимость и цены», «Из рук в руки», «Все для вас» тІисса газетарттай обявленияртту ххалда уча, тикку участокру ссан дурив.

- Ганал Маскавлив гьансса крутойсса цуриу ур. ГаначІан кІункІу арча, ина на полную катушку гьанагъи антІиссара.

- На щиячІав нигъа увсун акъара!..

- Амма ина кьатІайлану гьалгъа тІий ура. Разборка дарча, ци чинна? Ласав арцу – зана да цила чІумал! Ина думуницІа увну кьаитантІиссара... Ургу инава, ттул иш танайн баян бан.

Га хьхьуну на хьуслих тур даххана дурсса чувнайн овькуссия:

- Ласи махъуннай вила къярмах! Ттун ва ссанчІав аьркинну дакъар, - тІий рязий акъа ия.

Хъиривмур къини кІюрххила Суллал овькуна:

- Саид, бурж зана ба тІий ур вихь адимина нахІуну, - куна ганал.

- Жувания участок дахлай буссияв муна, - чав.

- Мукъуннийн сотка дулурча.

- Гъич, къадулайссар.

- Мукун увкукун, га кІийн-гилун ххявххунни. Итанна-къаитанна тІий ия.

«Ити му аферист ттухъхъун ириян», - тІий ия.

- АцІула, къунну на тур дуллусса коммерсантнайн овьчав, га ия: «Ласи вила къярмах махъуннай», - тІий. Мугу тур зана да тІий ияхха.

- Та? Ци? Акъаяхха...

- Цукун акъая? Лахъхъуния инава тІий ияв: «Ччарча тур зана дача», - тІий ур тІий.

- ДакІний бакъар, гъархъхъуну ганал ттуйн МахІачкъалалия овьчинтІиссар, цІуххинна, - кунни.

Ялугъий ура, уккавай урахха буржирала тІий. Микку Суллал овькунни:

- Та тур къачча тІий ур!..

- Валлагъ, цІакъсса цалва мукъул заллу усса ур, - чав.

- На пикри бав, - кунни Суллал. – Зу дакъил хъуншиврул 5 азара долларданун соткану нара ласунна.

- Агъ, ина цІулла ивуйярч, - чав. – Игъалавгуннахха. Акъа туну, туснакърава увккун, барз хъуннин, ча дикІанссар ттучІа миксса арцу? На мукун ляхълай ивкІссания, тиву щявагу къаикІанссиявхха.

Маскавлив цаппара ттуярва хъхъичІ Сулла кІулсса чиваркІуннащал гъалгъа тІиний:

- Ва Сулла ци инсанни? – куну, цІувххуссияча:

- Огъ! Му Аллагънал вахІий кунасса чуври, - куна.

Ттувува нава уссара, агар вахІийтал укунсса бухъурча, иблестал цукунсса бикІайривав тІий.

Автобуррай нанийни, цуркул жипавух цІухла бивхъусса куна ияв. Амма цал-цал усттарсса цуркил кагума дирияйхха. Хъап куну, «дургъуссия» цІухла бихълахъисса Суллал ка.

Бусурманчувнал эбататру, хаварду ганал лархсса нетІаку дия. Аслийсса лажин тІурча дахъра тІитІлай дия. «Циняв бусурмантал вахІийталли» тІисса бяйкъусса пикри къабикІан, Заннал ттул итгату пардав дукълай дия. ОьрчІи-кІурисса хияллавах дакъача, лухІи-кІялану, дусса куццуй сурат хъхъичІ дацІан дуллай ия. «Аьлимчув, имам, малла», - тІий, нава Сулла лапва ялтту ишин увну ивкІун ия.

Ца ххуллух на ганащал нахІуну ихтилат бав:

- Ургула, Суллай, - чав, - ина иявхха нукІува Уго Чавеслуя дакІнийн бичавурттал Лу чичин ччай.

- Гъай-гъай, бюхъарча ттун кумаг бува.

- На гъарзад банна, - чав, - так ина бурж лиххан ба ттуя. Винма чІалай бур, цІанасса ттул захІматсса иш. Була ми 5 азара доллар танан инава, лу тІурча нава чивчуну, вин пишкеш банна!

- Къачча! Ми хаварду бити! Арцу диша! Луттиралмур иш бигъар, - кунни.

Муния махъ кІийла-шамийла ялагу сукку бав луттирал ихтилат – мах-чаннан куна, лахІан ан къавхъунни. Цана аьркинний – къанкъану ацІайсса ивкІунгу ия га!..

Ахиргу, 5 азара доллардалун сотка хІисаврай ганал цала ласун къутІи дарду.

Цанчирча, буржирай ми арцу ттухъхъун щилчІав къадуллуна. Дусса чІу-

мал аьркин дакъана, цивппа «ма, ласи», - тий биклайссия. Тти турча, ттуя уголовникI увну, цучIав бакI дугълай акъая.

Ккаччил багълий, кIилийну кьюркьуну участокгу ласлай, ттун хъунмасса хъинбала буллалисса куна гъалгъа тий икIайва Сулла:

- Ттунна ссанчIав аьркин дакъана ласлай ура, ина ххассал аншиврул. Оьнна-аьдада арцу щина-цIарайн дичлай ура, - тий.

Ваппабай, ганайсса язухъ!..

Цал ганал ттухъ метро «ДинамолучIан» оьвкунни. Метрорал хъхьичI жу хъуна бавкъуссияв. Дия дарусса кьини. БитIикьукьултрал къатIа кунма, шуруй бия метро.

- Циван оьвтIий уссия? – цIуххав.

- Ца даххансса зат дурча, - кунни.

- Ци дур?

- Вана, ургу, - ганал пакетрава буккан бувну, варакьрай чивчусса бухзаманнал Къуран ккаккан бунни.

Ттул дакIинийгума гьис увкунни: «Лажинни, ваксса исвагъисса хъхьичIа-заманнал Къуран, хъус кунма, лулттува бахлан бучIиссарвав?» - тий.

- Ссанны багъа? – чав.

- АцIния ххюазара долларданун. Ччарча винмамигу ца-кIи азара ялун бича. Так ласунма лякъи.

- Ттун кIулсса, му ласун кунасса цучIав акъар, амма на цIухху- бусу банна, - чав.

Къуран бахлай ккаккукун, ттун щак лавгунни: «Ва укунасса коммерсант-вагу акъарвав, бусурмачувнал нетIаку лархсса?!» - тисса.

КъутIи дарду, Гъанжилив бияйхту, Суллал ттул буржгу лавхъун, гайми арцугу ялун дулун. ЧIила дакъана ивххун къаитарчагу ганал, участокрацIа увну, цамур чаран ттул бакъая. Вилгу чара бакъари, ттулгу имандакъари учайхха.

Сулла макъу даркьуну, рязину ия. Ххюазара щюллими буллуну, ганал дачалий 25 азара буххин най ия. Га ххаришиву ларитан бюхълай акъая. ТачIав акъачIин сахават хъуну:

- Ачу кафелувун, -гума увкуна.

Бувхру ца чIивисса, лази-лавкъусса кафелувун.

Инт дайдишавал чIун дия. Цавай кIинттул янналуву, гайми «ккири цIу бувну», куклуну ларххун бия. Гъавалул тагъар кунна, кIихIуллану ттулмур дакI дия.

- Гарсон! – лахъну, цала зумуну оьвкуна Суллал. – КIира кофе мугълат бакъа!

- Вассят, вассят, - тий, мицIкIиссурттай левчуна лавгун, кIира лухIира-лухIисса кофе ларсун увкIуна официант.

Зу вих къахъунссару, бутербродвагу къалавсуна кофелухун. ДачIра хIачIарду. Махъру хъунисса, тIуллу шулсса дия ганал. Мукунминнайн оьруснал чай: «Пускать пыль в глаза (иттав лах пурх тIун)», - куну.

Цакуну ганал телефон зяр-зяр тIун диркIуна.

- Алло, алло, гъа, Ксюшай, бухъху шиккун, кафелувун, - куну, кафелул цIа бувсуна.

- Мугу цури? – цIуххав на.

- Бур ца къахъну, ттух эшкъи хъусса.

- Вилния кулпатгу, шанма оьрчIгу бур, - чав.

- Туну цивхъуссар, бусурманчувнахъ мукъра дуцин ихтияр дуссар, - жаваб дуллуну ганал.

- Винма кIулхъунссар, - чав, - так паракъатну вилва кулпатрацал къахъинав?

- На ина куна оь паракъатсса акъара, - бувчІин бувна ганал. – Ттун чара бакъа кІилчинсса, жагъилсса шарсса аьркинни.

Жу гьалгъа тІий буна, ялун ца аьнтІикІасса хъамитайпа бувкІуна. Га лап куклуну ларххун бия. Ганий кофта ва джинсилул хІажак дия. Цуппагу ккаккан исвагъисса, чІинкІ бивкІсса бия. Мурччивгу, ккурккимайттту куна, ятІул дурну дия.

- КІул шияра, - куна Суллал, лувату ивзун, ганин кІану буллай.

- Саид чайссар, - бусав ттулла ца.

- Ксения.

- Собчаквагу бакъарав?

- Собчак ца бакъа бакъассар, ттун чунни ганичІан биян, - хьярч бунни «хъамалу душнил».

- Гарсон! Ттигу шанна лухІисса кофе ва лухІи икъралуцалсса шанма бутерброд! – кунни Суллал.

«Вагъ, ванава цавура дакъасса къирият дурккуннихха», - тІий ура.

Ягу, къакІула Ксюшая ттуйнмагу бивсса барачатъав .

Укунма бялахъансса оьрчІи-кІури хаварду бусарча бакъасса, цичІав дакІний ливчІун, асар биян бансса бакъая. Лев Толстойл тІийкунсса «обванмасса гъавалул тагъардануясса» хаварду буслай бия гай.

БувкІсса куццуй дирину, парх куну, бакъа къатІагу хъуну лавгуна га кьикъубаш.

Чалкъавхъуну СуллагІан смс-ка дуркІуна. Ганал телефон ттул хъхъичІун дургъуна. На чичру дуркуссия: «Я тебя хочу! Ксюша ».

Сулла ххарил левххун най, арилчинмур ссавнийн иявай ия.

- Ина авлия хъуну урав, дуллалимурдагу цирарч? – чав.

- ЦичІав чарагъатссания дуллай акъара, – кунни ганал.

- Винния кІулссар шариаьтрал ххуллий, хъаннищал магъар бакъа цукІун-чІавсса иш бикІан къабучІишиву?

- Ци шариаьт?! Ци магъар?! Ина уракъай ца дюьлил акъу. ЧантІ уку! Лагмава уругу! Инава чув усса ххай ура? ЧІявуну шариаьтрая гьалгъа тІурча, увгъуну, къярз икІан увну, мяммал къатлувунай ачин антІиссара. Ва бур Маскав! Шиккусса халкъуннал зана-къулушин, кІулши цамур куццуйсса дур. Мунияту жу цалсса гражданский бракраву ялапар хъанан къутІи дарду. Яла, хІаллих бишинссар магъаргу. Чан-чанну тІий, чакгу буллан лахъхъин банна! Маскавгу цакуну къабувссархха!.. Чан-чанну тІий, чІиви-чІиви тІийри чІюйлийн лахъайсса. Акъарив чІюй левкъун лагайссар, хаснува ххюлубакІул чІюй бухъурча! – тІий, дарс дирхъуна ттухъ.

- Зунма кІулхъунссар, - чав.

Ххишала зумагу къаавхъра. Гара кьини, ахттакъунай на поездрай МахІач-къалалив лавгра.

Суллал тІурча хасият дия цахва хъунмасса хІаллай ялугъи къабайсса. Ца-кІива гъантлувун гагу ивуна. Ттун кІулссия га увкІшиву, амма цала оьвчиннин авцІуну уссия. Цувама оьвтІий акъая. УвкІуннив нюжмар ларгуна. Ахиргу, оьвчав:

- Суллай, - чав, - ци тІар участокрал масала шаллу булланнун?

- Гъм,.. ургула, - кунни, - участок къаласласиссар.

- Ци? Цукун? Жувания...

- Цайми ишру хъхъичІун багъунни. ХІасибул-калам, гъунтти арцу хІадур да!

- Ярч, нания Маскавлив гъансагума буржирай ларсъссия, – чав, - ина ци тІиссара? Муния махъгу чан-къансса ттучІара лирчІуна. Гайрагу дулун

хьунссияхха, ина къянкъану аьрци ласлай ура кукун, цамур ца «ччувччуну» нанисса иширан харж дурссия.

- КъакIулли, амма, циняр къахьурчагу, гьунтти циксса шайрив дула!

- ТтучIа цичIав дакъар!

- Буржирдавун ухху! Ласи! Лякъи! – куну, ганал трубка бувтунни.

Хьиривмур къини на лавгра ттуна кIулсса ца дин-чак дусса чувначIан.

Щукру, даврий лявкъуна:

-Валий, чав, - багъишла ува, так ттул цамур гьансса кIану бакъар. Виша акъа, на ххассал ан хьунтIий бакъар.

- Цивхьуну бурарч?

- Ттун арцу аьркинну дур, - чав.

- Циксса?

- Ххюазарда!

- Къуруш?

- Долларду!

- Ва-а-агъ?! Та?

- ХIакьину.

- Яварч, - кунни, - ттучIа миксса дакъар. Гьунтти ухьхьу, кIиазара доллар булунна, - кунни.

- Барчаллагъ! Ттун кIулссия ина мьйжаннугусса дус ушиву.

- Так кIулша, - куна ганал, - ттуца пишкаш дан къахьунссар, цанчирча ми мадрасалул арцури. Мунияту чара бакъа зана дитан аьркинссар.(Га мадрасалул хьунаману зий ия.)

- Зана дитайссар!

- Та?

- Шайхту! Лахъи лаган къаританна.

- Зурува, кIиннива?

- Зурува!

- Ухьхьу гьунттий.

Валил мукъурттил дакIнивун нур дуртIуна. На тирх увкунав. «ДиркIун дурхха дунияллий тIайлашиву», - тIисса пикри бувкIуна.

Агана Сулла, нава куна, ккурттулуву, джинсирдаву занан икIарча, исламрал университетраву зузисса Валил идавссил суннатрай янна ларххун занан икIайва. КIяласса чIиртгарацIун ца дакъайвача ганай кIяласса диндалул янна: хялат, никирттайн бивсса гьухъа, чIюн, аьсав. Га нанийни, ттун ххан бикIайва кIичIиравалу чанна лавхъсса.

ЧIалкъавхьуну ттуйн Суллал овькуна:

- Гьу, Саид, ци тIар?

- КъатIар.

- Лякъав цичIар?

- Цалсса къалякъав.

- Турданул заллу хьунаакьин ччай ур вищал.

- Та?

- ВацIана.

- Чув?

- «Жунгутай» тIисса кафелуву, Расул ХIамзатовлул цIанийсса библиоте-калул чIарав.

- ЦIана учIанна.

Лавгра.

«Жунгутайлуву» Сулла ттух ялугъий щяивкIун ур. На учIайхту, ссаламгу буллуну:

- Гарсон! КIира кофе! – кунни ганал цала зяй-зйй тIисса чIуний.

Му ссят ялун ца дяллан къяча бувххунни.

- Ттуйн Шамил чайссар, - кунни ганал.
- Ххарира. Ттуйн Саид, - чав.
- Утти зува гьалгъа бара, - кунни Суллал: - Лажин лажимирайн буцав – кьурталли.
- Ина ттуя цан лихълай урар? – цѳувххунни Шамиллул, пѳякъ ивкѳун, ит-тавгу урувгун.
- Яварч, на щияч ѳав лихълай къаивкѳра. Ххишалдаран, вищал кѳул увагума тѳий ивкѳра. Мукун бакъаяв, Суллай, - чав.
- Я, - кунни Суллал, - зул дянив къарагъаншиврул кѳул буллай акъассияв.
- Гьу, бикѳанссарча. Ттун чара бакъа арцу аьркинну дур, - куну, пѳявлал, заккантту столданий бивхъунни.

Кутукруксса заккантту бия. «Аман, къаагъаннав гайннухун, - тѳисса пикри букѳлай бия, - акъарив гъавуну къаитанссара».

Духъунссия ганан ца 22-23 шин. Дяв ивкѳсса жагьил ия. Ттяч бивкѳсса дарвачгу, авкъатсса хъачѳругу дия. Чѳалай ия качок ушиву.

- Гьунтти шайссаксса дулунна, - чав.
- Мий циксари? – кунни.
- Кѳиазарва доллар.
- Ялами ?
- Ялами ца зурул дянив.
- Хъинни, - кунни ганал. – Ссавур данну гьунттийнин.

Агана Валил къадуллуссания, ссайн букканавав масала? Ссавур къадурну, ци зун най иявав Шамил? Щукру дунияллий цалва махъ бацѳан байсса бусурмантал бушиву. Гьунттихавай Валил кѳиазара щѳоллими буллауна. Нагу, лавсун гай Шамиллул «иттах бивщуссия». Навагу, игъалавгун ссихѳ бювкъуссия. Къинирдал ца къини Суллахъ: «Чичарчув Чавеслуясса дакѳнийн бичавуртту, - тѳий ура. – Инания ганащал Маскавлив цирив ца Форумрай кѳул хъуну, дус хъуну ияв. Таначѳан Венесуэлалийнгума лавгунна, танал оьвкуну.»

Амма га цукунчѳав мьѳѳи ан хъанай акъая. Цал тѳурча, чуврив иривну уна, на ганаща Чавеслуясса чѳирисса интервью ларсѳссия. Чѳун дакъар тѳий уна, гуж-хужрай, ялув ливккун, дуллали увссия. Ххишала цалвагу ттуца га мьѳѳи ан къавхъуна:

- Туну, на нава чичинна, - куссия.
- Му вилва иш бур, - увкуна.

Гайва гъантрай цувагу Маскавлив лавгуна. Тѳайлассар, гихунай гъан хъхъичѳ на Сулла ца академикѳнащал кѳул увссия, лу чичин учѳи лякъинсса.

- Вил дус луттирах личѳину къулагъас дуллай акъар, - куна академикѳнал.
- Вин мукун ххайри, - чав.

Тиха, Маскавлия Суллал ца-кѳийла оьвкунни:

- Шамил учѳайрив? Гайми арцу та дулун най ура? – куну.
- Лахъи лаган къадитанна, - чав.

Луттирая тѳурча лухѳину-кѳялану зума ахълай акъар.

«Ганан ци буссар турданух на арцу дулурчагу, къадулурчагу? – тѳий ура ттухъва нава. – Кѳул бунну, кьурталли...»

Ца Суллан ва ттуна чъянива кѳулсса чув хъунаавкъунача, ганал кунни:

- Му мунал цала турди! Цаманайн бутлангу ссан аьркинни. Дус дуснакъравун агъний, бурж багъишлагума битайссархха.

Ца зат ялагу хѳисав хъунни.

Кафелува Шамил процентирттая зумавагу къаавхъунни.

Чѳал къавхъуну, ча дирирдив дирирну, лирчѳми арцугу зана дав. Увкра

буржирал гьивулула! Бурж савав бунни Аллагъу тааьланал ттул яру титин бан, цума цу уссарив члалачи бан.

Лирчлми арцу зана дурсса клул бангу оьвкунни, ххишала акъассар Сулла. Ганан на хъамава ивтунна. Ттуннив га хъама къаитай. Суй клуллуха лавхъхъусса зад уссархха цувагу. Суй клулли тий, биклайссар суйлух мюрщисса челмултраха лавхъхъусса клулли, суйлувунгу буххайсса.

Ххануйсса диклул чуллу дуркуну, ккутлру-ккутлру дагъан дурну, тлартисса ххячартгайн дуккан дайссар гайннул. Цивппа мюрщисса бунугу, ккарччивми дуссар гьирса тисса, хисилтту куннасса. Ласун дурну гъан дурну дусса дикл, ттурчлардийн дичайссар чуллу. Мура хасият Суллалгу дия.

Нарив, чялиш увккун, луттираха зун ивклра. Ххишалдаран, ттула ду-стал-чичултту ва даврихун машхул бав. Цавайннахъ миннат-суннат бан багъунни, гайми бигъанма рязи хъунни, шамилчинминнал аьнцл бивщунни. Амма на ттуламуния тийнай лякъавхлра. Ахиргу, лу хладур хъунни. Муний-нма кунма, цакуну «Вестилувух» Уго Чавес цлунил президентну ивтсса бувсунни.

Зу вих къахъунссару, хъиривмур къини кюрххила Суллал оьвкунни.

- Саид, - кунни ганал гъавгъсса чуний. – Хъуна бакъин бур. Гьалгъа бан бур.

- На хладурссара, - чав.

- Ухъхъу ЦУМ-рачлан, - кунни, - гъунттий кюрххил, пулансса чулал.

- Хъинни.

Хъуна бавкьуру. Суй клулу, итгах чламуду къяпагу лавххун, илтисса чурх-хайн вешалккалийн куна, макъара хъусса демосезонный палтлугу ларххун, ялугъий ур.

Ссалам-каламгу буллуну, муму-тамуния ихтилатрай ур. Лагмава чантла тисса, шанюккъусса шагъру бур титлу буллай. Жу, гьалгъагу тий, паркрал чулухунмай кучалийх лавай най буру Хъун майданнив.

Цакуну, лажиндаравагу аххана хъуну:

- Ци тлар жула луттирал, Саид?! – куну, цлувххунни ганал.

- Гъа-а,.. ци тунссар?

- Хладурссарив?

- Цакънийва. Ттун вийн хъама бивтсса ххива.

- Цукунни хъама битайсса? Му дур ттул идея, ттул лу! Нара яла агъамма.

Дискета диклан аьркинсса ттучлари. Дула ттухъхъун!

- Цалчин, идея ттулли, - чав, паракъатну, дакл гъалакку дунагую. - Вил идея – даклнийн бичавуртту чичинсса – бакрайн къадуркна лирчлссар. Чичултту на зузи бав. Яла академикнал хъхъичмахъ чивчунни. Вищалсса интервью дишарду. Вил цла дишарду. Цири аьркинсса?!

- Дискета дула!

- Дакъар.

- Ци-и-игъ? Чуври дискета?

- Дискета академикнал цавай цала дустурахъхъун дуллунни. Ттунгу арцу дулунна кунни.

- Ахлмакъ! – кунни микку Суллал. – Ина на кинуть унна! Ваксава на къадар къюкъин щилчлав къаувссара. На президентначлан гъансса чувнахъ дискета дулунна куну, махъ буллуссия. Ина ттул махъ зия бунни. Лажин-лухли, маз-кутла. Тти бувагу цири байсса? Агарда, дискета къадулурча, на гьарзад гъагъан данна! На цана оьвчинна! – тий, телефон дурккун, оьвтлун ивкунни.

- Оьвча винма ччинийн! – чав. – Вил кланттай на цамур куццуй зун иклява. Вил кланттай на вила чулуха ттун ххуйсса бахшиш даяв.

- Ци-и-игъ? Ина, .. хъяй урав?

- Акъара. Бунияла тий ура. Вила чулуха ца Мерседес пишкаш ба ттун. Ягу, зад бакъар ца десятка «Жигули» булурчагу.

Сситтуй трубкалий крисри бизлай, ганал академикНайн оьвкунни, «Жунгутаираун» ухъхъу кунни.

Сулла, Чавеслул кумаг бовну, лахъсса къуллугъраингума лавхъун ия. Му бакъассагу, криссурайх крисса къабивщуну, танал арцуцлух ххаллилсса чалаарду бовну, бацан бовна. Ххюра зиву дусса хлукуматрал къатраяр ганал чалагъа лахъсса бия.

Гъалакнуний, чунгу анаварну, ххуллугу хисав къавхъуну лагайсса бур. Жугу «Жунгутаирацан» бивунав хавар бакъа. Гикку академик ялугъий ия. Баллусса бакрайх кагу дурккун, бишай яругу бакъин бовну, ганал жух личлулну вичи дирхъуна. Чав-чав тий, Суллал на зумааханвагу къаивтунав.

- Кидать айсса, виша арцу ларсун, зана къадитарчари, - куна академикНал ганахъ, - ххишала му махъ мачара. Ялагу, Маскавлив гъаннин на вихъ куссия, зузу луттираха, арцу лякъи куну, амма ина цайми иширтталсса буллай, личину бак дугълай акъаяв, мунияту на дискета дулав цайминнахъхъун.

- На цичав тий акъара, ттун лу ххуйну бовккун ччай бур, - куна Суллал, - арцугу ттун аьркинну дакъар. Так Саид я лу, я шагъи бакъа къаличан тисса буруккинни.

- Мунил жаваб на дулунна, - куна академикНал. – Вичагуния чила къуртуну бивхъусса бак бакъар.

- Цамур бакъахурчагу, на Саидлун ххуйсса бахшиш дантиссия, - кунни Суллал.

-Мунил пикри мабара.

- Ялагу, ттун луттираву гъалатру бакъин бан ччиссия.

- Му вил касму дакъар, - къукъин бовна академикНал.

Сулла ганащал къяца ацлай, бяст буллай акъая. Цанчирча, ганан клула га цу уссарив.

- Мукун бухурча, зад бакъар, - куна ахиргу Суллал.

Жу ялунмай бавкъусса кунма личи хъуру. Муния махъ академикНал кунни:

- Ва камералуву куна, крисригу бовгъуну, гъалгъа тий ия. Агана Чавеслуя президент къавхъуссания, ванан му лу дакнинмагу къабагъантиссия .

- Ина вих къахъунссара, - чав, - цала дусная лу чивчуну буна, ца дак ххари дансса жуав къадунни. Ялунгума оьгу, нягу зия дуллай ия.

- Мунал дискета цува дулун ччай ивкиссар.

-Ттун муния ция?

- Вин бюхайссия Венесуэллал орден-за дулун.

- Валлагъ, му хъунни цакъсса хавар.

Гара къини Суллал оьвкуна:

- Къадирияссар вихъхъун цичав. Кивагу я буккан ацанна, Къурандалиий хъа банна, - куну.

Гъа, бусаннихха хъама бивтсса. Къуран цайминная лахъан бовну бур, цалва таржума бовну бакъар тий, га суд-диваннахун агънури ивкисса...

Луттирах ттун хлак буллунни. Так Суллан ттигу къакулссар. Ттигъанну президентнал иннагурация дунни.

- На Венесуэлалий уссияв, вил лу бакъая, - куну, оьвкунни Суллал.

Хъирив лаллан ивкукун, ттун кул хъунни бивкшиву гикку лу.

- Къаивкиссар му цува гикку, щялмахъру буслайри, - кунни ттухъ инсантурал, - мазрай ца, дакний цамур бусса чув ур. Мугъаятну ику мунащал, - куну.

Къинилул бакрах суй кулу телефондалувух оьвтун бивкунни. Ссая-бу-нугу гъалгъа тийгу ивкун, ихтилат гава ганийн кура баен бувай.

- Гъай, на дахъва ПрезидентначІату увкІра, лу бакъаяхха, - тІий.
- КъакІулли, - чара, ци тІува туну.
Ца къини тІурча учав:
- Ттун шагъи буллуннихха, мунияту бивхъунссар лу аьркинначІан тІий ура, - куну.
- Бюхъай. Итагу бавкъурив?
- Бавкъуссания кІул хъунссия. Дарваграву ччала лабитан къашайссархха.
- Ургула, дус, - кунни ганал, яхІ гъавгъсса чІуний. – На инжитну шава ура, так ца нажагъ акъа чунчІав къауккара. Му ттул интервью лавсун ухъхъукъай.
- Хъинни, - чав, - учІанна.
- ХІакъину ухъхъу!
- ХІакъину къахъунссар, чІярусса давуртту дур, - чав.
- Ухъхъу чІун шайхту, - кунни.
Ци чин ччай урвав? Арцу дула чинвагу ччай акъарвав? НукІуния къачча тІий уссия. Ци буривав малъоьннул бакІраву? БакІрайнвагу ча агъри барча-бакъу?!..
Ца дуснал ттухъ кунни: «Арх уцу му чувная, чапалсса зад ур», - куну. Кулпатгу рязи бакъа бикІай, гъарца на ганачІан нанийни. СуцІ куна, лавчІун ур. Арх ан, экъи утан уссара къабюхълай.
Ссан аьркинссар учала ганан ккалан интервью? Ци къявкъанну банни ччисса дуккин? АкадемикІнал тІийкун, ци-бунугу багъана-савав ляркъуну, кІийн-гилун ххяхланшиврулливав?! Ва зад къабанссар чинсса щунщубатІи бакъар цалагу.
«Ххал аннача ци тІий урив?» - куну, лавгра ганачІан шавай.
Суй кІуллул къатри бул зунтгуксса. Увхра. ЖанахІравун увккунни ятІулсса спортивный пурмалуву. Цувагу ачІи ливчІун акъар. ДакІнил оьккишиврул ухъунссар гукун хъуну. Амма дирину ур.
- Чяй диза, щарссай! – кунни. – Ачу, - куну, нагу тивмур къатлувун увцунна.
Дирхъунни видеокассета. Ганий Равиль Гайнуттин ва Мичи-ххичнал президент ур Уго Чавеслушал. Рамзан Къадыров цинявннайн хъямала агъай...
Ца лахІзалува лапІ кунни Суллал лажингу, гассят дакъа хъунни.
Микку видео лещай.
- Ккавкриввар, ккавкрив? – тІий уссар, цІухлай.
На ганахъхъун цашалвасса интервьюгу булава.
Ттул талихІран ялун цавай хъамалгу бувкІуна. Чяйгу хІарчІун, ливхъра.
Гъунттиймур къини, кІюрххил чакгу бувну, шанай ура, цІунил утту ивхъуну.
Цирив дур зяр тІий. Будильник духъунссар куну, лещав. КІилчингу, няс кунна, зяр тІун диркІунни. Урувгра шанювкъусса яруннах. Суй кІуллул цІа! Агъ, инай гъай! Гъаз бав.
- Шава урав, ивзрав, на шилу урача, цІана гъаз хъунна, вил зивуцумуръя?
- Ххюйлчинмур! Лахъу.
Лещав телефон.
- Му цу ур? – цІувххунни шанавух кулпатрал.
- Сулла ур.
- Агъ, инай, му сакъатсса урив ва кІюрххила учІан?! Мунап ци ччиссар?!
УвкІунни. ЛухІисса плащраву ва итгах лархсса тІакълуву ур.
- Вагъ, ва цирарч?! – кунни.
- Ци? Цивхъуну бур?
- Ва интервью! – ганал лахъхъу на буллусса чагъарду бувккунни.
- Цивхъуссар туну?
- Цихъуви шикку Фединнул цІа дур.
- ДикІуча.
- Му гъалатІри. Мунал цІа дикІан къабучІиссар! – кунни ганал гъалакуну.
– На къунну шанай къаивкІра...

- Овькуния.
- Чалну бувкуссия. Мунияту кюрххила увкIра. Лу чуври, Бузай чуври?
Овьча Бузайн! Интервью букъан ба чара бакъа! Акъарив вицIухсса бантIиссар!
- Щил?
- Щил бикIави? КъабувчIлай бури? Лахъхъу ккавккунав щищал ияв –Рам-
зан Къадировлушал?!
- Гъай.
- Ганал.
- Цан, нания ганан оьбала къабав?
- Ина гъалатI ита бавкъун бур! Тираж дуркссарив луттирал? Агар тираж
дуркхъурча, вил иш кърталссар.
- Къадуркссар.
- Овьча Бузайн.
- Га шанашиссар. Яла оьвчинна.
- Цана оьвча!
Овьчав. Бузайл гъаз бунни. Ссаламгу буллуну, бувчIин бав гъарзад.
- Хъинни, статья букъанну, - кунни ганал.
На телефон Суллахъхъун дулав.
- Ттул ца-бакI дити, суратгу, амма цуппа интервью букъан ба.
- Хъинни.
Ттухъ Суллал:
- На нава чичинна лу, - кунни. Яла: - Инания гъич, академикIнан гъалатI
цукун хIсав къавхъуривав?
- КъакIулли.
- АхI, къавичIи дишай вил ласнал ттух, - кунни ганал ттул кулпатрахъ, -
шамлийну ххишала арцугу лякъинтIиссия...
- Тти муния гъалгъа тIий цивхъунни, - чав на.
Га лавгунни.
Муния махъ академикIнайн оьвкуну, хъумур бусав.
- Арх ува му адамина, - кутIанну кунни ганал.
Гара къини на лавгра ца дусначIан. Бусав Сулла увкIсса куц.
- Му ина нигъа усан уллайри, - кунни ганал, - бюхъайссар вил къатта
ккаккан бувну бикIан – кюрххила учIаврил мяъна мури.
- Чансса гъалакнун ия цувагу.
- Ди, муниятири, - кунни. – Цана му вин бансса оьбалдарах луглай уссар.
Ина лавгун милицанайн баян ба. Цахъвагу уча: агана винма ци-бунугу хъур-
ча, кIулша вилшиврийри, на вил ца дулав милицайн, - куну. – Ина акъаяв га
инжитну ур тIий?
- Хъяврив уллай ивкIун ия.
ХIасил, ттивагу бакIрая лавгунни, игъалаганссара тIий уссара.
Агъ, вил къаттай, чая му талихI? Ахтгайнмай цIунил оьвкунни.
- Гъу?
- Бузайл телефондалул номер цери?
- Ца ххюра минутIрава оьвчирча, бусанна. Ци бан тIий ура?
- Интервью дацIан дурну дурив, дакъарив кIул бан. Му хъярч бакъархха,
бала хъун бюхъайссар.
- Хъинни, оьвча.
На ганахъхъун Бузайл номер булав. Муния махъ къаагъунни.
Нюжмардува увкIунни ттучIан, ваца цичIав къабивкIсса куна. Ттуингу
даин телефондалувух оьвтIийна уссар. Аъжаивну хъин ивкIун ур, ци оьбала
бан ччай уссарив. Ттуннив утти кIулли ганал багъа ци буссарив...



ИХТИЛАТРУ

Карашатусса ишбажаранчи
Аблиев Абдуссамад АблихАажиевичлуцалсса ихтилат



- Абдуссамад АблихАажиевич, журналланул буккултрахъ виява оърмулия бусарча ччива.

- На увссара 1958 шинал 24 февралданий Карашрал шяраву. Тул нину-ппу, апа бан цал, жуву оърчАаву захАатрахсса гъира чИвинийва бихьлан бикАайва. Бутта Аблиев Абли-хАажиевич Абдуссамадович кьутанданалийсса школалий завхозну зий икАайссия. Нину Аблиева Абишат МахАаммадовна колхозраву зий дикАайва. Жул кулпатраву бия 4 оърчА: Аблиев АбдулхАамид - хьунама уссу; Гъайбат; яла нава , чАанма чИвимур – Жавагъи. Миннал цинявннал цалва цалва кулпатру бур, цАуллуну-сагъну зий-занай бур.

- Ина чув дуклай ивкАссара?

- 1976 шинал кьутаннай школа кьуртал бувссар. Ттун яла ххирамур тарихрал дарс дикАайва. Циняв учительталгу дакАний бур. Амма яла хьунмур асар биян бувна Лахъириятусса Ширвани АбдуллатИпович Бакмаевлул, цАана ур ДГПУ-рал матфакрал деканну зий. Хьинну дурчАин дайва хАисаврттал дарс. Физика дишайва, апа баннав, Къаллаев Жъпардул 3 шинал хьхьичА инсультрал ивкАунни. Га жул классный руководителъя. Лакку мазрал дарс дишайва Ккурклиясса Мансур Магомедовичлул. Ганал ттувун литературалухсса шавкъ дуртуна.

- Ина Армиялий къуллугъ бувссарив?

- 1976-78 шиннардий на ивкIссара армиялий Тулалий, артиллери-стурал частьраву къуллугъ буллай. На учивияв, му чара бакъасса аьркинсса школа бур куну. Хаснува вай ттисса ливну нанисса жагъилтал хъхьурттаралу бугъаншиврул . Цанчирча армиялул ур инсан низамрайн уцлай, марцI-чапалшиврулсса буллали уллай ур, лази-лавкъуну, цала цува увгъуну икIан лахъхьин буллай бур.. Тулалий дачIи шиная учебкалий уссияв,яла жагъилсса курсантътуран даву лахъхьин дуллан ивтунав. 1800 инсан усса частьраву дурагу 1 рота цIигъуртурал дия. На гивун увтунав. Яла ттуя хьуна цIигъуртурал роталул командир, нагу къаивтунав гиккува цIигъуршиву лахъхьин дуллан. Армия лавхъун махъ ттухъхьун буллуна - Щала Союзрай къамулсса 4 разрядрал цIигъурнал свидетелъство .

- Вил ларайсса кIулши дуссарив?

- 1986 шинал на къуртал бувссия Дагъусттаннал Политехнический институтрал «Технология консервированиялул» факультет. Тиву математика дихълай икIайва, аьпа бан цал, Къаллаев Саид. На даин га барчаллагърай дакIнийн утара. Ттун ганая математикалул дакъасса, мадара оьрмулул дарсругу лархъхьуна.

- Вил кулпат буссарив?

- Ттул кулпатрал цIа Багунни. Ганил къуртал бувссар Шахтинскалийсса бытовой обслуживаниялул институт. Зий буссия Горпромкомбинатрал лабораториялул хъунмурну. Жул шанма оьрчI бур: кIия оьрчI ва ца душ. Хьунаманан , бутган цIасса АьлихIажинан, царсса дурцуссар, цалагу ДГУ-рал юрфак къуртал бувссар, цала пишалий зий ур. Ганая, лачIун увккун, чемпион хъунни. КIийла Аьрасатнаву 2-мур кIану бувгъунни , двухкратный серебряный призерди.

Хъиривманал - Аьлил, ДГТУ-рал факультет муниципального образования къуртал бунни, цалва пишалий зий ур. Гагу лачIун уккури. Дагъ-устаннал чемпионни, мукуна Аьрасатнал студенчесволул чемпионни. Ттул кIиягу арс спортрал мастерталли. Душ, ниттин цIасса Аьйшат, II-мур классераву хъхьичIунну ккалай, хIарачат буллай бур.

- Инава ссаха зий ура? Даврия рязину урав?

- 1978 шинал ноябрьданий Армиялия увкIссара. 1979 шинал зун увхссара МахIачкъалаллал Ленинский райондалийсса Столовайрттал ва рестораннал трестравун. На увтунав 3-мур столоваялийн цIигъурну. 1979 - 80 шинал ттухъхьун буллуна дуки-хIачIиялул ттучан. На гания кафе бувссия. Дукрагу цайми кIанттайнир чансса къюкьин дурссия. Ттул даву дарчуна. Халкъ, нех дирхъуну, нан бивкIуна. 1981 шинал на увтунав О.Кошеволойллул кучалийсса 18-мур Столовайлийн производволул хьунаману. Миккугу Трестрал хьуними ттуя рязину ливчIуна. Муния махъ, 87 шинал, ттуйн вихшала дурну, шагърурул дянив ЦУМ-ралусса «Курзе» тIисса кафелул шеф-поварну тIайла увккунав. 1991 шинал на

га кафелул хьунама хьуссияв, мукуна чIаравсса кафе «Национальные блюдалулгу». Ттул кафердаву инсаннаца 40 кьурушран уччинин дукра дукан бюхьайссия. МахIачкьалалий таний ххишала мукунсса цамур кIану цавагу бакъая. Мунияту халкъгу кафердаву тачIав чан къашайва.

- Вил даврин лайкъсса кьимат бищайвав?

- «Трест столовых и ресторанов» - рал цимивагу Барчаллагьрал чагьар буллуна. МухIу Гьимбатовичлул «Отличник советской торговли» тIисса бусравсса цIанил диплом буллуна.

- Цана ина ссаха зий ура?

- Кяхулайрай частный детский дом тIитIлай ура, 200 оьрчI занансса. Гикку бикIантIиссар бассейн, спортрал тренажерду. Ттун чай бур, каферду кунма, детсадгу хьхьичIунмурну хьун.

- Вил игьалагансса чIунгу шайрив?

- Ттун ххирар спортив заназинна. Гьарца кьини 3 ссят ахьтта занай дара.

- Вин цуми луттирду ккалан ххирар?

- Ттун ххирар ккалан Даниял Магьдиевалул, Руслана Башаевлул шеь-рирду. Цал-цал Хизри Илиясовлул луттирдугу ккалан икIара...

- Ци чара ина жулла культура дакъа хьуну нанаврийн, маз бухлагла-гаврийн? Жува ци зун багьлай бур?

- Маз бухкъалаганшиврул ганий гьалгьа тIун аьркинссар. Жува тIурча шаппагума буру оьрусрай гьалгьа тIий. Жулва мархри къабитан къаб-учIиссар. Гьенттул оьрчIру шяравун буцаван аьркинссар, маз ишла бук-каншиврул. На тIурча биривсса мутта лаккуй гьан бара. Вай гьантрай дахьа Карашату зана ивкIра...

- Барчаллагь вин хьунмасса, кабакьиннав гьарца дуллалимуницIун.

- Вингу барчаллагь, тIайлабацIу баннав.

*Ихтилат бувссар
Хизри ИЛИЯСОВЛУЛ*



Драматургия

Мирза ДАВЫДОВ



ККУРККУЛЛАЛ ШАЗА

Клира пардавлиссa, ххюра суратрайссa драма

Пьесалувусса ишру хъанахъиссар Лаккуй – Ккурккуллал, Гъумучиял ва Ваччиял шяраваллаву.

Гъуртту хъанахъими:

1. ШАЗА.
2. ШАЗАЛ ППУ.
3. ШАЗАЛ НИНУ.
4. АЪВДУРАХІИН.
5. МАММАДАЙ.
6. АХІМАД.
7. АЪЙШАТ.
8. ККАВКЧУНАЛ ЧІУ.

ЦАЛЧИНМУР ПАРДАВ

ЦАЛЧИНМУР СУРАТ

Сценалий цан дур. Архния баллай бур каманчалий дурцусса буттахъал язугъсса макъандалул чІурду. Кла макъандалухгу вичілий, лухісса гъухъуву, лухісса лачакгу дуртун, пикрирдаунгу лавгун, ца мурціув къужгу дурну шябивкІун бур ШАЗА. Макъандалул аьтІисса чІурдал гъалак буккан бувсса кунмагу хъуну, бивзун, хІаллих халкъунначІан гъан шай.

ШАЗА (*халкъуннахъ*). Зун кІуллив на цуриг?.. Юх, анавар мабуккари кІулла учин! Ттуршуннан кІулсса бунугу, азаруннан къакІулсса, оьсса заманалул чурхгу, дакІгу лухІи лаххан дурсса, ккарксса оьшивурттал оьрмугу аьян бувсса, ца пакъирсса зунттал хъамитайпара. Ттуйн учайссар Ккурккуллал ШАЗА куну. Та заманнай ттуйн Магъилавхъал ШАЗА учайссия. Агъ, ттул аьзизсса нину, ина на дунияллийнмагу циван ляхъан бувссиявкъай? Цукун къакІула вин инава алши бакъу, цила угълил ва аьзавурттал гъулусан дуккан дурсса дакІнивату нанисса, дарарду ххядуккан дансса балайрдал цимурцаннуца

бувсса душ дуняллийн буккан бувшиву?! Ттула бунагъ бакъасса ччаврил-гу на кьукьалдаралун бувтссара... Яла-яла загърурдал пурха ттисса оьсса мазурдилла на талихІрайн буккан къабивтсса. Агъ, ттул ххирасса миллат, циванакъай зу ттуйх та кьини дуккан дайсса? Нания зул мажлисру чІюлу бан балай учайссия, ивкІунах зума учайссия, зуюту цичІав тІалавгу къадайссия. Зурив ттуяту цимурца тІалав дайва. Ттун Аллагъу Тааьланал бюхттулсса чІу, дюххансса такъва, бакІрал ххуйшиву дуллуну дия, амма чанссавагу талихІ, аваданшиву дулун мяш хьуну ия... *(Пауза)*

Магъилавхъал Щазай, оьнин лавгсса оьрмуй! Ина ссал цІанийяв шан цархъайх ччергъилугу ришлай, балай тІий лагайсса? Цибавияв, мискиншиву ялтту дурккун дия. ДухІан багълай бия му кьукьалагу.

(Га цакуну гъалак бувккун, цихрив дулган бикІай).

Ттул душ! Ттул ххирасса душ! Ттул ляълужавагъир! Чув бура ина?! Ина-ния цІана, мажлисрай на балай тІутІийни, ттул чІарав буссияв?! Шикку... цІана... ттул гъухъуцІунгу лавчІун... *(Цила бакІрайх хъама бищай)*. Агъ, вил ликри гъюжу дуккивуи, Щазай, ина вила душ архІал бувцусса увччу хъусса чувнал ккуллалул бутанъяв? Цукун бухІан бюхълай бур вища вила душнил аьсивсса бивкІу?! *(Пауза)*.

Багъишла дува вила балайчи нину, ттул аьзизсса душ. Ккаши ялтту бувккун къабивкІссания, нагу ина мажлисрайн къабуцинтІиссияв. Цибанну туну, укунсса бухъунссия жула къадар, укунсса духъунссия Аллагънал чичру. КъюлтІа тІунна вил бивкІу дуняллий сагъну буссаксса.

Агъалий, зун бувчІлай бурив ттул бакІрачІан бувкІмур?! Ца наяв та замана-лул ссигу-сситарагу ликкан бувмур? Мукун бивкІссания, на ттула оьгу, дакІгу, бугъ бувсса ттула балайгу зун багъишла битантІиссия. Цукун дакІнийн къау-тави цала цІаран лавхъсса шеърирду сававирай Сибирлив гъан увну, тиккува ивкІусса ттула шяравучу Ккурккулал Зайду, дуснакърал аьян увса Къячахъал Шейхун, сибирлив дуснакъраву ниттил увсса ХІабинахъал Саид, революци-ялул цІаний цала орьмулул кьуния ряхра шинаву душмантурал аьщун ивзсса Саидхъал Гъарун, Сибирлив аз увсса къумукънал шяир Ирчи-Къзазахъ, балай къаучиншиврул къацІ бурувххусса яру душ Алхин Марин, Марияннухсса ччаврил мурадрайн иян къаивтна бивтун увтсса МахІмуд, ятиннал рахІу куна мурцІув увтун ивкІусса Батирай, ттун куннасса оьшивуртту ккаккан дурсса лазгири душ Саяд! Балай маучара тІий, шагърулул дя кІичІираву ласнал бивтун бувтсса Мариян.

Ахир, на вай цу-цума дакІнийн утлава? Цу-цуманах зума учиви, ттухва зума учинма къавхъуну уна?

(Пауза).

Агъ. Магъилавхъал Щазай, вийн дуккайсса кьини.

(Архния баллай бур гара макъандалул чІурду. Чансса вичІигу дирхъуну.)

ВичІи дишара! Баллай бурив зун тай чІурду. *(Макъан балайлийн кІура даяй)*. Зун кІуллив та щил балайрив? Та нара, Магъилавхъал Щазара балай тІутІисса. Ца ххирассияхха ттун та макъан.

(ВичІиллий бур.)

**Бюхттул барзунттайсса
ЩютІ учай сулий,
Вилад ахІмакышиврул
РагІайн багъунна.
Щюллисса ардарав
ТуркІутІи кьахънуй,
Балайрду сававну
КьатІул бувгъунна.**

**ДахІалай бакъарив
Вай хъуни хъами,
Эшкьилул бувччуну
Цалий бавцІусса,
ДахІалай бакъарив
Вай мюрши душру,
Ччаврил хІал кьакІулсса
Мюрщинувасса...**

Балай кьуртал шай. Макъангу даххана шай. Макъанналухун буклай бур шеъри:

**Арих нани оьру чуй
Аьв кьюллу мабукара,
Сальян зунттуьх нанийни
Буки кисаран чІапІи.**

**Бюхттул зунттай ав хьурдай,
Вил ттупангирал бутан,
Зунчалу тІутІи хьурдай
Вил оьру чал хъап учин.**

**Зунтту зунчала буккай,
Ар микІирала дуккай,
Дуккан дуллай кьадукай
Вил хханххирава ттул дакІ.**

**Ва дунияллул пикри
ДакІнинмагу кьабагъай.
ДакІнин ххирасса ина
ДакІния кьауккара.**

(Щаза шеъри буклай буна ганил нину дурххун, зуккуьх ххаллугу каллай, ганих вичІилий щядикІай. Щазал шеъри бувккуну кьуртал хъуну махъ):

НИНУ. Бургула, ттул душ, жагьилсса душваран цала яруннан чансса кьадагъа дурну хьинссар. Нагу авлиясса дакъара, вин цирив ца зад хъанай бур. Ина хьинну баххана хъуну бура, хасият кІюла дурккун дур. Ина мудан Абакархъал кьатрал чулухунмай буруглай бура. Вин тайннал кьатрай цирив ца нур дирзун чІалай дунуккар.

ЩАЗА. Вияту кьютІ кьабанна, ттул нину, гьакссагу нур дирзун чІалай дур. Амма вай яру ттулар, кІива янингу, кІива ччаннангу кьадагъа дан кьахъанайгу бакъара.

НИНУ. Ттул душ, лажиннича ттухъ тІайлану буси, на вихъва ца зад цІух-хиннача.

ЩАЗА. ЦІухха, ттул нину, вияту кьютІсса ттул цичІав бикІан кьабюхъ-айссар. Ина ттул ялтту ливксса ккирирахха.

НИНУ. Мукун бухъурча гьакссагу ххарира, ттул ссурухІий, на виятуксса кІа Залгу вияту рязину лякьиннав. Нач кьадурну бусила, та Абакархъал жагьил вин ххуй излайвагу акъарив?

ЩАЗА. Ур, ттул нину, гьакссагу ххуй излай ур. ТІайламур бувсун ччарча, ттун та ччангума хъуну ур. *(Нач дуллай.)*

НИНУ (лахъисса ссихІгу бивгъуну). Ай кьархъуну диркІссаниякьай му ччаву вин.

ЩАЗА. Мукун маучара, ттул нину, ччаврил инсаннай хІикматсса хъару лачІайсса дур. ЦІана ттун мукунсса гьуз биллай бурхха вай ттула кару барзул хъару кунна тІитІин дурну, вай жула Лакрал зунттал ялтту гьава бансса.

НИНУ. Мугу жагьилшиврул авлияшивурича, ина ттухъ бусила, танашал хьунагу бавкьурав?

ЩАЗА. Бавкьура, ттул нину, цимилагу бавкьура, амма цалвагу хьуна къ-абавкьусса кунмасса мякъ бур хханххиравун багьну.

НИНУ. Асттавируллагъ, ина ттутИмур цира, ахир, цІа къариршусса, аьш къалархсса душ чуврив жагьилнашал хьуна бакълай, ина авлияссарав, ахІмакъссарав? Шяравусса хьами нава ххал шайхту, мюршсса шуршурдайн багьлагъаврил савав ци дуривав тІийявхха на дусса. Циявхьур...

ЩАЗА. Циявхьур цира, ттул нину, хьаннил мазурдин къадагъа дан кІа Аллагънашарагу къархьухьунссар. Цанма ччисса бунугу, танал ттуйн дикІул кІисса къалавссар.

НИНУ. КъабикІу, авдал, ахмакъ, му ихтилат бутган баярча маз буккайча, къацІ лакьи! *(Къуч тІий.)*

ЩАЗА *(Щазал мюрая ччергьилу дучІан дай)*. КъацІния лакьинна, ттул аь-зизсса нину, дардирдал ва ччаврил дурцуну, хьяучавайсса дакІнин къадагъа цукун дави? *(Исвагьину ччергьилттуйх къинсругу битлай)*.

**Агар эшкъи хьумий
Мурдалли тІурчан,
Щин диял къахьунссар
Циняв шюшинсса.**

**Агар ччаву хьуми
Чапурди тІурчан,
Дуняллий циняв
Чапур хьунссия.**

(КичІиравацца щиллив чІу шай, Щазахъайн овьтІисса. Щазал балай бя-личІан бай).

ЧІУ. Да, Магъилавхьул, шаппа бурув?!

ППУ *(Щазал буттал чІу тиха ларзулату)*. Буру! Ина цума ура?

ЧІУ. Цу ухьурчагу вин циванна, ина на ттутИмумих вичІи диша. Зухъ Аба-кархьал уча тІива: – Му зула ккацца чув бунугу, ца цІансса ппалав бахІияра, ягу муний тІюванжари бишара, цал айгьурдучІан айла хьуну бусса бурча. Агар зул ккаццул ттяй барча, цал жаваб къадулунтІиссар тІива. Баврив вин?! Цаща цала гьурин бивзсса айгьургу байгьин-бугьан хьанай бакъар тІива!

ППУ. Ци?! Ци ккацца учаввар ина? Жул ккацца бакъашиву тай Абакархьан къакІулну буссарив?!

ЧІУ. АцІула да, вин аьщуйн щун къабувну бувчІлай бакъарив? Ккацца бакъахьурча, хан ккацца кунма эр-эр тІий заназисса душ бусса бакъарив?

ППУ. Гъай, учІиакъуй, ина ттул душниннав ккацца тІутІисса?! ЦІана ва ххаржандалух на вил маз букканнахха! *(КъатІату лихълай, хьирив хьанахьисса чІурду баллай бур. Яла тай чІурду чІяву шай, чІахху-чІарахмий хІала бухлай бур. Щазал буттал чІу лахъ хьанай бур.)* Инава вила мукъул заллу ухьурча, ццупІа куна ликъахълай, ттул хьхьичІун укку! На инагу, тай Абакархьулгу ва ххаржандалиих лаххайссару!

НИНУ. Асттавируллагъ! Асттавируллагъ, ва адаминал ца буза къабувния утти. Зул маз бякъивухьул, вай ци мазру бурчІалсса, оь зурятри! *(Щазахъ.)* Аман, ттул душ, зул махъ ца хьуссарив? Та вин куна, инагу танан ххирарав?

ЩАЗА. Хьуссарив учав? Ххирарив учав? КъакІулли... КъакІулли, ттул нину. Мазрайну гьакссагу ххирасса бура. Агар на цанма ххирасса бухьурча, уттир танал цала чувшиву ккаккан дан аьркинсса.

НИНУ (*цила никру датлай*). Агъ, ттул ляхъа шюшивуй, утти на цири бантИмурвагу?

(*Сситтул щара-кIарагу лавхъун нанисса буттал чIу баллай бур.*)

ППУ. Чув дур ва дучИдакъу? Цана баннахха на вин багъайсса диван! На паракъат баннахха ттул тухум аски бувсса му авлиясса бакI!

НИНУ (*Щаза тамур къатлувун лихъан буллай*). Лихъу, ттул душ! Лихъу гъалак увксса танал ччимур бантИссарча, лихъу хъхъичIа. (*Щаза лагай. Ххаржандалий кIамагу бивхъуну, уххай тту.*)

ППУ. Цана чурххая бакI личИ данна! (Къатлувух луглай, гъалакнун занай ур). Чув дур ва къюкъала?! (*Щарссанихъ.*) Ва аьнакIул бакI чуври тIий ура на вихъ?! Тагу дирчIанна, инагу дирчIанна, яла ттунма навагу банна! На ухъурча ттула кулпатрал мискиншиврулсса буллай, хъхъувайгума рахIатнун шанан къахъанай, ттул душ духъурча Абакархъал айгъурдушал лувзлай!

НИНУ (*ганал хъхъичIун дагълай*). Бакъари! Шаппа бакъари! Лажинни паракъат хъу. Я Аллагъ, тти на бантИмурвагу цири?! Ттуйнна щувив, щяв къутIивив?!

ППУ. БантИмур цири учав? Ттун кIуллехха бантИмур. Дургъуну, та вил душнил бакI чурххая личИ дантИссар. Бугъ дантИссар!

НИНУ (*ганал хъхъичI никирттайн дагъай*). Аман, ттул заллу, паракъат хъу, ца барча бакъул кусса махъру сававнун вила паракъатсса тIювайн тIюпан ликкан мабара! Ттул заллу, сситтучIа ссавур дикIан аьркинссар. Вила аькълулия увккун, бунагъ бакъасса душний сси лялиян мабулларда. Жула душний лухIи михъуксса бунагъ бакъассар. Паракъат хъу. Душнивумургу хIурхIа-хIаллих кIул баннун.

ППУ. Хъинни, бикIуча ва цалсса ина тIикун. Амма на душнихъ тIутИмур вари: агар ттул тIюва, тухум аски бансса тIул дурну духъурча, цалвагу та Абакархъал оьрчIачIа бавцIуну бивкIхъурча, гъархъхъунува ттул ужагърая бат хъуча. Ва щяравалу танин хIарамссар. (*Тту лагай.*)

НИНУ. Ванал кIичIираву ца дахасшиву къадан гъаннача. (*Лагай.*)

(*Най дур фонограмма пашмансса макъан дуриуну. КъарчIгу бивкIун, Щаза тамур къатлува буккай. Лавгун, чIиви кIанттуй щябикIай.*)

ЩАЗА. Агъ, Магъилавхъал Щазай, утти ина бантИмурвагу цири? Дурссаривкъай ттуна таксса аьзизсса чувнал ттун лавмартшиву? КъауккантИссарив, виричув куна, майданнив ттуйн нанисса балардал хъхъичIалу къукъин? Цанма хъинун ххиранун тIий бакъаяв на танал мазрайнун ххира байсса? Нания танайн вихшала дурссия, таная жангума ххира къадантИссия. ЛихъантИссарив хъхъичIа, нагу цIаравун бувтун?

**Архниятун ххал хъурча,
Гъаннун хъурдай учара,
Гъаннун чIарав ккаккарча
Хъувун хъурдай учара.**

**Ва оьрмулий ва эшкъи
ЩинчIав нясив къаданнав,**

**Хъунун мукъах яданна
Хъхъуртгарай айгъур кунна.**

**Алхъа бури ратIаву
Бурандаул лиявай,
Нания къалияра
Дуниятун лиярчагу.**

(*Бивзун, ччергъилугу ларсун, балай учай.*)

Мизитраву луттирдайн
ГьалатІ багьайсса кунма,
Ттул тахсир бакъа чурххайн
Шярал махъру ххи хьунни.

Гьаваллавух лехлайсса
Ттиму мусил итаргуй,
Вил хьирив ялугъаврил
Яру мурчІи шавай бур.

Эшкьилул ччуччин бунна,
Ччаврил микІ лачІун бунна.

Ттигу дурив, итаргуй,
Вил ттул дансса обшиву.

ДурцІуну дур ва ттул дакІ
Ккуллардал мажарнияр,
Мажар битай, бачІва шай,
ДакІнин дарман къалякъай.

Хьамаличу учавай
ЧчатІ букавай лагавай,
ДикІуу дакІ дукансса
Ина акъа къавхьунна.

Къатлуву цІан шай. Най дур фонограмма, дурцуну бур язугъсса макъан.
Къатлуву чани шай. Щаза бур ца далухІигу хьаралух дургъуну, къатлул дя-
нив бавцІуну. Яла далухІигу тиннай дирхьуну, архІал ласун хІадур дурсса
ччергьилугу ларсун, балай тІун бикІай.

ОбрчІ обрчІуннал лахъуни
Ланттулуву бишинна,
Вай шярал хьаннил махъру
Балайлущал гьан банна.

Гьухъа лахъисса банна
Шярал мукъурттил буцІин,
Лачак хьуннасса данна
Мукъурттил ялун дутан.

Зун душварал цибанну
Да, Ккурккуллал жагьилтал,

Зун душру къагъассияв
Магьилавхъанний Щаза?!

Бигъа лагира, Ккурккул,
Шанул буччи, хьунимий,
Сси бивзминнал ссан дизлан,
Тти Щаза бакъассарча.

Багъдад буттал шярава
Вайлул хьуну лавгукун,
Зунттайцири щаращив
МикІ лавчІуну къакъича.

Щаза, далухІигу хьаралух дургъуну, карщуву кай-кай дурну, ччергьилугу
ларсун, къатлухъ барчаллагъ тІисса кунма, лагмавагу буруглай, лагай. Га цІана
къатта пашмансса музыкалул буцІай.

ВЕДУЩИЙ. ДакІгу шиккура къадиртун лавгунна ина, Магьилавхъал Ща-
зай, вила буттал къатлува. Вил хьирив аьтІутІисса хханссар къатрал чІирттува.
Лавгунна, оббаларттал гьивугу мукъав лархьун, чил шяравун, Ккурккуллал
шяраваллил ххуйшивуй. Къавиричу ивкІун ур вин ччан хьумагу, амма вин
ччай бакъар танайн обккисса махъвагу куну. Насу, мискин, ххуллухъин баннав,
бюхъайхха чил шяраву ина талихІрайн буккангу. Амма ва заманнай му иш
хьуншивугу къакІулли. Насу, ттул аьзизсса ссу, нагу вил хьирив дакІ аьтІи
дурну урача, насу.

(Музыка лагъ шай, тагу аьтІутІисса хханссар.)

АВАН-СЦЕНА

Зунзул чани хьятИсса чIун. ЛухИсса гьухьуву, хьун дакъасса далухИгу канихьну шяраваллил зуманивсса ххуллийн буккай Щаза. Ххуллул зуманивсса къунттуй чIалай ур лаивкИсса жагьилсса адамина. Щаза, аглан хьуну, шяраваллих буруглан бикIай.

ЩАЗА. Барчаллагь, ттул ххирасса Ккурккуллал шяравалуй, ттул оьрчI-шиврул ва ччаврил тирханнуй, ттул жагьилшиврул дард-хIасрат. Багьишла бува вила балайчи Щаза, шярал мукьурттил къиялул къаритан буннача ина. Къабюхьлай бур бухIан ттула марцИсса чурххай оьсса мазурдил бивхьусса чяпалсса бухьттан бухIан. МахIмудлух ччаву шавуяв ттуйсса шалва тахсир? Агар циняв эшкъи хьуми оькки булларчания, ва щалара дуниял палачат хьунссия... Ппугу икIанссар цала душнил цала тухундалул къяпри аски бувсса ххай. Ци аьй дави кIанайгу, Абакархьал хьхьичI акьул щала махIлалунгу баллай аскисса махьру увкукун, щара-кIара лавхьун ухьунссия къунну. КIаксса кIа гьалак уккан аяр, ттун нава бивкIуну ччиссия. ТутIуяр кIусса жуав къадурсса ппуяхха кIа ттул. МахIмуд ттуна къаччисса ур куну, къахьунссияхха кIаныхь шялмахь бусан, ттула дакI кIаныхьсса ччаврил ччурччуну най дуна. Абакархьал къатрира, кIайннал махIлалийсса чарттува ттеркъукьал хьуну чIалай буна. Гьаттал ккурккай бавцIусса чIумалгу цукунни ттувурасса ччаву лещан дантИсса? Ччан хьума къаччан антИсса?

**Ссавнийх бивт ссурул ккуртта
Лещан бан бюхьайссарив?
ДакIнивун чани бувма
ДакIния уккайссарив?..**

**Бюхттул зунттай ав хьурдай
Вил ттупангирал бутан,
Ардарав уртту хьурдай
Вил оьру чал хьап учин...**

Барчаллагь, ттул буттал шяравалуй. КъакIулли утти нава чун багьавав, бакIрачIан ци бучIавив къакIула, ина утти та ккаккававча, хьама мабитара вила Щаза. Вияту личIи шаяр ттун нава бивкIуну ччиссия. Цибави, жангу ххирасса зад диркIун дур. Ттуйнна нара ка гьаз дурессания, халкъуннал тIимур тIайла хьунссия... Цукунсса макI ккарквивав къунну МахIмудин. Бювхьуссарив кIанаша шанавунгу гьан? КъауккантИссарив ттул хьирив? (*Шярава акварданул чIу баяй. КIанихьгу вичIи дирхьуну.*) Ухьунссар цIана кIюрххицIун чак буллай.

МАХИМУДИ. Вана на шикку. Бюхьайссияв вил дардирдайсса ттуща шанавун гьан. Цуксса хIалли ттул шикку вих ялугьлай.

ЩАЗА (*ххари хьуну*). МахIмудий? (*ГаначIан ххяххай, чIарав бияйхту, бацIай.*) Утти бивчIарчангу баччи бакьар. Щукру шярава вайлул хьуну гьаннин, ина ккавксса.

МАХИМУДИ. Чунна ина вайлул хьуну гьантИсса? Цукун бюхьанссар, нагу хьирив хьапа тIи увну, вила бакI лавсун гьан?

**Ва ттул вих хьусса эшкъи
КIул хьурча кIай барзунттан,
Наранжи ххярх бизантту
Силул ччуччин данссия.**

**Ва ттул вих хьусса ччаву
КIул хьурча лув лухччинун,
ЦIанну щюллисса уртту
Щахну лухIи хьунссия.**

ЩАЗА.
Лухччинийгу тІутІияв
Ччан къабизайни ххярхсса,
Ссавруннайгу цІукуяв
ЧІалачІинийн къабувксса.

ТІутІи гъюжу дурккунни,
Иман дакъул ка дирну,
Ссавний цІуку левщунни,
Адав дакъул я щуну.

МАХІМУДИ.
ЧІярур аьрщарай дардру,
ДакІнил хІисав дурукун,
Амма чІявур чанигу
Ина дакІнийн багъукун...

Ци банна тІий, дуругай
Оьрму ччисса дуниял,
Дургъуну ура ччаву
Хьхьуртгарай айгъур кунна.

ЩАЗА.
Дарман, ина ттун уксса
На вин ччай бивкІссания,
Ва лухччи мусил хьуну
Ссав ттеркъукъал хьунссия.

МАХІМУДИ.
На щюлли хьхьирил ялтту
Ламу цукун бишиви?
Вих бурувг тІутІул яру
Зана цукун битави?

ЩАЗА.
ЛухІи тІутІул парнияр
Пар авурсса ттул яру,
АьтІий, оьлувкъуну бур,
Оьлуркъусса хьхьем кунма.

Тавханттуву къаччива,
Зунттал яхьулу ччива,
Ччаврил гъузузи яру
Вил хьхьичІун кІунтІатІи бан.

МАХІМУДИ. Щазай, ххирамур, маоьлукъин бара виламургу, ттулмургу оьрму. ЦІана вищал куна вил шеърирдай на хІадурда ва щала дунияллушчала гьалгъа тІун. Къинилун цалвагу вийн я къабияйний ттуща ацІан къахьунссар. Малагара шярава. Яр, вин ттуй хьисвагу цІими къашайрив?

ЩАЗА. Ма ттул ка. Дугъи чІувин дурну, итххяххан мадитара, буца винма ччинин, на ина ша бивзний, бакІ бизлай архІал бачинна. Так шяравун бачу маучара, вилминнал тахсир бакъасса ттул жандалий бухІан къабюхъайсса бухьтган бивхьунни. Мунилли ттун буттал къаттагу хІаран бувсса. Ахир, ва дуниялния гьартар, ттун ина бувсса чІагу , чІалгъаьну чІаланссар, гъари ттун му тирханнугу.

МАХІМУДИ. Ина ттун цуксса ччай буссарив так кІа Аллагънангу, ттунмагу бакъа къакІулссар. Так му ина тІимур цІана ттуща бан къахьунссар. ТІайлар, дуниял гьартар, амма гьартасса дунияллий къуману оьрму бутан ччай бакъар ттун. ХІакъину ттула ччаврин ччимур бувну, инагу бувцуну чунай унугу гьарча, буттал на мулклицІа антІиссара, ялари ттун ина тІисса чІаттираву я чурх башансса янна-ус дакъа, я лякъа дуччинсса ччатІ бакъа, шярайхукку куна, яхъанан багъантІисса.

ЩАЗА. Нарив, ххирама, ттула дакІнил тирхханнарах цимурца дулувиыв. Виннив нанияр бартбисуртту, ащив, гьаттара, ятту ххирану бивкІун бур. Ургула, цІана вай махъру вицІунма цукун бавкъуну бурив. Вил мукъурттил ттул дакІ гъюжу дуккан дунни, чаннасса хияллу оьлукъин бунни. Агъ, къахьунаавкъуссаниякъай ина ттун хІакъину.

**Гъуя, ва ци дунъялли,
Мусих дустал баххайсса,
Ашрапиртгал зяйривав
Щала асгу, балайгу.**

**Гъарнал ашрапи учай,
Му бакъа ина цура? –
Ссавний гъели баргъума
Шагьилул маша бакъар.**

МАХІМУДИ. Щазай, лажинни мукун маучара, Аллагънан ссибизайча. Уруган бюхъайсса бивкІссания, ттун кІа бургъивугу вил симан чІаланссия. Чансса ссавур дува,, анавар мабуккара гъурбатрайн гъан.

ЩАЗА. Агар винма на гъурбатрайн лавгун къаччарча, буца вила ичІун-май, биша магъар, бацІан бува вилашиврий, на бухІанна вилминнал бивщу махъругу, гъужумругу. Агар вил ниттил вай ттула хІаллурду буцарчагума, буттал мурхъах баттарчагума, махъуннай зума хІура дарча, на Магъилавхъал Щаза бакъара.

МАХІМУДИ. Му чІумал на буттал хІаятравунагу уххан къаитантІиссара.

ЩАЗА (*ганай хъяхъисса кунмасса тишгу куну*). Къавиричу ивкІун ура инагу, МахІмудий! Чун буруглай биявав ттул яру, илбислул хъяврин бувну-явав ттулмур дуниял виву чІалачІи дурсса, ччурул щинайн бувккун биявав ттул бакІравусса аькълу вил аьртІаннул дакІнил хІал кІул къахъун? УвчІунна ттун ина, виричуй. Агар вивура чанссарагу чувшиву духъурча, винмагу на хъисвагу ччай бивкІхъурча, хІакъинува кІа щарнил ккурчІав лавгун, ттул чурххайн вила дикІул кІисса къалавшиврийн мукІру хъу. Вари ттул вихъсса махъва- махъсса миннатгу, аманатгу.

(Щаза бачай.)

МАХІМУДИ. Щазай! Ссавур дува, чансса ттух вичІи диша! (Хъирив ачай.)

ЩАЗА. Ттул ссавур хъякунни, дакІгу ъттун рурцунни. Занахъу вила мулкирачІан.

Щаза лагай. МахІмуди хъирив уруглай ацІай. Архния чІюхлахисса Щазал балайлул чІуних вичІидирхъуну, къунттуй щяйкІай. Балай къуртал хъувкун, бакІгу каруннил бувгъуну, лагай. ЦІан дагъай...

Пардав тІумІай.

КІИЛЧИНМУР СУРАТ

(АьвдурахІинхъал къатта. Къур бувну бур ссупра. Ссупралул лагма, кІараллай ширваннугу дурну, щябивкІун бур АьвдурахІин, ТтурчІиял Маммадай, АхІмад.

Щаза бур гайннал икрамрай бавцІуну.)

АБВДУРАХІИН. Маммадай, ттул дус, захІмат къахъурча вила зумуну жун ца балай учарч. Вил балайлул ва жан дигъа лаган дайча.

МАММАДАЙ. Цанни къаучайсса, вин ччарча кІивагума учинна. Дула, Щазай, шиккун та вила ччергъилу.

(Щазал, мюрая дучІан дурну, ганахъхъун ччергъилу дулай, ганихун Маммадайл балай итабакъай.)

**Ина нясив къабувсса къачча ттун ва дуниял,
Пирдавс алжан тІивтІуну, неъматирай унугу,**

**Вишал бан къавхъу маша, тти шишалчІав къабара,
ХІаллурду мусил хъусса хІурульэн бухъурчагу.**

**Агъ, ттул оърму ччуччибуй, ттурулдал хъирив агъсса,
Ттул бакІ царал ччуччибуй, вил бакІрах ччабу дурсса,
Буруккинтгарал къатта къара язиднал хъундав,
ДакІнин къалавсъсса ташу душмандал душнин хъундав!**

АБВДУРАХІИН. Агъ, вил жан цІуллу дивуй, мукъурттил ххуйшиву. Щазай, буцІала уттигу ца къукъу маччарал, укунсса балайлул савлугърая къахІачІайсса миннул дунурагу цибайссар.

ЩАЗА. Вана ва цІана, хІадурна дуссар. *(Анаварну къукъугу ссупралий бивхъуну, бачлан сукку шай.)*

МАММАДАЙ *(за бацІан буллай)*. Щазай, ттул душ, аглан хъула. *(Щаза ганах вичІилий бацІай.)* Ялун бихъу залундачІан биян къабаву, му хъунмасса бунагъсса задри тІий бавссар ттун. Мунияту вингу, ттунагу хъинну ххирасса инсаннал ялунбихъу вичІан биян бан ччай ура. Лахъхъу на хъамалу лавгссияв гана га ГъунчІукъатІув жула Аттал АьличІан. Ганал вин ца ялугълай я батІин къашайсса ччергъилу дурну дия. Ца хъинну дакъинссияча га ччергъилу вил карунниву.

ЩАЗА. Аттал Аьлил ччергъилтту гъаксса авурсса, чІу бусса дикІай, амма хъаннил каруннин кІусса дикІай.

МАММАДАЙ. Валлагъ, ттул душ, му зад ттунмагу хІисав хъунутІий, нагу ганахъ мукун куссияча, ганал вин дурсса ччергъилттугъх исвагъину квинсгу бивтун, тІива: «Агар ттул ччергъилтту хъаннил каруннин кІусса дикІайхъурча, жула Щазал хІикматсса балай халкъуннал къума-цІансса дакІурдиву бявххуну, гай чансса хІаллайсса бунугу дардирдацІа мурахас бай. Цувагу вил балайлух мякъ багъну ура тІива.

ЩАЗА. Цакъни Гъумук базаллуву ккавккуна. БучІанна куну, махъгу буллуссия. Ххуллун кѳини чара бакъа гъанна, Шагъуннуца измугу лавсун.

МАММАДАЙ. Булу туну та жанахІравусса ттул ххуржинттува винма ганал гъан бувсса ссайгъат ласи.

(Щаза лагай.)

АБВДУРАХІИН. Валлагъ, уссу Маммадай, лахъхъу ца иширай нагу Ви-цІхъав лавгссияв. Та Къалалив ина ришлашисса дачІул чІурду чІарав кунма баллай бия. Улу къавтІун изангума гъуз биллай бияча.

(Щаза ччергъилттуцал буххай.)

ЩАЗА. Жан цІуллу даннав цал, оърмулул уччиннин итаннав цув, гъаксса ххуйсса ччергъилу дур. Ва ларсун увкІсса вингу хъунмасса барчаллагъ. *(Лагай.)*

АБВДУРАХІИН. АхІмад, зучІанмай ци хаварду бур, уссил арс, ризкъилул иш цукун бур? Гъашинусса кІи яттин даркъусса къархъунуккар, цакъни Хъунбутта ия буслай зул кІийх чІявусса ттардал чІиру бивчунни тІий. Вин хъунмасса зарал хъурив?

АХИМАД. Заралния муксса къавхъунни, буттауссу, лазуннарал кЮла увкун ивкІра. Муниятү ятту илтІану бур.

МАММАДАЙ. Хъис пикри мабара, ттул уссу, интнийн бувккун махъ илтІами циппа буч хъунтІиссар.

АХИМАД. Яттилния дард дакъарича, дурцсса лахІунттулу ливчІун, кІия жагъилсса хІухчу ивкІунни.

АБВДУРАХІИН. Вагъ, варч му ххуйсса иш хъуну бакъархха. Гъаксса къахъина.

АХИМАД. Хъиннугу, къахъиннугу, утти жуцава бан шайсса цичІав бакъар. КІайннан Аллагънал кІукунсса чичру дурну духъунссия. Ятту, муму-тамур дуллуну махънал къацІ башан бав... КІайния гъич кІа ттул хъахъи ккацца кІулссияхха вин...

АБВДУРАХІИН. КІулссиякъай, къакІулну бикІайссарив, ацІва чал багъасса ккацца бия.

АХИМАД. Бакъассар. Ахъния багъну, бивкІуссар. КІа бивчІаяр, ттун кІай циняв хІухчалт ливтІуну ччиссия.

МАММАДАЙ. Вила бакІрая цадакъалун лавгун лякъиннавча.

АБВДУРАХІИН. ТІайлассар, уссу, залуннан шаяр, зарал хъуслин хъуну хъинссар. Амма, уссил арс, ина кулпат бан чІал хъанай ура. Вила чурххай къувват буна, арс, душ бан шарсса дуцин аьркиннихха.

МАММАДАЙ. Валлагъ, уссу АьвдурахІин, нагу мукун тІий ура. Ванан къахъунсса душ я Ваччав, я Гъумук къабикІанссар. Цува мунин кІункІу тІий акъар... Амма ванан ца душ ххуй бивзун бусса ххай ура.

АБВДУРАХІИН. Яр мунан къахъунсса душ чув буссар? Ххуй бивзун бухъурча, майданнив уккан аьркиннихха.

МАММАДАЙ. ЦичІав къаччива ва вил ичІува душ кунмасса инсан буххан бан ччива ванал къатлувун. Диришиву цилагу, ххуйшиву, хасиятрал хІалимшиву. ПаччахІначІа лайкъсса инсан бур. Амма, уссу, вингу ва къатлул бан аьркинни, укун битан къабучІир.

АБВДУРАХІИН (*ццах куну, тІиркІ куну, лавай изай*). Къабита му ихтилат, Маммадай! Щаза ттул ичІату лавгукун, ттул къатта лелуххул къабивтсса кюру кунма, бачІва хъун най бур.

МАММАДАЙ. Ярч, туну мукун тІий, ина ва цуппа заллусса къатта-къуш, лякълул обрчІру бакъа личІан бан ччай урав? Лелуххун Аллагъу тааьланал хъаттирду дуллусса, га ссурулух лехланшиврулли. Ина ухъурча га яла язимур тІавус лелуххул хъаттирду къукъин най ура. Инания дин-чак дайсса адимина ура, му хъунмасса бунагъри ина вийнма ласласисса.

АБВДУРАХІИН. На мугу къакІулну акъара, амма укунсса рухІ, улу, ва щала лакку билаятрайрагу душиву къакІуллича. Ттунмагу ва муксса ххира хъуннихха, ттула лякълул обрчІ кунма, чІалай бур. (*ЩяикІай*.) Буккайххарч ца-ца чІумал арамтуннава хатІа, хІанттил рункка-зад бувну, шавайн увкІсса чІумал. Къанкъ ласай ккаччин кунна, ттула Шагъуннун хъулуха уххайхту, кІул шай на бувтун ушиву. Дулукъай, пІурх-шурх тІий, ца-ца чІумал ялунна лирчуну, хІинчаксса маз итабакъай.

АХИМАД. Муний Щазал ШагъуннуцІун бахІайхъунссархха?

АБВДУРАХІИН. Асттавируллагъ уча, ттул арс, му зад ЩазачІа бакъассар. Шагъунгу цила пулеметрал ккулларду бухкъалаглай къадиртун, хъаралун кагу

дуртун, кІилчинмур мартабалийсса ттула къатлувун уххан ара. Ччаннан кІул къахъунну ликкай чакмарду, га цІана тІясраву бивхъуну, дохлулсса щинай шюшай ччанну. КъакІулли ганил кІукІлусса, ттјонгъасса каруннилив ягу щиналлив ва жан дигъа лаган дай. Улу хІарчІсса хІангума лялияйча.

АХІМАД. Яла, яла?

АБВДУРАХІИН. Яла ци бикІайссар, ттул арс, нахІусса шану бияйссар тІий, ницІ дирхъусса чяй ларсун бучІай, чІаравгу щябивкІун, исвагину цила ччергІилттуйх кьинсругу битлай, на шанавун гъаннин лагъсса чІуний балай тІун бикІай. Утти зува пикри буварала ттуща Щазайн ичІува душ учин шайссарив, ва бур ттула душ хъанай.

МАММАДАЙ. Муниятурхха мукун ххуйсса душ цина лайкъсса адаминан щаргу булун аьркинсса.

АБВДУРАХІИН. Мунин лайкъсса, ччарчан бакІрал ххуйсса, ччарча да кунахъ дужагьрал цІу учин бюхъайсса, ччарчагу хъуслих ва Лакку билаят машан ласун бюхъайсса жагьилтал, агьилтал занай бур ттучІан, махъ кутІа бува тІий. Амма щинчІав булун дакІ диллай дакъар. Ва къатлува буккарча, нава вай чІирттал чІувин увну, ивчІансса куна ура.

МАММАДАЙ. Ина, уссу, вийнма хъунмасса бунагъ ласлай ура. Агар, мийжаннугу, Щаза вила душну чІалай бухъурча, ина ва, буттал душ кунма, щаргу булун аьркинссар.

АБВДУРАХІИН (*ивзун, чІирайсса дагъанттул хъхъичІ авцІуну, чІиртта-рава кІяла хъусса чІарарду ритлай икІай*). Вай байтулманталгу жу шикку дуру тІий дигъалагру дуллай дакъар. Хъхъуния кІјорххилнин цимирагу кІяла хъуну лякъай.

МАММАДАЙ. Инава хъунав хъушиву дакІнин бутлай духъунссар. Мизи-трава аквар къаувкуннича куну, ахттакъун къабизайсса ххай урав.

АХІМАД. Буттауссу АьвдурахІин, михълишали дилуша. (*Хъяй.*)

АБВДУРАХІИН. ЧІирттарайния михълишали дишинссия, ттул арс, ва букІлакІисса къусилун цибави? КІа Аллагънал ца къурарагу шин ттул оьрмулия яла дичайсса хІикмат дайссания, на ва ссурухІи ттула къатлува буккан къабитантІиссия.

МАММАДАЙ. Ява, къаикІу, му зад Шагъуннун баярча, ми вила чІирттарайсса чІарарду ца-ца тІий риттайча. (*Хъян бикІай.*)

АБВДУРАХІИН. Шагъун цІана ттул кІяла чІарардалсса буллай дакъарча, Щаза авадансса инсаннан щар буллуну, уттуллуй нагъ дишин чІјрусса хъус тІалав дан ччай, шаний шану биллай дакъар.

АХІМАД. Зувагуния хъуслих мюхтажну бакъару, арулва оьрмулий ччан-найх ччан бувтун канансса хъус дур.

АБВДУРАХІИН. Душаврил цибави, ттул арс, яру бучлай бакъахъукун. Вай хъаннил яру я адаминал бакІрал ххуйшиврия, я хъуслия тачІав къабувч-чухъунссар. Вай дур дунияллийн дуккан дуресса илбисру.

МАММАДАЙ. Ургула, уссу АьвдурахІин, жувагу бугъара хъуну буру, цими гъантта махъ ливчІссаривгу къакІулли. Жуйвамургу бан аьркинни. Ина му ихтилат та Щазащал цищала бувния.

АБВДУРАХІИН. Ина тІайлара, Маммадай, гъакссагу хІайпри укунсса, ччинал хъаралу лайкъсса инсан цила тІюва дакъа битан. Амма ттун нач хъанай дур мукунсса ихтилат бан ванишал. Ччарчан инава бува, на рязиссара, Щаза

къатлул бан. Цума ци тГурчагу, уссу, хъамитайпа ялгъузсса чГумал мунил ялун мукъурттил, ласу-къасурдал чявхъа бачайссар.

МАММАДАЙ. На ва ихтилат таницал цАнакула банна. *(Щазайн овъчай. Га бучАайхту, чансса ятГулгу ивчуну, цГуххай.)* Щазай, бусила цАна винна ва оърмолуви ци ччива, бикАайхъунссархха душваралгу цала ца чАатГи мурад?

ЩАЗА. ЦАна ттун ттуйра варианттул ссурессу ччива.

(Циняв махАаттал шай.)

МАММАДАЙ. Циваннаяр вин варианттул ссурессулул, хАайп бакъарив му чурххай.

ЩАЗА. Циван дикАави, ссурессу кутАаманал увкусса махъ, пикри бансса мугълат бакъа, гиччава гиккун увкуну гъан байнутГий. Ссурессу лахъисса духъурча, учин ччисса махъ мазрайн бияннин, ганил пикри бансса мадара чГун дунутГий. Му ци адав дакъасса суалли ина ттухъхъун булайсса?

МАММАДАЙ. Къаччан бивкАхъурча, багъишла ува, ттул душ, амма ттун *(АхАмад ккаккан уллай)* ва ттула гълмахчунал дакАнивусса дардиран ца чаран бан ччива. Ягу вин бувчАлай бакъарив ванал дакАнивумур.

ЩАЗА. Цанни къабувчАйсса? Яру дакАнил дагъанирхха.

МАММАДАЙ. Хъиннува исват бан ванал дакАниймур нагу шеърелийну бусанна:

**Хъарду булларчагу, вих къахъунссара,
Ттуярвагу, ххуй душ, ина ххирара.
Барзунттал яхъалу баякъу щаращи
Къуру кГи дунугу микА малачАара.**

**Майдансса ардарав къанкъ ххуй банавшай,
Сеутнил сил риртнугу силул машара,
Вил бакАрайн дутайсса някА читлил лачак,
Мюрш хъюрурайх дирчу тГутГуха лашай.**

**Ттун щарнил хъанниву ина ххал шара,
Къарапулдал дянив цГу къуруш кунма,
Щарнил душвараву пар тГий ккаккара,
КГяла арцул дянив ашрапи кунма.**

**ЩАЗА.
На душвараву шагъра,
Шагърулий итаргура,
Ца хъинсса виричувнал
Хъаралу мусил ссятра.**

**Бугъан кГулнал бугъарча,
На мусил гунгумира,
КъакГулманал бугъарча,
ЦГун дакъа къюнарира.**

МАММАДАЙ.

**Гъумучиял душварал дарайлийх мусий чичай,
Ина дур шанна жуав ссай чирчуну бикIаву,
Идилданул дяркьу щин Къуйсулуд хъамалу дай,
Жу ссал хъамалу бави, ина увкусса махъру?**

ЩАЗА.

**Хъунбуттал лякълуд оьрчIру
Шютту-шырайх бацIаннав,
Магъилавл ххаллил Щаза
Шютту-шырайх гъан барча.**

АБВДУРАХИИН. МахIатгалла! Мьяжаннугу, ттун къакIулессия, Щазай, виву му гъунар бусса. Гъай-гъай, кIулессия ина ххаллилну, инсаннал няравун бюхханну балай учайшиву, амма шяир бушивумур къакIулессия. Булу щакгума къабаганссияча. Ина чумарт бивкIун бура.

ЩАЗА.

Виричунал чувшиву чулданийри кIул шайсса,

Ххуй душнил чумартшиву ласкъатлуйри кIул дайсса!

АБВДУРАХИИН. Агъ, ина букъагъивуй, вар инания бацIан бувсса шяир бивкIун бура. Вар най буна мукунсса махъру цукун лякъара, цукун цачIун бара?

ЩАЗА. Баларду ккавкнан ххаришиву хъама дитайсса дур. Ттула хажалат ххишала хъуний, цивппа дакIнива ливчуну бачай. (Га лагай.)

МАММАДАЙ (*ца хIикматрах куна нукIуяцIа Щазах уруглай, гания я батIин къахъанахъисса АхIмадлухъ*). Ина кIялакъвкъун ливчIуннахха, АхIмад, ссихIрагу дукки. Ягу ссихI дуккансса хIалданий къаливчIрав?

АХИМАД. Ина тIайлара, ва душнил мукъурттил куртIшиврул, мазрал пасихIшиврул, ялунссаннун цилагу ххуйшиврул ччима адамина хIалдания гъан анссар. Ва душ бакъарча, ца ккаккия бур. БацIан бувсса аькълулуд щаращи. Азарва душнил багъасса бур, аммарив тамансса дардру ккарксса инсан бунуккар.

АБВДУРАХИИН. Ци хъурчагу, чун дутарчагу, мусийн сси къабагъайссар. Дард дакъасса инсан ва дуняллийн вища лякъин къахъунтIиссар, духъунссар танивугу ца циннасса дард.

АХИМАД. АьвдурахIин, жува ччянияцIава цаннан ца кIулсса араптал буру. Мунияту на вихъ нигъ-нач дакъа ца зад учин ччай ура.

АБВДУРАХИИН. Уча, уссу, уча.

АХИМАД. Була ва Щаза ттун.

АБВДУРАХИИН (*гъалак увккун, изай*). Винна ччимур дула уча, ва къатлуву думуний мяш къахъунна, так Щаза була маучара!

АХИМАД (*изай*). На хъуслих мякъну акъара, ттучIа мий кIа шала Ваччи машин ласунуксса дур. Ва вил хъулухату тIайла хъуну, кIа Ваччав бияннин ххуллийх вил ччанналун бичинсса бартбисурттува буссар ттучIа. Амма дакIнин лавсъсса душничIа мигу хъус дакъар. Мий бартбисурттайх бичинсса ашрапирттугума бакъа акъара. Амма, Щазах урувгукун, ттун мий цичIар чIалай дакъар.

МАММАДАЙ. Гъаннайсса Щазах эшкъи хъуну ура уча.

АХИМАД. На зяту цичлава кьютл кьабанна, гьакссагу эшкь хьуну ура. Ва Маммадайшала хьхьичла-хьхьичл ва кьатлувун увхсса кьинилия шихунай чун ургарчагу, гикку Щаза члалай бур, клараллий бакл дишайхту, ванишала ихтилатрай лякьара. Я ажал, я давла куссар, на ванил цланий ивчлангу хладурну ура.

МАММАДАЙ (*ивзун*). Ургула, Аьвдурахлин, уссу, цуксса ххуйсса бунугу, душ буттал кьатлуву лахьи лаган битан кьабучиссар. Ва АхИмадгу, ччарча чурххал овьхьусса ур, хьуслил бютланнарай ивхьусса адимина ур, ялагу Ваччав махь нанисса инсан ур...

АЬВДУРАХИИН. Акьар тий нагу акьара, амма ва иш цакуну...

МАММАДАЙ. Цакуну цери, уссу, аьдат дур жагьилнан душ була учин бучлайсса. Хлакьину жува бучланнин, цакьни жу вичлан Хьунбутта гьан увссия. Кланан ина шава кьалявкьуну ияв. Яла цишала Щазащала ихтилат бувну бия.

АЬВДУРАХИИН. Щазащалагу учав?

МАММАДАЙ. Учав, уссу. Тлайламур бусан, уссу Аьвдурахлин, Щазачла вил хурмат гаксса лахьсса бивкешиву кьаклулссия. Танил жавабрал жу махлаттал бувну ливчру.

АЬВДУРАХИИН. Бувагу бусияр, танил ци увкуну бия?

МАММАДАЙ. Ци учиви, уссу, танил куну бия: «Аьвдурахлин ттул буттал кланайсса инсанни, шярайхуккун булурчагу, Аьвдурахлиннул махь бувсан хьунтиссара,»- куну.

АЬВДУРАХИИН (*ххари хьуну, чирттарайх ках-шах тий ур*). Та жан цулулу дурссар цил! Ярапий, цув талихл бусса ччаврил буччин битаннав, лас кьатлул бюхттул баннав! Ттун клулссия Щазала нава бюхттул акьа, лагь кьаантишиву, кьапа иттах лаххансса даву кьадантишиву. Цаймий мугьисалтту навая махьунмай бувсса. Утти бувчунни ттун, Щаза ттула душ кунма шар булун багьлагьиву.

МАММАДАЙ. Туну жула махь цанин буклакиссарив, уссу Аьвдурахлиман?

АЬВДУРАХИИН. Анавар мауккара, уссу, (*чулухунай урувгун*) Щазах цала шала мулкгума булун хладурну ур АхИмад, нагуния авлия акьара, бюхбайсаксса итгунна. Дакьа акьархха. Кьаклулли, АхИмад, вил миннатту цукун кьакьамул бави. Винма члалай бур ва цукунсса инсан буссаривгу.

МАММАДАЙ. Вила махьгу буси, тлалав данмургу дува. Жу хладурссару.

АХИМАД. Ччимур дулун хладурда. Шанттуршра кьуруш дулунна, ччарчан мийкссара ялувгу дишинна.

АЬВДУРАХИИН. Машлухун багьну махь учиннача туну, шамма чугу ялунссаннун.

АХИМАД. Мигу булунна.

АЬВДУРАХИИН. Кива ттуккугу, жучла ттуккул даву дуллансса цучлава акьассархха яла.

АХИМАД. Мигу булунна.

АЬВДУРАХИИН. Кьассав бансса яттил хлайвантругу.

АХИМАД. Мигу булунна. Гьарца зад дулунна, так Щаза рязи хьурча.

АЬВДУРАХИИН. Рязирав, кьарязирав тий, танихь цури цухлахима, бачинтгимур ттул махьри, ттул амрури. Рязи кьахьун хлатти цир? Ичува душнил заллу нара. На буккан барча, та чунни гьантисса? Яла танин шярайх буклан багьантиссархха.

АХІМАД. Вила ичІуваманал иш винма кІулли. Махъ – махъри, бара ва Маммадайри.

АБВДУРАХІИН. Ттул махъгу махъри.

АХІМАД (*ххарину лавай изай*). Мукун бухъурча, бачияра ттушал ттучан-далийн аьщун дулунмур ласун.

АБВДУРАХІИН. Бачи, бачи.

МАММАДАЙ. Бачи.

(Шамагу бивзун бачай, къатлуву цІан шай.)

ВЕДУЩИЙ (*нашмансса музыкалул фондалий*).

**Агъ, Щазай, ххирасса ссу,
Алши бакъа хІурульин,
Циванни занналвагу
Къабуйайсса вий цІими?**

**Бавххуннахха залуннал,
Ттукку, бярч къабахханну,
Акъаявавли Лаккуй
Вихлу махъ бусансса чув?**

**Агар бювхъуссания
Ттуща вил чІарав ацІан,
Валлагъи, рязиссияв
Вихлу турлища ивчІан!..**

**ИчІаллил щях ивщума
Чил щяту гъаз къаувай,
Ганахъхъун ка дулурча,
Ка дагъсса куна уссар.**

**Тти Аллагънал тІитІиннав
ВичІан цІимиллийсса ка,
Ласкъатлуву лякъиннав
ДакІ ххари дансса гъантта!..
КІилчинмур пардав**

ШАМУЛЧИНМУР СУРАТ

АхІмадхъал къатта. Къатлуву бур АхІмад, Щаза. АхІмад къатлувух сситтугуй занай ур.

АХІМАД (*кІисри-кІисригу буллай Щазахъ*). Цимилли учайсса на вихъ: ил паракъатну дацІу, хъама дити ччергъилугу, балайрдугу, агар балай къаувкуну дацІан къахъанай духъурча, га кјурувун, ппалав дурххун, щинчІав вила чІу къабаянну, къинибархан тІутІу, куну.

ЩАЗА. Хъхъури лархсса чу кунма, ина на так винма ччимур чулухунмай бакъа ша ласун битлай акъара. Нагуния, ахир, ина кунмасса инсанна, ппалав бувххун, балайрду тІун, на хІайвангу бакъахъунссарахха.

АХИМАД. ХІайвангума, га яла къаммазмур хІайван дура. ИчІувасса хІай-
вандалийн овькукун, маз къакІулнугу, га залунначІан бучІай, вин тІурча я
кких, ягу ккиш къакІулли. ХъатІай Щазал балай, мажлисирттай Щазал балай,
чІярусса хъяхъавуртту. Му авлиясса инсаннал хасиятри. Ппалав къаучирча,
му укъавкуну дацІан къашай балай шиву, ва къатлуву уча.

ЩАЗА (*бивзун, ганал сси лялиян бан ччай, бикъавсса тишгу куну*). Балики,
ттун цІана учин ччай бикІан му балай?

АХИМАД. Муксса дацІан къахъанай духъурча, уча да. Инания ттухагума
шеърирду ляхъан буллай дусса дура. Мий ттунмагу бавну ччива.

ЩАЗА. Къаччан къабикІанссарив?

АХИМАД. Авлиянайн къаччан бикІайма цува авлияри.

ЩАЗА (*ччергьилттухун*).

Къаччисса ласначІа оърму бутаяр,
Ккарччул къюву дуллай, цІияллай ччива,
Мунал ляхъиндалухъ жап тІий бикІаяр,
МачІ-муккури лавххун, мурцІуву ччива!

АХИМАД. КъацІ лакъи, къурунсагъ! На ина машан ларсъсса бала-гъа-
лайрттугу тІий хъатІайх, мажлисирттайх занан дакъарача, ттухара, ттула
ляхъиндалуха зунна. (*Маз хъяврин буллай.*) Къаччисса ласначІа! Къархъуния
туну къаччисса чунан, къакъасуллал дукаан ина.

ЩАЗА. Къаччимагу ччан шайссар, ччимагу къаччан шайссар. Мунил кІу-
лагу вихъраяхха дусса. Ччан хъун увния. ХъатІайнгу на вищал, ина бувцукун
бакъа къалагара, микку балай уча кувкунгу, учин багъай. Ягу балай учаву
къюркъусса тІул дауруив?

АХИМАД. Гъакссагу къюркъусса тІулли. Ялунссаннун шеърирду ляхъан
бувугу хъуну дура. Ина ттул ляхъин, ума, акъама къюкьин буллай дура.

ЩАЗА. Ци оьккисса тІул дурну къюкьин буври на вил буми ва бакъами.
Бизарда на миннаяту. (*ЩябикІан бачай, АхІмадлул ка дургъуну, хъит бувну,
тахлийн къуч бай.*)

АХИМАД (*хъат рищун ачай, ялагу цала-цува увгъуну, ялув авцІуну*). Ил,
Магъилавхъал аццул бакІ! На цІана цал уттигу сситтучІа ссавур дуллай ура,
щарсса къатлул чирахъри чайссар, ина бесанурагу къархъунна.

ЩАЗА (*хъювсул бувккун, цихва цутта зума тІий бур*).

Аман, ттул жагъил оърму аски хъунни,
Ттул бакІрачІан букъавкІсса къаливчІунни,
Аллагъ, ина ссал цІанийра ттул бакІрачІан
ХІат-хІисав дакъасса баларду буцлацисса?
Ттун хъус къадуллуну, талихІ буллуния, Зал!

АХИМАД (*ганил къацІлий ка дихълай*). КъадикІу, маз-къункъула лухІи лаган
вил. Ттул къатлуву ивкІусса акъа уна, щих зума тІий дура, ва хІая дакъуй!

ЩАЗА. Бити на ттухава нава зума тІун. Балай учин къабитайния махъ,
зумавагу учин битан къабучІиссарив? Мудан щин кІунтІа тІурча, чарийгума
ккутІ шайссар, бити на ттула ккутІа-бярчІари хъусса дакІ дачІра дан. Вин
ччай бур ци чулийгу на оькки бан, гъаттарал хІайван кунма, ппалав бакъин,
мютІисса щарсса дикІан бакІ хъхъичІа гъаз къадай бан, оьккинугу, ххуйнугу

инава увкумунийн мюгИи буллали бан. *(Бивзун.)* Ахир, цибайссар ласнан мукун кьюркьусса шарссанил. Амма, АхІмад, ци бакъу ина ттуй бихъларчагу, на уттигу адаврава къабувкссара.

АХІМАД. Ина дура, ттучІа обькину оърму бутлай дура тІий, къумасса шеърирдугу ляхъан буллаи, яла мий бири-биривнийгу тІий. На та вил ччергъилугу ххяхха дуккантІиссар хІакъинура. Вил балайрдал шяравусса арантал кьюкьин буллаи бур, хъами-душру зия буллаи бур. ЧІал къавхъуну миннал арантуннай ччанну бизланссар. *(Хъиннува чІаравайгу хъуну.)* ДацІула, ва вил шеъри бакъарив? Ттун кІуллхха ва ина ттухава ляхъан бувшиву. *(Буклан икІай.)*

**Виричу ххай дакІ дачІав,
Чув ххай дакІнийсса бусав,
Къяпа чувнал бунугу,
ДакІ шарссанил гълмагъай!**

Гъу, утти ци учинна, хъин шарссай? Ягу вин на цичІав къабувчІайсса, бакІраву нярал мискъал дакъасса авлия ххай дурав? Вана ина ттул ниттиха ва ссийха бувмур шеъригу:

**Аъв ццуццул шану банна,
Ласнал ниттил лув бутан,
Ццуццул кІаралу банна,
Ласнал ссил бакІрацІ бишин...**

ЩАЗА. Ина ттул шеърирду дакІних хъинну лавхъхъуну бур, къабагъавай ляхъан бувсса бивкІссания, мий вин санну къабикІантІиссия.

АХІМАД. Багъавай ляхъан байсса бухъурча, вихавагу ляхъан бувакъай, туну. Байххурав ина дура винна инара баргъ-барзну чІалаи.

ЩАЗА. Ттухава ляхъан бувссагу чансса бакъахъунссар. Бюхъай ххишала ва вил къатлугу на балай къаучингуча, бити ттухава ляхъан бувми байтру ччергъилттухун учин. *(Щазал ччергъилу ласай.)*

**Дужагъирал дугъаннав
Гъумук майорнал шарсса,
Алжаннугун шунна тІий
Дужагъравун на бувтсса.**

**Ттул цІа Ваччах ппир дурсса
Ва Ваччиял Хъунбутта,**

**Оъруснал дуснакъ увну,
Ссивирливва личІаннав!**

**Муяв, Щазай, вин ккавказса,
Муяв вин ккаккан ливчІсса?
Барча хъуннав вил талихІ,
Ваччиял ттуру зимиз!**

АХІМАД. Къадагъу, къурунсагъ! Ина утти на илданийх ачІин най дурав? *(Чіавахъулу лакълан икІай.)*

ЩАЗА. АхІмад, на вия ихтияр ласав балай учин. Инава адамина ухъурча, бити на бачІва хъун. Къабитарча, ттул дакІ хъяучин най дур. *(Чіавахъулу тІумІай.)* На цурк къабав, инсан къаивчІав, циванни къюлтІну балай тІун? На балай учайсса цинявннан баяншиврулли. *(Чіавахъулттивух къатІув.)* Агъалий, вичІи дишара Щазал оьтгун руцавайсса дакІнива нанисса мукъурттих! Хъама мабитари ва балайгу, нагу!

**Щазал итгав мукья
Испирт-аьракьи дара,
Мачча хьамалу бувкИний,
Ца-ца рюмка буцаван.**

**ДакИнил бивгьу ссихИлия
Качар-чассаг бувара,**

**Майорнал Шагьун дуркИний
Устгуданий бишаван.**

**Щазал иттату мукьал
Ваччи неххал ласуннав,
Щазал бивгьу ссихИрал
ЧЯйннал кьур микИ лачИуннав!**

АХИМАД. Агь, вил му маз бякьивуй, мййжаннугу, на ванил аски авай ураха! *(Ванийх рицун мухлу ттирихИай, яла цирив дакИнин багьну, рикьарицунна увкун ачай.)* ДацIу, ина ва ттул канища цукун дагьарав! Ина кIараллий бакI дирхьуну дирчIаймур дакьара, кьурунсагь! *(Лагай.)*

ЩАЗА *(ганал хьирив)*. БивчIа, виричуй, бивчIа, ивкIунал ва ттул дянив муксса хьуннасса личИшиву дакьарча, бивкIунувагу кьабити! Ина дуллусса хIасратру духIаяр, гьатгал аьзаву ккурхIуну хьиннихха! *(КIанттуйн левкьун лагай. Кьатлуву цIан шай.)*

МУКЬУЛЧИНМУР СУРАТ

Щаза пикридавунгу лавгун, цуппалу, кьарчIгу бивкIун щябивкIун бур.
Яла бивзун, хIаллих чIавахьулттичIан лагай. Мадара хIаллай кьатIув буруглайгу бивкIун,
дюххансса макьбандалий лагьну балай итабакьай.

ЩАЗА.

**ИвкIусса чув акьана,
Чин кIулсса яс бакьанма,
Ттул бакIралу кIаралу
Мукьал аьявай бури.**

**Дарну дуниял дуна,
Бивтун гьели баргь буна,
ЩябикIай кIяла ларзу
КIукIлил дярххун най дури...**

(Ванингу хавар бакьанма ялун Аьйшат бухай, ваних вичIилийгу бивкIун)

АБЬШАТ. Щазай, ттул ссу, муданма кьумасса балайрду тIийнма бикIарахха, цалвагу тяхьассагу улучакьай.

ЩАЗА. Ина бурав, Аьйшат, бачу щябикIу. *(КIану ккаккан бай. Гаи кIивагу цачIу щябикIай.)* ДакИнин амру бан шайсарив, ттул ссу, гива нанимур бакьарив кьатIувгу личайсса? Щукру инавагу чIаххуврай бусса, ялун буххайсса ца ина бурача. Ина кьабучIайсса бивкIссания, на дардирдала аьвну гьанссияв. На личИ муххал-чарил буххурав? Ва ласкьатлуву на бура, цIарал кавзливун багьсса чару кунма, оьрму бутлай. Гьантта, шинну лаглай дур, дакIмур лухИ ларххунна дур. Ца-ца чIумал махIатгалну бикIара ва ттула кьюкI хьяхьа куну кьалагаврий. Ттула итгав цитI бивкIсса вай кIива оьрчI кьабивкIссания, га Хьун неххавун хьяххантIиссияв.

АБЬШАТ. Га Хьун неххавун хьяххмигу я давраннайн кьабивунни, я алжаннуну кьабагьхьунсарча, му авлиясса пикри кьабити. Утти мугуя вил

оьрчІан чансса. Ца ттуру АхІмадлул кьудуршиву сававирай мукун аьсивсса бивкІу винма ласун дакІ цукун диянссия?

ЩАЗА. Агь, ттул аьзизсса ссу, вин кІулссания на цуксса кьуману буссарив. Буттал кьатлува лавгун махь ттул бакІрачІан кьадуркІсса оьшивуртту кьалирчІунни. Майорнал Шагьуннул хьхьичІ бавкьуну бикІавугума ттун – Магьилавхьал Щазан кьюкьала дакьаяв. Мискинсса бунугу, жул тухум уздансса, щилчІав хьхьичІ кьакьюкьайсса буссархха. (*Хьювсул бувккун.*)

Ттун ттула буттал шьравалу, нава хьунма хьусса тІюва, нину, ппу тачІав хьама битлай бакьархха. Жула Ккурккуллал шьравухсса кІичІирттува гьарца хьхьуну макІра ккаклай бур. КьютІну ниттищал хьунабакьайсса кьабивкІссания, на дардирдал хьякуну гьанссияв. Буттангу нанияр ххирасса цичІар дакьассия. Вайксса бакІрачІан бучІансса кІулссания, га буттал ххаржандалул парча-тика барчагу, буттал кьатлува кьагьантІиссияв.

АБЙШАТ. Вай жула зунттал чиваркІ ччяни кІири кьабичайсса бивкІссания, вайннал багьа бищун кьахьунссия.

ЩАЗА. Ттул ппу мукун ччяни кІири ичайссагу акьассия. Га кьини Абакархьал гьан увсса адаминал кІичІираватува халкьуннангу баллай увкусса мукьурттил ччима кІири ичин анссия. (*Цири в дакІнин багьну, чансса тяхьа бувккун.*) Ца ххирассияхха ттун кІюрххи-кьунниял буттал канийн щин дутІин, даврия увкІукун, тІясравугу бивхьуну, ганал ччанну дюхлулсса щинай шюшин. Яла шьабикІайссияв ца ссупралух. На цала чІарав шьабитайссияв. ДикІухун ххункІ бувсса чІумал дикІул хьунмур бутІагума ттунья булайсса. На бакьа ссупралух шьавагу кьаикІайссия. Укун цаннан ца ххирасса душ ва ппу цанная ца ябуцан бан цавай бучІибакьултрал мазрур савав хьусса. (*Абйшат, ванийн ттиликІну бавцІуну, аьтІий бур. Му хІисав хьуну, Щаза ццах кусса кунма шай.*) Ина хьювсул мабуккара, ссу. Вин ттуй цими хьунуккар? Кьаххирассар ттун ттуйва цими буллалаву. Ялунмагу ттул дакІ ххари хьунмур буслай булукьхьукьай ттучІан. Ина бакьассания, на ва шьраву жагь дардирдал, жагь бизаршиврул танива бивкІуну гьанссияв.

АБЙШАТ. Ттул буттангу на гьаксса ххирара, амма...

ЩАЗА. Амма цири, ттул ссу, ина бура вила буттал кьатлуву. Мискинсса унугу, вил ппугу гьаксса дакІ тІиртІусса адамина ур.

АБЙШАТ. Акьари тІий нагу бакьарахха, амма вил бакІрачІан бувкІмур ттул бакІрачІангу бучІавай бур.

ЩАЗА (*нигьавххуну*). Цукун? Му хьун бюхьайсса зад бакьассар. Ттун бакьа цаманан кьакІулнугу, ина ччима аваданмийннаясса акьар, зяту аьркин бакьасса махь кьабувккунни, яла цири зухун дахчинтІимур?

АБЙШАТ. Оьмар уссия, ва зума дугьул барз кьуртал шайхту, буттачІан мугьисалт гьан банна тІий.

ЩАЗА. Гьаксса хьинни, ттун кІулли зул кІай рязи хьунтІишиву.

АБЙШАТ. КІанаяр хьхьичІун цайми бувккунни.

ЩАЗА. Цари мий?

АБЙШАТ. Закирдул цанма була учин мугьисалт гьан бувну бия.

ЩАЗА. Яр, Закирдулния чІанма Чивимур душ виялгу оьрмулул хьунмасса бур... КІира шарссагу диркІусса, ряхцІалуния лирчусса шиннугу дусса Закирдун ина буттал булайссарав?

АБЙШАТ. Закирдул хьус дур, чІявусса ятту бур, цала зунтурду, хьуру

дур. Ттул нину ва ппугу кІайннул ххихху бивтунни. На кІанан хьурча, цичІар чанну кьабикІантІиссара, зярбухарартту лахлантІиссара тІар.

ЩАЗА (*гьалак буклай*). Туну ина рязи хьурав?

АБЙШАТ. Нания рязи кьавхьура, амма буттал уттисса хамис кьини махь кутІа бан бучІан икьрал дунни.

ЩАЗА. Ина му иш Оьмардухь бусав? КІанал ци тІива?

АБЙШАТ. Бусав. На рязи хьурча, Закаталлал чулухунмай лихьанну тІива, зунттавах хьуну. Цала думур, дакъамур дарххуну, чугума машан лавсунни. Му хавар бавну махь, авлия шавай ур. Тийх кьалайчину зузисса ссурахь уссар тІива. Тагу тийх махь нанисса инсан усса ур.

ЩАЗА. Та бачинну тІива кІанал?

АБЙШАТ. На рязи хьурча, гьархьхьунувагума ачин хІадурну ур.

ЩАЗА. Лихьу, ттул ссу, лихьу! Насу вина ххираманащал кІанал бувцу-нийн. Агь, мукун учин бакьаявкьай ттухь ттуна ччан хьуну ивкІманалгу!. На ганащал дуняллул зуманивгума гьантІиссияв. Буттал цува мулклуцІа кьааншиврул нигьа увсуна. Ччаву хьуслих дарххуна. Мьяжннугу мискинчу-внавусса виричувшиву, чумартшиву аваданчувнаву кьадикІайсса диркІун дур.

АБЙШАТ. Ниттий цІими хьанай бур, кІанил му кьюкьала кьадухІанссар.

ЩАЗА. ДухІантІиссар. Ина вина ччиманащал ливхьун гьаву – му кьюкьала дакъар. Кьюкьала дуркьай, вана ва на кунма, гьарца ссятрай мукьурттил кьюкьин буллагисса, каруннай ва ччаннай дакъасса, дакІнийгума махру дишин махьунай кьахьанахьисса ласнал хьаралу оьрму оьнин гьан буллалаву. Яла ганащал ца шанийгу уттубихьлахьаву, гьантлун шамийла ганал ччанну шюшлашаву, рахІму бакьа бишлашисса мурхьардил кьюву духІлагьаву.

АБЙШАТ. Мукун инагу кьабивтун, на тийх цукун бацІава, ттул ссу? Гьантлун цал бунугу, вичІан кьабувкІун, ттуща бацІан кьашайхха.

ЩАЗА. Ттулсса мабара, ххирасса ссу, ттулмур оьрму оьнин лавгссар. Ва ттул оьрму вин дагьанину хьун аьркинссар. Лихьу Оьмардушал, магьанбара вила жагьилсса оьрму оьнин. Ина талихІрайн буккарча, ттул кьумасса дакІчансса дунугу гьарта дукканссия.

АБЙШАТ. Хьами, ттул пикрилий, ва дуняллий муданма кьуману бикІан куну ляхьан бувну бухьунссар кІа Аллагьнал.

ЩАЗА. Аллагьнай тахсир бакьассар, ттул ссу, тахсир бусса хьамитайпалун кьявда хьусса ва заманалийри. АхІмакьсса унугу, хьус дума аькьлукар ур, аькьлукар унугу, мискинчу сан акьу ур. Лас паччахІ ур, шарсса тІурча ганал ссурмухьхьу дур... Гьу, буси, ина Оьмардушал наниссарав ягу кьананиссарав?

АБЙШАТ. Вил мукьурттил на сисин бунна. Барчаллагь вин, ттул ссу. Уттуллуи нагь дихьлай ттула ппуксса Закирдул хьаралун буххаяр, ттуна ччисса та ОьмардучІа щинахун инил кьяс бувкуну бикІанна.

ЩАЗА (хьямала багьай). Насу, ттул ссу, анавар букку! Цукун барчагу, вила пикри гьархьхьунува Оьмардун баян бува... Насу, ххуллухьин баннав, талихІрайн букканнав, кІа Зал архІалсса аьрххи хьуннав зун!

АБЙШАТ. На вичІатува лихьан бан анаваршиву цира, ссу. Уттигу та баявив кьакІулссарча, ххуллухьиндаран ттун ца балай учакай. Лажиннича, та цакьни дуссух инава кусса балай уча, циняв хьами бия а-а бавхьун ливчІун.

ЩАЗА. Вин ччай бухьурча, на га бакьа ганицІун цаймигу учиннахха. КьакІулли, ва ччергьилугу риршуну нава балай увкукун, чансса хІаллайсса дунугу дакІ гьарта дуккай. (*Балай тІий бур.*)

Була тий увкѳуна Ваччав Хьунбутта,
Булунгу бавѳуна майорнал Шагьун,
Ттунагу къакѳулсса, ѳагу къакѳулсса
ѳа чарий чичиву щюлли Ахѳмадлун.

Бувагу къабивтун, булайсса хьурча,
Кѳа Шавкѳуллал ламу арцул бакьича,
Ялагу къабивтун, булайсса хьурча,
На битан тавхана, мусил бакьича.

Аьрщи арцулъявав, къатта ччуччивул,
Кѳа Шавкѳуллал ламу арцул бавкъуна.
Чару мусильявав, вилах лещивул,
На битан тавхана мусил бавкъуна.

ѳара-ѳа дияхха, ѳа дух лагивул,
ѳаниха лавхъхъусса цува акъая,
Аваза бияхха, вилах лещивул,
Чувшиврул лишанну чурххай дакъая.

АБѳШАТ. Аман, ѳазай, къабикѳу, Ахѳмадлун баяйча, яла ина танал бива
бивѳанссара.

ѳАЗА. Бивѳарча бивѳача. На укунмагу бивкѳусса инсаннахха. *(Ялагу
балай учай.)*

Чухъаявав вил ххуйсса,
Чурх-явав вил бювхъусса,
Ттула иттатуявав
Ухьтанну ѳалачѳисса?

Хьхъувай макѳрал давлатлув,
Хияллал ттуршама чув,
Агь, вил къатта ччуччивуй,
Вил къатлул къарциншиву.

Вай шярал хъаннил махьру
Качар чурххай буня,
Жагьилсса жангу ларсун,
Ахъния ххяххавияв.

Укунма личѳанавав,
Гьуква ратѳух гъанавав,
ѳинѳаввагу къакѳулну,
Бивкѳуну лякъинавав?

*(Ванил балай къуртал байхту, сситтул ѳара-ѳарагу лавхъун, мухѳлугу
канихъну Ахѳмад уххай.)*

АХѳМАД. Къурунсагъ-я, къурунсагъ, на ина дикъаркѳуну къадитаннахха!
(ѳазайн ххяххай. Аьйшат дянив багъай.)

АБЪШАТ. АхИмад, ци тахсир хьунур ина ва бивчІантІисса? Паракъат хьу. ЧІалай ура, уттигу шярал мукъурттил уцІин увну ушивуча, паракъат хьу.

АХИМАД. Батхьу инагу хьхьичІа! (Абъшатгу чулухунмай къуч бувну, Щазахь) ДацІула, шяир, бакІрай лачакгу дакъа, кІизгу ябивхьуну, ччергъилугу хьюлчайтІи дурну, узбакІнал зумуну чурхгу лахІа-лахІан буллай, та хьатІуй циван къавтІий дуссияв?

ЩАЗА. Та хьатІуй инагу иявхха, ци ккарккуна вин ттуй биявурсса?

АХИМАД. Ухьурча на зул хьанниву уххивав, арамтуннаву ухьунссияв.

ЩАЗА. Хьанниву хьамитайпашиву дан къабучІину бивкІссарив ттун? Бухьунссияв къавтІийгу ттунма кІулсса куццуй.

АХИМАД. Къурунсагъ, на вин кІулмургу хьама битан баннахха! (*Щазайх мухІлу рицай.*) БакІ чурххая личІи даннахха!

ЩАЗА. Укун оьккисса шарсса диркІусса бунагъ винма циван ласунна, дуккан дува, къадити!

АХИМАД. На ина гьаттаву дуккан данна.

ЩАЗА. На бивкІусса захІматгу винма циван ласунна. Мьяйжаннугура тІутІисса, цІа дуги. Оьккисса шарсса ххуйсса адаминачІа къадикІайссар. Нагу инсанна, ттувугу дуссар рухІгу, ссихІгу. Уттининсса оьрмугу ттул вичІа оьнин лавгунни. ЦІа дуги бусурман зумуну. Вихун цичІар къадахчинтІиссар, оьрчІругу бувцуну, ва зул шяраватува гьанна, ххишала шихуннай бакІрагума дурган къаданна.

АХИМАД. БивчІан чІун хьувкун, шатта ххуллийх тІитІи бакъайссар, вингу ттул канища ажал бивну бунуккар. (*МухІулттух батлай ур. Абъшат га угьлай бур.*) Вана вин оьрчІру! Вана вин цІа дутаву!

ЩАЗА. Ина ришлашисса мухІулттулнияр вил мукъурттил цІун бикІан буллай бурча ттун, инава адамина ухьурча, адаминал кунна, шарсса дуккан дува, уча, шарссанил цІа дутайни, зува арамтуннал учайсса махьру. Ина къаучирча, нава учинна. Вин му къюкьала къабизанссарив?

АХИМАД (*ришлай уна*). Уча, къурунсагъ, инава уча!

ЩАЗА. АхИмад, на вихь тІий буре: «ТІалакъ, тІалакъ, тІалма тІалакъ!»

АХИМАД (*хьиннува гьалак увккун*). Ина ттул цІа дутав? Уттинин царагу хьамитайпалул къабувмургу бав?! ЦІана нагу данна вияту тІалма тІалакъ. (*Гьанай ур.*) Чув дур ттул ххаржан, чув бур ттул ттупанча?! (*Тамур къатлувун ххяххай, танал хьирив Абъшатгу лагай, тива аьлагъужалул чІу бур. Баллай бур Абъшатлул: «Паракъат хьу, сси лялиян, къатІув укку» тІисса чІу. Яла тайннал аьлагъужа къабагъай.*)

ЩАЗА (*мухІулттив цусса базурдайхгу ках тІий, аьтІий, ссинкъа тІий бур. Най дур язухьсса буттахъал макъан. Ганихун*).

**На ца шамма бавияв,
Шагьна зунтту хьячинсса,
Шагьна зунтту хьякуну,
Шархь ттурлу ча дишиви.**

**Шагьна зунттуя дирзун
Шагьурдайх нани ттурлуй,**

**Ттулгу ссалам ласаврил
Ссав ялун дагъанххивав.**

**Дардирдал кици лицІлай
ДакІнил оьнтІа цІий бури,
ХІасратрал къуру хІавчІун,
Ххютту кІюла дурккунни.**

Гъавиявхха макъ рутІин,
ЧПарах нани Хъун неххайн
На руртІу кІири мукъал
Мугъали буккан банссар.

Къявхъа тІийнмасса яру
Мукъая загъру хъуну.
На ляхъан бувсса заннал
Ттуй цІими къабишинхрав?

Укуннагу ччурччу дакІ
Ина ччуччин къадавил,

Ххувзаннал къинирдава
Вин къини чан хъунххивав?

Къуру кІигу гъан данна
Ттула дакІ нара дуллай,
Щюлли гъигу гъан данна
ТтутІахъ дакІнийсса буслай.

На балай къачайссия
Учайнай дакІмяшссияв,
Утти дардру ххи хъуну,
Ца-ца тІий цивппа бачай.

(Бивзун, чуннив бачин хІадур хъанай бур.)

ОьрчІругу хІадур бан аьркини. За бакъар, ккашил литІун къабитанна. КІа АллагъначІа цІимигу, ссавургу хъуннассар. Гъарца инсаннал къисматгу ганашал дунияллийн ляхъайссар тІар. Ва къатта ттун гъавну хъунни. Сагъну буна гъаттавуниар, бивкІуну, хІавтІливу хъиннихха. Бухъуви АллагъначІа ттунссагу, ттул оьрчІанссагу къисмат. *(Музыка лахъ хъанай бур, къатлугу цІан шай.)*

ХХЮЙЛЧИНМУР СУРАТ

ВЕДУЩИЙ.

Яс бивхъу къаттарвав шала дуниял,
Зунтгал эшкъи-ччаврих зума тІутІисса?
Гъарца мукъал кІунтІгу Щазал махъ хханссар,
Леххаву тІий, вев тІий, шийннив оьвтІисса.

Юхссагу дуниял хъатІул мажлисрив,
Бат хъусса умудру мурадрайн бивсса?
Миккугу гъарца махъ вил байт бур, Щазай,
Винма бакъа талихІ шинчІав къабивтсса.

Алши бакъуй, вингу авкку дусная
Ккарккунни тамансса лавмартшивуртту.
Цуксса авлиясса къабикІанссар чу,
Дунура, къадукан кисаран уртту?

Къуру кІинтил къини ина вай бакъин,
Нач цукун къархъуссар вил хъуна буттан?
Цуксса цІими чансса дакъар аьдатру
Цала хІави цала рикІирах бутан?

Амма цукуннугу цІуцІи дакІнищал
Ина арс увну ур къаччисса чувнан,

**Оърчал кІанттух тІурча уххайлул кІанай
Багъну бур бивщусса авлул чІу буллан.**

**Вил угъгу, вил чІугу, язугъсса махъгу
Зунттал инсантуран бавну бур чІалну...
Тти тІурча вил махъ бур итгавсса макъну,
Мурад къабуллунан ччергъилттул зйину.**

(Р. ХІамзатов)

Цуксса талихІ бакъасса биявав, ттул ссу Щазай, ина? Къавхъунни вин талихІ ласкъатлувугу. Къабунна ина мунилгу ххари. Укуннагу гъаргъсса вил дакІ хъиннура гъюжу дуккан дунни. Ссавур дува, балики уттирагу кІа бургъил гъелишиву чанссарагу вийн диян, чІирисса дунугу оърмулугу ку-клушиву хъун, оъмур хъама битансса ххуймур ялун биян. ХІайп, азарийлла хІайп му вил балай чІун дакъа бяличІарча, вил кІирисса шеърирду дакІнил хІужрардавува бугъ хъурча.

(Щаннава шай Щазал чІу.)

ЩАЗАЛ ЧІУ. Ссавур дува, Щазай, ссавур дува! Цукссара ссавурдикъай на дайсса? Ссавурданий лагавай бурхха ттул язимур оърмулул бутІа. Юх, аъркин бакъар на къюкьин банну ттуй цІими буллан. Агъалий, ттул ххирасса лакрал миллат, маласари зунма бунагъру, мабихъларду ттуй бакъурду, битияра на ттула яруннил жавгъарду кунмасса арс ва душ хъуни бан, ми мурадлайн биян бан. Ахир, зунния ттул ва ца миннат къамул бан захІмат къахъунссар... къахъунссар... къахъунссар...

(Ялу-ялун Щазал чІу арх буцлай бур.)

Сценалий чани шай. Щаза бур лухІисса гъухъуву бавцІуну.

ЩАЗА. Зун бувчІурив на цури? На Магъилавхъал Щазара, ккарксса оъшивурттал магъилийн буккан бувну, оърмулул оъшивурттал язугъсса балайлийн кІура баен бувсса. На балай кувкун, вичІи дирхъуминнал учайва: «Яраппий, вил ахир хайрданийн дукканнав, оърчал ххари баннав» куну. Къадурккуна ттул ахир хайрданийн. Ва дунияллий дуссарагу хъуснугу, чаннасса къининугу, кІира ххаришиву, кІива мурад, кІива умуд буссия: арсгу, душгу. Минналгу, ялув диширча дакъасса, ттул дардру яла къаларсуна. Ца тІутІи къуплива хъяучиннин ккуллалул бувтуна, арсгу хъхъирил оъвкъуна. Ттул дардругу гъаттал дакъа къаларсуна... Агъ, Магъилавхъал Щазай, вин ккаккайцири, вил бакІрачІан бувкІцири. Ахир, цукссава ссигу, сситарагу биявав кІа Аллагънал вийн...

Ларгунни гания махъ тамансса шинну. Аърунни ттул гъаттавусса ттаркІру, так ва дунияллий сагъна лирчІунни ттул дакІгу, бивгъусса ссихІгу, гъаваллаву сагъна дур ттул рухІгу, кІяла чІимучІалттуйн дурккун, лехлайнна. Му чІимучІалигу нара!

Уттиватти уттава бувккунни Магъилавхъал Щаза.

Щан шай.
БакІрай – мукьдархІу лачак,
БакІбахІугу – муккурдул
Таж бивхъусса шагь кунма
Най бур къурату Щаза.
Къацулуха, муриИниха
Мурмур тІутІира ккурккул,
МухІгу, чин кунма хъарай
Щазаллича бишайсса.

Цанни га, «шырал бика»,
Шяравун зана хъусса?
Заннал рищивуй куну,
Зай учара айтуха:
Багъишлагу мабари
Я бакІ, я чурх бюхтгулсса,
Ягу лахъи дардирдал
ЛухІилун лавхсса гъухъа.

Ласру бунал угь куну,
Арс унал агь учара:
Агъсса чувнал хъарала
Бувкссарча ххаллил Щаза.
Душру авдал байналгу
Дача хъхъурду утгара,
Иблис кунна, дуркІссарча
Маз бусан кІулсса Щаза.

Кьюкьин дара, рищара,
Шях яларай дакьира!..
Дурччуну махь бурганну,
ЛивчІсса ягу ливхъуну.
БивкІу-буккулдул бази
Дурссар ганил цакънийра,
Чил дакІний – цила угьгу,
Итгав – макьгу дирхъуну.

Зуриг пахру бувара,
Зярхарарду цІуссаксса:
Гъунтгий пана хъунтІиссар
Арцу-мусил пашмакьру.
Амма дакІру дуссаксса,
ДакІниву мякъ буссаксса,
ЩулаглантІиссар зумув
Щазал увкусса махьру.

Гъав цири? Щюлли данссар
Мугу тяхъасса уртгул –
Ца чапалсса мукъулли
Чаннал ххуллу бащайсса?
БакІрай – мукьдархІу лачак,
БакІвахІугу муккурдул,
Ттуршра шинал хъхъичІ кунма,
Най бур Ккурккуллал Щаза!

Баврив зун та шеъри. Та ттуха чивчусса шеърир. Цанналгу, кІинналгуриг цала шеърирдаву на уттава буккан бувсса, на хІайплувух бивхъусса? Барчаллагь зун, ттул ххирасса миллат, зу на гъаттавату бизан бунна, зула дянив щябивтунна, ттул рухІ ххари дунни. Щукру аввал ахиргу зун бувчІусса на ттула оърмулий ца мискъалукссарагу аскишиврул ттангъа къадурсса, ттула миллат кьюкьин бансса. Барчаллагь зун, ттухлу махь бувсъсса, ттул рухІ ххари дурсса Давудхъал Мирза, Амирщайххъал МахІаммад-Загъид, ХІамзатхъал Расул, Халилхъал Халил, Щурпахъал Миясат!


Хъиннува хъунмасса барчаллагь зун, Ккурккуллал шяраваллил жямат! Бутияра нагу дакІнийн хъатІай ччиргъилттухун душварал балай тІутІийнигу, хъуни хъаннил ссукІурай зума учайнигу. На даин зушал буссара... буссара...

Сценалий цІан хъанай дур, Щазал чІу ялу-ялун арх буцлай бур: «буссара... буссара... зушал буссара...»

А х и р



Сибирбаг КЪАСУМОВ



ОЪТТУГУ, МАКЪГУ

(Драма)

Ахир. Дайдихъу – 4, 5 номер «Ц1убарз»

МЯЙЛЧИНМУР СУРАТ

Яртга аревсса оьруснал къала. Къалалул лагмава бавц1уну лакрал арамтал. Чансса архну баллай бур Будугъал Мусил ч1у.

БУДУГЪАЛ МУСИ. Да-а-а, Шапи-х1ажий! На Муси ура – Будугъал Муси – вила гъанчув!..

КЪАЛАЛУВА ШАПИ-Х1АЖИНАЛ Ч1У: Ци т1ий ура?

БУДУГЪАЛ МУСИ. Тий Гъумук шархъаяту бувк1сса лакрал агъалинал бунт дурну, куннал кув лит1лай бур. Жун тайннавах х1ала буххан ччай бакъ-арича, ва къапу т1ит1а, на ттулва гъалмахтуращал вил ч1арав ац1ан увк1рача, ва къапу т1ит1а жу буххан.

ШАПИ-Х1АЖИНАЛ Ч1У: Ина щялмахъ буслай ура... Къала т1ит1ин-шиврул, на хъяври ан ччай ура.

БУДУГЪАЛ МУСИ. К1а Аллагънайн куну, хъа бишин бюхъанссар!..

ШАПИ-Х1АЖИНАЛ Ч1У: Хъа, асттавпируллагъ увкуну, къабивхъушиврий ккалли бан шайсса затри, къат1ит1инна!..

БУДУГЪАЛ МУСИ. Туну, ихтилат дан, на навалу ухханнача, цумур дунугу ца нуз т1ит1а!..

ШАПИ-Х1АЖИНАЛ Ч1У: Ина лахъхъу-цархъхъу вила ппу, ттул гъанчув Аълиша-къадинащал ттухъ бунтрал чулух ац1у т1ий бияв, утти зун цивхъуну бур?..

БУДУГЪАЛ МУСИ. Уссул-ссу куннал ку лит1лай ххал хъукун, пикри баххана хъунни!..

ШАПИ-Х1АЖИНАЛ Ч1У: Юх, аьй мадари, ттул зуйн вихшала дакъари, къала т1ит1ин къабюхъанссар!..

БУДУГЪАЛ МУСИ. Къат1ит1ирча, винма къахъинни!..

ШАПИ-ХІАЖИНАЛ ЧІУ: Хьиннугу-къахьиннугу къатІитІинна!..
БУДУГЪАЛ МУСИ. Утти туну, ява, жуйгу аьй мадари!..

Ялун дияй Патааьли ва Аьли-МахІамма бакІчисса къюкьа.

БУДУГЪАЛ МУСИ. Гьа-вала-къувват, бисмиллагьи-рахІмани рахІим!
Гьуррала лакрал виртгал, утти ккаккан бара Шапи-ХІажинан зула гьунаргу,
чувшивугу! Аллагьу акбар!

Мусьят байбишай биту-ххиту. Кув нукІува хІадур бувсса чурттурду бивхьуну, къалалул
чІирайх лахьлай, кув, чІирттая чартту буклай, къалалул чІиртту зехлай.

ПАТААЬЛИ. Да, Мусий! Будугъал Мусий, шийнай хьула ттучІанай!
БУДУГЪАЛ МУСИ. Гьа, цІанакул! *(Муси ПатааьличІан учІай.)*
ПАТААЬЛИ. Ургу кІиккун – кІай чІалли ккутІру дурив?
БУДУГЪАЛ МУСИ. Дур, хьунама... БувчІунни... ЦІанакул жува кІайннал
кІай яру личин бантІиссар.

Ххуйну ишангу ларсун, Мусил бивтуну гьан бай так ца цачІава бакьа бакьасса винтовка.

ПАТААЬЛИ. Абабай, ца хьинну хьуннича, та итгав щунуккар...

Ва аралуву, къалалувусса дуснакъ хІаятравун итххяхьхун, Саркиев ХІажи бакІчисса цап-
параннал къалалул къапу аьч бай. Аьралгу, лахІина дирхьуну, къалалувун буххай. Къалалул
къапулукІагу дариІуну, Бурхьни Аьжа цийрасса лаххиялия парчри бухьлай, ттупангиртгавун
личІин жуламиннахьхьун буллай...

БУРХЬНИ АЬЖА. Битара уссахьул!.. Битара арсрув!.. Къала лавсунма-
ри бусса!.. ЯхІ бара! Чансса ттигу яхІ бара! Битара, оьрус бухлаган бара,
букІусса кІанацІух цІу лачІивухьул! Мара уссахьул, мара! БуцІара ттупангру,
битара!..

Къала ябан къабювхьушиву бувчІукун, Шапи-ХІажи, къалалува увккун, ливхьун ачай.
Къалалул буржирая мунайн оьруснал саллатнал ттупанг битай. Шапи-хІажи агьсса хІисав
хьуну, Будугъал Муси муначІан ххяххай, ялун Аьлиша-къадигу ияй.

Шапи-ХІажинайн ттупангругу тІайла бувну, ялун бучІай НицІавкІуллал НухІ хІаласса
цаппара арамтал.

НИЦІАВКІУЛЛАЛ НУХІ. Му адамина ва усса кІанай парчари ан аьркинсса
адаминар. Вай шикку ливтІуциригу, бивщуциригу инсантал мунал цІанийри
ливтІуссагу, бивщуссагу. Букьияра микка, итияра на мунал мий ня ппив дан.

АЬЛИША. Ва укунагу башттан хьуна урхха, зу бусурмантал бакьарув?
Зу тІутІимур циру?

НИЦІАВКІУЛЛАЛ НУХІ. Вай шикку ливтІуциринавагу чІявумий бусур-
манни...

Ва ппурттуву, къалалул буржираингу лавхьун, оьвтІун икІай Патааьли.

ПАТААЬЛИ. Ххирасса, лакрал жямат! Уссурвал, ссурвал, буттахьул, ар-
срув! Оьруснал паччахІнал хІукумаггу, мунил зулмурдугу Лакку билаятрал
ялату эьки ливчшиву баян буллалиссар! Аллагьу акбар! Аллагьу акбар! Ал-
лагьу акбар! Амма ванийну жулла даву уттигу къуртал къархьуссар. Жулва
бияла жучІава цІакь хьуншиврул, жунма аьркинссар, жуласса барду увкуну,
ярагъ щяв къабивхьуну, чапуртал жулва Дагъусттаннал щалагу аьрщарая

лихъан бан. Ми лихъан баншиврулгу, жува аьркинссару, гьунттива бивзун, бачи жула члахувсса даргаллан, бачигу тихун, кураллан кумагран гъан. Жушалва архал, канил-ка дургьуну, най буссар яруссагу.

Амма, жува чапур лихъан буллаи буна, жулла ичува, Лаккуйми ишру щяв къабагъаншиврул, жунма аьркинссар хIакьину, ва кIанттурдай жулва Лакку биляятрал ханну ацIансса инсаннал ца рищун. Рязирув?

ЧIУРДУ. Рязирукъай – рязиру...

АБДУЛЛА-ХIАЖИ. Гьакссагу ххаллилсса даву хъун най дур.

КЪЯНКЪУЕВ ХIАЖИ. ЦIуллу увссара, ххаллилсса буттал хъинсса арс!

ПАТААБЛИ. Рязихъурча, зула агъалинал пикри ци буссарив бусарча ччива. Бясру-ччаллу къабуллай, куннай кув бавкъуну, ца мукъуйн бувкIун, маслихIатрай...

БУДУГЪАЛ МУСИ. Жамят! Ттун бучIирив ца-кIива махъ учин?

Лагмава чIурду гъаз шай «БучIир-бучIир», «БучIир, Мусий»,
«Уча, Мусий», «Мусил учин итияра» тIий.

ПАТААБЛИ. Ачу, Мусий, цинявннан ина увкуну ччай бурча, уча вила махъ. Гьалмахтал, тавакьюри вичIи дишаву... Муси ва жула ишираву ца яла виричувну увкмари.

БУДУГЪАЛ МУСИ (ПатаабличIан лавхъун). Гьалмахтал, на зухъ чIявусса хаварду къабусланна. Ва цIанакулсса чIумал, ттун чIалачIиссаксса, лакрал миллатрал ялув ханшиву дан бюхъайсса шама инсан ур. Ца Патаабли, ца ЖакIпар, цагу Абдулмажид. Амма мий шамагу арамтуннава ва хъуннасса даву бакIрайнгу ларсун, бакIуйнгу дуккан дурунни Патааблил. Мунияту на тIий ура, лакрал ханшиврий ацIан лайкъссар Патаабли.

Лагмава гъаз шай чIурду – Патаабли! Патаабли! Пагтаабли лайкъссар!

АБДУЛМАЖИД. Гьалмахтал! Гьалмахтал! Ттунгу бучIирив ца-кIива махъ учин?

НИЦАВКIУЛЛАЛ НУХI. БучIиркъай, Абдулмажид, вин хъхъичIва хъ-хъичI бучIир.

АБДУЛМАЖИД (*ПатаабличIан ва Будугъал МусичIан лавхъун*). Цалва-цалчин, барчаллагъ учин ччай ура Будугъал Мусихъ ханшиврий бацIанминнавух ттулассагу ца кIицI дурну тIий. КIилчингу, гьалмахтал му жува тIисса ханнал иш анжагъ цIагу рирщуну, кIисригу гъаз бувну, ханшиврий ацIаврийну къуртал къашайссар. Микку ялагу чIярусса хIакъи-хIисавртту дикIайссар. Миннуя буслай, ттун шикку лахъи лаглан ччай бакъари. Мунихлуну, ттухъ цIухлай бухъурча, ттушал маслихIат ккаклай бухъурча, на тIутIиссара цIанакул лакрал ханну ЖакIпар-баг акъа, цама итан къабучIиссар...

БУДУГЪАЛ МУСИ. Циванни къабучIисса?

АБДУЛЛА-ХIАЖИ. Циванни къабучIисса, учардухха Патаабли-баг итан аьркинссар, куну.

ПАТААБЛИ (*Абдулла-хIажинахъ*). АцIу, анавар мабукларди... Гьалмахтал, укун, тиха-шиха тIий бачирча, жушава му масала ца чулхун бутан къахъунтIиссар. Нанияра жува жулва бусурманнал аьдатрай илланул къади-нахъхъун, Аьлиша-къадилахъун махъ булунну. Мунал щил цIа увкутив, мунай бацIанну, ханшиврийгу му увчIинну – рязирув?

БАТИРХЪАЛ КАТИБ. Рязиру. Хъинну тIайласса затри...

ПАТААБЛИ. Аьлиша-къадий, тавакьюри вилва махъ учаву.

АБЛИША (кИийн ПатааблихъачІан лавхъун). Гьалмахтал! ХІакьину ва кІанттурдай тамансса ливтІуссагу хъунни, миннаярва чІявусса бившуссагу хъунни. Жулла инсаншиврул хъхъичІва-хъхъичІсса буржгу мий ливтІуналсса ва бившуналсса бавури. Амма ва хІакьинусса жулва масала ляличІисса хъинну агъамшиву дусса, миллатрал дянивсса бухъукун, Аллагъу тааълагу – жулва ялтту учІанссар тІий, ттунгу ччива ва масала анаварну ца чулухун бутан.

ХІАЖИ КЪЯНКЪУЕВ. Аькьлу бусса ихтилатри...

АБЛИША. Вай оьруснал начанникІтал битаннин, жучІава шикку уссия жуна чІявуминнан ххуйну кІулсса хан – цайнгу учайссия Агъалар-хан куну. Му адаминал уссар ца акъа-акъасса ЖахІпар-баг тІисса арс. Ттухъ цІухлай бухъурча, Агъалар-ханнал хъирив, жулва бусурманнал аьдатрай, ханшиврий икІан аьркинссар мунал арс ЖахІпар-баг.

АБДУЛЛА-ХІАЖИ. Аьлиша-къадий микку ина чансса зунххи лавгунна...

НИЦАВКІУЛЛАЛ НУХІ. Муна мукунсса буру жува, ахъ бувгъума къаивтун, бувкума бюхттул айсса...

ПАТААБЛИ. Гьалмахтал, ва кІанттурдай илланул къадинал аькьлу бусса ххуйсса махъ увкунни...

АБДУЛМАЖИД. Багъай ххулийсса – тІайласса махъ...

ПАТААБЛИ. Яла гихунмайсса ихтилатру, ттул пикрилий, бачІвасса дав-даври. Мунихлуну... Мунихлуну, гьалмахтал, лакрал агъалинан баян буллалиссар Агъалар-ханнал арс ЖахІпар-баг Лакку биляятрал ханшиврий ивтшиву. Аллагъу акбар!.. Мунал хъирив цинявннал шамила тикрал бай Аллагъу акбар, куну.

АБДУЛВАГЪАБ. Уккан ара хан жяматрал хъхъичІун.

ПАТААБЛИ. ЖахІпар-баг! Ачу, укку, халкъуннан ккаккан, халкъуннал хъхъичІун...

ЖАХІПАР-БАГ (кИийн ПатаабличІан лавхъун). Ххирасса, лакрал жямат! На хъунмасса барчаллагъ тІий ура Лакрал ханшиврийн зу ттула цІа рищаврин. Амма, зу на багъишла итияра, ттуща му захІматсса даву бакІрайн ласун къабюхъанссар...

БУДУГЪАЛ МУСИ. Муна му жан цІуллу дурссар вил!..

ХАЛЛА (шилара халкъуннава). Ттул арснан аьркинсса ханшивугу дакъассар, паччахІшивугу дакъассар. Жул му ца акъа акъасса арсри, мунал бакІрая чІара дагъансса чара бакъассар. Зула цу итайссарив итияра... Му Патаабли итияра, Аьбдулмажид итияра...

АБЛИША-КЪАДИ. Ва ччи-ччинал ччи-ччимур байсса чІун дакъари... Ва миллатрал бакІрачІан къини дурксса чІунни. Гьарца чувнал хІарачат бикІан аьркинссар му хъуннасса къини лахъан. ЦІанакул жучІара дихълахъиссар дяввилул низам. Дяввилул низамрай ва шикку халкъуннал бувсса хІукмулийнгу учайссар военно-полевое решение.

ПАТААБЛИ. Халкъуннал бувсса хІукмулийнгу, хъуниминнал бувсса пир-кІазрайнгу мютІи къахъанахъимий, дяввилул низамрай ягу га буний аьщун бизайссар, ягу, бакІру къуркъуну, къабитайссар.

ХАЛЛА. Вав-шав, тти на ци бави?.. АцІанна уча, ттул арс, ацІанна уча...

ПАТААБЛИ. Шикку ацІаннав, къаацІаннав тІий цІухлай цучІав акъассар. ЖахІпар-багнал лакрал ханшиву дан аьркинссар! Аллагъу акбар!

Цинявннал шамила тикрал бай.

КЪЯНКЪУЕВ ХІАЖИ. Ва жула бакІ къркьуну кьайтайма, ва чуври?
Чимбир чуври?

НИЦІАВКІУЛЛАЛ НУХІ. Уккан ан аьркинссар, жамятрал хьхьичІ пар-
чари ан...

ПАРАМАЗОВ ЭСА. Ца Чимбир акъача, цинявпагу штабрайцири чапуртал
буккан бан аьркинссар халкьуннал хьхьичІун.

ЖАХІПАР-ХАН. Гьалмахтал, тавакьюри кІира минутІрайсса ссагур
даву...

Кьалалул буржирай, ккуран дурну, ЖахІпар-хан, Патаабли, Аьлиша-къади, Аьббулмажид,
Будугьал Муси, цавува-цивпа цирив ца машвара щашлай буна, халкьру шила Чимбир улара,
акъахьурча Патааблил кьатрацІун цІу щунну тІий, аьлагьужа буллан бикІай. Ца лахІзалува:

БУДУГЪАЛ МУСИ. Аьбдулла-хІажИ! До, Аьбдулла-хІажИ, вихь шийн
лахьу тІий бур.

АЬБДУЛЛА-ХІАЖИ. Вассят... (Лахьай кІийн буржирайн.)

ПАТААБЛИ (чансса хІаллава халкьуннал чулухунай кІура авну). Гьал-
махтал! Гьалмахтал! Тавакьюри ца лахІзалийсса вичІи дишаву! Жула цІуну
ивтсса ханнащалгу, илланул къадинащалгу маслихІат ккавккун, восстания
сукку дурминнал чулуха баян буллалиссар. Вай хІакьину шиккун восстания
щаллу дан бувкІцири чиваркІ...

КЪЯНКЪУЕВ ХІАЖИ. Жу буру зухь Чимбир – жул душман жул хьхьичІун
уккан ара тІий!

БАТИРХЪАЛ КАТИБ. Хьинну тІайлассар, халкьуннал оь хІачІлай ивкІ-
манан судгу халкьуннал бан аьркинссар!..

АЬБДУЛМАЖИД. Да бацІиярартал, вичІи дишара!..

ПАТААБЛИ. Цинявпа жулва аьрал кІира кьюкьлуйх бавчІуну, цавай
– ВицІхьИ ва МукьархьИ, на - Патаабли ва Аьбдуллагь-хІажИ бакІчиталну,
сарану кІюрххила, цан-чаннаву буккан Цахьардан, Лавациян ва Ахьушийн
кумагран. КІилчинмур кьюкьагу АьштІи-ккуллал ва маччайннал аьралуннал
ЖахІпар-хан ва Будугьал Муси бакІчиталну, чансса махь тихун, кураллан
кумагран тІайла буккан. Цалчинмий ккаккан дурсса чІумал батІлатІиссар
ВицІхьИял кьурув, кІилчинмий Хьусращиял арив. Буккайсса кьини баян
бантІиссар.

ЩИЛЛИВ ЧІУКІА: Цал жул хьхьичІун Чимбир уккан ара!..

Бачинминнал сияхІру дуссар аьралуннал хьуниминначІа. Ци-бунугу ба-
гьана льякьуну, кьаувкІманащал кьанкьасса ххуллу ласунтІиссар.

ПАРАМАЗОВ ЭСА. Чимбир халкьуннал хьхьичІун уккан кьаувссаксса,
ца чунчІавгу ша кьаласунтІиссар!..

ШАГЪМИЛАВ ХІАЖИ. ТІайлассар, ца шагу кьаласунтІиссар.

ПАТААБЛИ. Гьалмахтал! Чимбиргу, Чимбирдул гьалмахталгу хьинну
кьюлтІсса ва вихшаласса кІанттурдай аьнт бувну буссар. Гьунттий кІюрххила
тІайла буклакиссар восстаниялул имамначІан, Ссугьрахьхьун, Шариатрал
судрал хьхьичІ бацІан.

КЪЯНКЪУЕВ ХІАЖИ. Восстаниялул имамнан бувсса мунал цичІав
бакъассар. Байсса оьбалардугу, кьюкьалардугу мунал жунни дурсса. Жун
аьркинсса имамгу, шяриаьтрал судгу бакъари, улара жул душман жухьхьун,
мунал багьайсса суд жу жува банну.

Лагмава гъаз шай чІурду. Хъинну тІайлассар. Жула душманнан суд жува бан аьркинссар!.. Улара жул душман жухъхъун!.. Уккан ара Чимбир халкъуннал хъхъичІун! Му лаивтун Патааьлил къатраву уссар!.. Цинявппа Патааьлил къатрачІан!

Халкъру, мугъали хъуну, Патааьлил къатрачІан лагай. Пардав лакъай, амма чІурду ялагу баллайнма бур...

УРЧИЛЧИНМУР СУРАТ

Ахъушав, ЧІаракІ-къадинал ичІува щябивкІун, хъамалу хъанай бур Патааьли ва Аьбдулмажид, миннашала цаппарава ахъушиял округрал наибтал.

ЧІАРАКІ-КЪАДИ. Му НакІашидзи ци миллатраясса урвав, гуржиричу ухъунссар?

ПАТААЬЛИ. Шидзи – гуржиричув акъа, цу икІанссар...

АЬБДУЛМАЖИД. Гуржиричугума га яла чІявукІулма...

ЧІАРАКІ-КЪАДИ. Му кІиниязри тІинуккар цувагу.

ПАТААЬЛИ. Тунукъай, кІинияз...

ЧІАРАКІ-КЪАДИ. Мий гуржи цивппава, цаннайн мукъа-ххюя ххяххайний, цІакъбу арамтал хъанан бикІайссар... Нигъа къабусайми хъанай.

АЬБДУЛМАЖИД. МуначІасса аьрал гуржи-азнавар бакъарихха, оьрусри.

ЧІАРАКІ-КЪАДИ. Оьрусгу мукунамассар... ЖуцІунма Аллагъналгу кабакъинхъуви...

ПАТААЬЛИ. Иншаллагъ... Жула чІарав залгу ацІантІиссар... Жулла аьрщарай, жулла тархъаншиврухлу талай буну тІий...

ЧІАРАКІ-КЪАДИ. Аьрал циксса бур муначІа? Зу мунил хъирив къалаврдув.

ПАТААЬЛИ. Бушухъ муначІа анжагъ шантуршунничІан бивсса аьскаръя бусса, утти КІапкІай-Владикавказраягу бучІан бувсса хавар бур Меликовлул.

ЧІАРАКІ-КЪАДИ. Огъо-гъо! Владикавказраягу бучІан бувну бур уча... Туну мунашалния чІявусса аьрал бухъунссар...

ПАТААЬЛИ. ЧІявусса къабикІантІиссар... Мунан Лаккуй, ЦІахъарав, Къупшав, Лаваш ва Ахъушав восстание сукку шаврия хавар бакъассар...

ЧІАРАКІ-КЪАДИ. Туну миксса аьралуннашал чунни му нанисса... Хавар бакъахъурча...

ПАТААЬЛИ. Восстание сукку хъун къаритан...

ЧІАРАКІ-КЪАДИ. Цува Меликовгуния нанисса хавар бур, мугу восстания хъун къадитаннив нанисса?

АЬБДУЛАМАЖИД. Лаккуй ва Лаваш восстания хъусса Меликовлул кІулссар.

ЧІАРАКІ-КЪАДИ. Мунахха кІулну буну... Циван буру яла къакІулссари тІий...

ПАТААЬЛИ (чІаракІ-къади таш-виш хъанахъисса бувчІуну, га сисин ан куна). Варч, минналгу бухъурча, жулвагу бурхха аьрал – га Ахъушиял бярнил лагма бавцІусса лухІи кьини аьралуннал гай вин къачІалай бурив?

ЧІАРАКІ-КЪАДИ. ЧІалай бур, амма...

ПАТААЬЛИ. Хъун бакъасса Лакрал оьнтІулнува на арул азара аьскар бувцуну увкІра, микссава кураллал чулухунмайгу тІайла буккав...

ЧІАРАКІ-КЪАДИ. Лак, мий личІсса инсанталли... Дяъвилул иширттаву хъинну чантІ увкусса халкъри...

ПАТААЪЛИ. Ахъуши-Цахъардангу чІунссар чантІ учин... Цуксса хІаллай-ру чапуртурал ххяппулу бикІан, миннал зулмурду, ябацІурду, ялурхъявурду духІлан...

ЧІАРАКІ-КЪАДИ. Нагу ура чІунни тІий, амма винмания чІалай бур шикку ишру цукун буссарив... Лак бучІарча, бавчуссару тІий, гъаз шай, оьрус бучІарча, сукку къашайссару тІий, щябикІай. Ина инава цимилчинна, хасну вай Ахъуши гъаз бан, вилва аьралуннащал шиккун учІайсса?

ПАТААЪЛИ. Шамилчин...

ЧІАРАКІ-КЪАДИ. ЦІуллу увссара – шамилчин!..

ПАТААЪЛИ. НакІашидзи ялун иярчагу тІий, хавар бакъа къабикІаншиврул, Аьбдулла-хІажикІашидзи ца дастта арамтуннал, Къуппиян кумагран, къуппаву къадитав... Рашкъухъал Аьбдулвагъаб бакІашидзи ца къюкъа аьралуннал, Цахъардал ГъазимахІаммад-хІажинащал Маммалав угъан кутишавгу тІайла дуккав...

ЧІАРАКІ-КЪАДИ. На учавхха лак – мий ляличІсса журалий чантІ увкусса халкъри...

ПАТААЪЛИ. Лахъхъу-цархъхъу восстанялул чулух бавцІумиру тІий бивкІсса Цахъар, гила Меликов ва кІия НакІашидзи нанисса баюкун, жун восстаня къачру тІий бур тІий, мува Рашкъухъал Аьбдулвагъабгу, ЧІултатациял давлатлувгу гъан бувссия... Миннащагу мютІи бан къавхъуну, кураллавун нанисса ЖакІпар-ханнан зана икІан багъунни Катиблушчал архІал КъазанийхІин Цахъарав увкІун, мий цІунилгу восстанялул чулух бацІан бан. Миннан кумагран, хъирив Аьбдулла-хІажигу тІайла уккан багъунни...

Ва ппурттуву цурич увкІун Патааьлихъхъун чагъарданул касак булай. Патааьлил чагъар цал цавува цалва буккай, яла цинявннахъ:

ВичІи дишара утти Лавашияхгу: Ккалаай. «Дикъаллайх лавай жул ялун, яни Лавашиял ялун оьруснал чІявусса аьрал най бур, агар оьруснаяр хъхъичІ зуща жучІан биян бюхъарча, жугу зул гьалмахталлу, зуяр хъхъичІ оьрус биярчагу, зугу жуй аьй мадари.»

ЧІАРАКІ-КЪАДИ. Му цу ур мукун тІутІисса?

ПАТААЪЛИ. Лавашиял къади... Ссупралуха ивзун, къуннагъ дакъин дуллан икІай.

АБДУЛМАЖИД. Жунмания анавар буккан багълай бур?..

ПАТААЪЛИ. Анавар букланссавагума пурсат бакъассар – бавчуссару.

АБДУЛМАЖИД. ЧІаракІ-къади ур аьралуннал хъунамашиву дан цал кІуну бувкссар тІий.

ПАТААЪЛИ. Ци? Ссал кІуну?

ЧІАРАКІ-КЪАДИ. Лахъхъу аьралуннал хъунаману бацІанминнал кІунурду бивчуну, ттулба кІуну ххув хъуссари...

ПАТААЪЛИ. КІунурду бичайсса, ччарду дуллалийнири. Жува буру дяъви-

лийн най. Мунихлуну аьралуннал хьунамашиву дантИссар на. Бачияра ттул хьирив. Бакъача, вай зул Ахъуши-Цахъар цивппава бувчин шайсса агьлу бакъари. Дагъусттаннай ци царал питна кИерчагу, диклул кьанкь ришлай, кункурдул лагма щябивкун, ссунтIа тИсса ччитри кунма, тийх-шийх бавцуну, буруглан бикIай.

ПАТААБЛИЛ ЧIУ. Да-а НицIавкIуллал НухI!.. КIура баен ба аьрал, бачин ба Лаващав жул хьирив.

Пардав лакъай.

АЦИЛЧИНМУР СУРАТ

Чани хьяхъа тИсса чIун.

Ахъушату най, Лаващав буххавайсса ратIнил кIану. Шикку бавцуну, Ахъушату Патааблил ва Абдулмажидлул аьрал ялун бияннин, ялугъий бур Къуппату Накашидзел аьралуннал лихъан бувсса Абдуллагъ-ХIажинал аьрал. Вайннал ялун бияй, Маммалав угъан Кутишав лавгун, тикку хьунмасса дяъвигу бувну, мува Накашидзел аьрал ялун бияннин, ттурша милицагу ясир бувну, ливхъун бувкIсса Абдулвагъаб Рашкъуевлул ва Цахъардал Гъази-МахIаммадХIажинал аьрал. Минनावухва бур НицIавкIуллал НухI, Батирхъал Катиб, Парамазов Эса, Шагъмилав ХIажи, ХIажи-Эса, ХIажи Къянкъуев.

АБДУЛЛА-ХIАЖИ. Да, НицIавкIуллал НухI, шанайвагу акъарав? Ява ша-машанарда, ва кIюрххицIун ухссавнил дяркъу дуккай чIунни.

БАТИРХЪАЛ КАТИБ. НухIлун шанавух цала ХIурубичагума макIра кка-клай буххай ура...

НУХI. Шанан ци биярч, шану бияйсса бивкIссания...

БАТИРХЪАЛ КАТИБ. Ссал пикрирдай урар?..

АБДУЛЛА-ХIАЖИ. ХIурубичал пикрирдай...

НУХI. ХIурубичания, бувцу-ххункI кунна, чунчIав къагъанссия... Ва жура дуллалисса даву бакIуйн дуркния тIий, Аллагънайн лаизлай ура... Хьурдай тIий ура та Хан-Муртазааьлигу, хIакъину ва Лавациял къурув вай кьизил-баштурайх ца маша буцин...

АБДУЛЛА-ХIАЖИ. АцIу, НицIавкIуллал НухI Муртазааьлияр ялавайсарив?..

НУХI. Укъуварч, ци тIий урача... Хан-Муртазааьлил та лухIи кьини Надиршагънал аьралуннал ТтурчIайнна зунттул ххинчурдайх ялавай къатI бувну бур. Жущава тIурча, ца НакIашидзе тИсса угърашнацIухсса бан къабювхьунни...

АБДУЛЛА-ХIАЖИ. Гъарца дяъвилул хьуннав, гъарца талатаврил хьуннав, вай чапуртурал тIийкун, цила тактика дуссар...

БАТИРХЪАЛ КАТИБ. НакIашизищал ттуп-ттупханарду, саллатI, милица – аьралуннал бала бия.

АБДУЛЛА-ХIАЖИ. Муна мунийнна нагу тактикIа тIутИсса. КIира ссятрай ялагу жущава дяъви бан бюхълай бивкIссания. Жура кIанал кIа бава лахIлахIи дантИссия.

НУХI. Пайда бакъая. Жуйва зулму хьун най бия.

БАТИРХЪАЛ КАТИБ. Зулму хьун най бия – зулму...

АБДУЛЛА-ХІАЖИ. Муна му зулму къахъунья, на жула аьрал махъунмай бишун бувсса...

НУХІ. Меликовлушал циксса аьрал бурвав?

АБДУЛЛА-ХІАЖИ. Катиб...

БАТИРХЪАЛ КАТИБ. Вичіилий ура, дус...

АБДУЛЛА-ХІАЖИ. Ца ссят му балчаннуй никъа щича, кІихунай, Ххют-ххютуллал ратІнил чулухунай, кІийх ци тагъар дурив ххал дала.

БАТИРХЪАЛ КАТИБ. Вана вассят ххал дайссар...

(Катиб лагай)

АБДУЛЛА-ХІАЖИ. Меликовлушал, НухІ, ххирама, ацІазаруннихъайн бивсса аьскарнаи хаварду буслай бур.

НУХІ. Огъо-оьо! Ми оьнкъучІул литІивухъул щича бухлаган бан шайссар... Миннан лавхъхъусса ттуп-ттупханарду, ккарабиннугу бухъунссар!..

АБДУЛЛА-ХІАЖИ. Огъо-оьо, тІий урахха, нигъа услайвагу акъарав, дус?

НУХІ. Нигъа услай акъарача, миксса аьрал тІий ура щича та бухлаган бан шайссар?..

(Ххявххун нанисса дучрал ччаннал чІурду баллан бикІай.)

АБДУЛЛА-ХІАЖИ. АцІазара ми чІявусса ххай урав? Азара инсаннал ацІ-ацІва ккулла щялу къахъунну битарча, ми бухлагайссар.

НУХІ. Гъай-гъай, жува ца-цанал ацІ-ацІва агъзиявтру битаннин, (Хъян икІай.) ми, цалва ккарабиннугу тиккунмай бивхъуну, жухва ялугълай ба-цІарча...

АБДУЛЛА-ХІАЖИ *(хъяй)*. КъабацІарча, бацІи учинну да... *(ВичІи кІюла дурну.)* Бурттигъалт нанисса чІу бурив къакІулли.

НУХІ. Ттун нукІува баллай бур.

(Тиха гъалгъа тІисса Абдулвагъаблул ва ШагъмилавхІажинал чІурду баллан бикІай.)

АБДУЛВАГЪАБЛУЛ ЧІУ: Балчан бацІан буллаи, Твурр-р... ачу, чани да-гъаннин, шивах аглан хъуннуча... Шивах жуласса аьралгу бикІан аьркинссар.

ШАГЪМИЛАВ-ХІАЖИНАЛ ЧІУ: Валлагъ, шивах цучІав усса тагъар дакъари...

Абдулла-хІажи ва НухІ, лавай бивзун, тайннал хъунин най.

АБДУЛЛА-ХІАЖИ. Да, ци дакъа хъуну, ссах луглай буру?..

АБДУЛВАГЪАБЛУЛ ЧІУ: Гъа, вайцири вай шиккува бивкІун... Ссалам аьлайкум, да, Абдулла-хІажи, чІу-чІитІ бакъархха, ина инавалу урав?

АБДУЛЛА-ХІАЖИ. Акъара, НицІавкІуллал НухІгу ур ттушал...

ШАГЪМИЛАВ-ХІАЖИНАЛ ЧІУ: *(хъяй)*. Варч НицІавкІуллал НухІрив вил щала аьрал?

Абдулла-хІажи ва НухІ сценалия бакъа шай.

АБДУЛЛА-ХІАЖИНАЛ ЧІУ: Аьрал чансса гилунмайну, неххацІ бур, бигъалаглай.

НУХІЛУЛ ЧІУ: Гъура, зун захІмат-жапа?

АБДУЛВАГЪАБЛУЛ ЧІУ: Шагъмилав-хІажий, вай дучри чансса урттул хъап учин бан хъина.

ШАГЪМИЛАВ-ХІАЖИНАЛ ЧІУ: ЦІанакул, да, Аъли-буттай, зувагу бигъа лагиярача, вай дучри шивах урттуйн итабакъияра...

Мукъагу сценалийн зана шай.

АБДУЛВАГЪАБ. Валлагъярч, НухІ, ххирама, захІмат хъуннигу, цукун учиви, къавхъуннигу цукун учиви, дяъви бур дяъви – нясив къабиву. Жуламур дяъвилул яла хъунмур захІматшиву дур, жулама цумарив, чилма цумарив – душманная дус личІи ан къабюхълахъаву.

НУХІ. Хъинну тІайлассар, цуппа муна мунил бур щала ттукку лиллай. Ва дяъви ца обруснащал цащалалу бивкІссания бигъаяхха, ахир, обруснавух жуламигу бур да, вай чапур тайпа...

АБДУЛВАГЪАБ. Маммалав тІисса чарагъатгу угъан къавхъунни... Къа-трава къатравун ухлай, цукъу-ккутІавух ливхъун, акъа хъунни...

ШАГЪМИЛАВ-ХІАЖИ. Цува талаталагу цакъсса ия, гъа-а!

АБДУЛЛА-ХІАЖИ. Цу? Чухърал Маммалав – цакъссакабай-цакъсса...

АБДУЛВАГЪАБ. Ци Маммалав тІий буру зу, талатала иякъбай ЦІахъардал НикІа-къади...

АБДУЛЛА-ХІАЖИ. АцІу, НикІа-къадигу уссияв зущал?

ШАГЪМИЛАВ-ХІАЖИ. Укъуварч, му акъассания, жул иш ххуйну къа-багъанссияча...

АБДУЛВАГЪАБ. Ца ттуршаксса милица, ярагъгу зевххуну, ясир бугъарду, утти тайннан цибанссарив къакулну буру...

Рахъ-рахъ тІий нанисса бурттигъалтрал дучрал чІурду шай. Тиха щиллив «Патааъли най» учай. Хъирив цайминналгу «Патааъли най», «Патааъли най» тІисса чІурду шай.

ПАТААЪЛИЛ ЧІУ: Аллагъу акбар!

ЧІУРДУ: Аллагъу акбар! Аллагъу акбар! Аллагъу акбар!

ПАТААЪЛИЛ ЧІУ: Аъдулла-хІажи чув ур?

ЩИЛЛИВ ЧІУ: Ми чансса гинмайну бур.

АБДУЛЛА-ХІАЖИ. Шикку ура, шикку, Патааълий!

ПАТААЪЛИЛ ЧІУ: Явара, ва балчан итамабакъару, ва лихъайсса буссар...

АБДУЛЛА-ХІАЖИ. ТІюванжари бишара, вичІания тІюванжари буссия...

Уххай Патааъли.

ПАТААЪЛИ. Ассаламу аълайкум! ТІюванжари бихълай, лахъи къалаглан-ну... Аъдулмажид чІалай акъархха, Ахъушату аьрал къабиврив?

АБДУЛВАГЪАБ. Бивунни. Аъдулмажидлул, чансса игъалаганна тІий, аьралунначІа чул бунни...

НУХІ. Ци бувсри Лавациял къадиал?

ПАТААЪЛИ. Ва хІакъинусса дяъвилул сант рутлай буссияв... Гъура, ци тІар, цума цукун буру? Кутишав ци иш хъур, Аъдулвагъаб? Ириврив Мам-малав?

АБДУЛВАГЪАБ. Маммалав къаиривунни, мунахлу ттурша милица ясир бугъарду...

ПАТААЪЛИ. Кутиши цивппа къанкъану жула чулух бияв?

АБДУЛВАГЪАБ. Кутиши жухлува бия, амма тайннал чулухссагу бухъунс-сия – Маммалавн лихъан кумаг бувунни...

ПАТААЪЛИ (Абдулла-хИажинахъ). Къуппав?.. Къуппав цакъсса талатаву хъунни тий буслай бия?..

АБДУЛЛА-ХИАЖИ. Талатаву гьакссагу цакъсса хъунни, амма Наклаши-дзилсса гужру жуярва шамли ялтгусса бия... Тайнначла ттупругу бия да... Шяравун ттупру битлан бивкIукун, зува пикри бара, халкъуннал тагъар ци дикIанссия...

Патааъли пикрирдавун лагай.

АБДУЛВАГЪАБ. Патааълий, хъунама, вай милицалтран буру цибансарив къакIулну...

ПАТААЪЛИ. Гъа, милицанан?.. Ярагъния зевххухъунссар миннаца?

АБДУЛВАГЪАБ. Ярагъ зеххардукъай...

ПАТААЪЛИ. Дяъви къуртал хъуннин, чун-бунугу ца дучрал ппалав бакъияра... Ми ца бур, жулва бусурман бушив?

АБДУЛВАГЪАБ. Жулами бур – бусурман...

ПАТААЪЛИ. Миннайн ккулла битанну тIисса къаст цурда дитияра... КIа Гъумук Чимбирдушал куннасса биявуршиву тикрал данну тIисса пикригу цуппа битияра. Царагу паччахIлугърал даптардай чивчуну бакъассар дяъ-вилий биривсса ясир, суд-диван бакъа, литIун бучIиссар, куну... Хула утти, Абдулла-хИажий, батIияра цинявппа аьрал цацIун...

АБДУЛЛА-ХИАЖИ. Вассят, хъунама... *(Лагай.)*

Уххай Батирхъал Катиб.

БАТИРХЪАЛ КАТИБ. Ассаламу аьлайкум!..

ПАТААЪЛИ. Вааьлайкуму ссалам, Катиб, ина ча занай ура, уссу?

БАТИРХЪАЛ КАТИБ. Хъунама, Ххют-ххютулла ратIух лавай, тиягу-шиягу чIявусса аьрал най бур... Жулва буссарив, оьруснал буссарив къакIулли...

НУХИ. Наклашидзил аьрал бухъунссар, МеликIовлун кумагран нанисса...

ПАТААЪЛИ *(цалва бакъашиву кIулну буна)*. Бакъари... Гай жула ЖахIпар-ханнал аьралли жунма кумагран нанисса...

Уххай Абдулла-хИажи.

АБДУЛЛА-ХИАЖИ. Хъунама, аьрал цацIун бавтIун, ялугъий бур вил амрулух!.. (Ка тIиртIуну, сценалул тамур чулухун ккаккан бай.)

ПАТААЪЛИ. Хъинни... ЦIанакул... (Ккаккан бувмур чулухунмай цаппара шаттирдугу лавсун.) Ххирасса уссурвал, зун цинявннан бавссар жулва бутгахъал, «Чариягу чув хъуннав», тIисса учала. Вана хIакъину жучIанна дуркIссар чарттаягу чув-чувтал хъун аьркинсса ва чув-чувталгу, чартту кунма, къянкъану бацIан аьркинсса къини!.. ХIакъину ва Лавациял шагърулия чансса гихуннайсса Дикъалла ар хъанахъиссар жунна гъарцагу чувнан цалла-цалла чувшиву ккаккан дан аьркинсса къириятрал майданну!.. ХIакъину Аллагъу-тааьланал жухъхъунна дуллалиссар каши, ккаккан бан мухлукъатран, жува ххаллилсса ппухълуннал чумартсса арсру бушиву!.. Дуллалиссар каши щала дунъяллул хъхъичI цал уттигу бюхттул бан жулва ххаллилсса Лакку биляят! ХIакъину жува ккаккан бан аьркинссар илланун, цуксса бюхттулну буручлай буссарув жува жулва ппухълуннал яхIгу, къириятту, чувшивугу! ДакIний битияра: хIакъину жува талатиссару жулагу, жулва ппухълунналгу, арсавралгу, хъирив ялун бучIантIиминналгу тархъаншиврухлу!.. Жулва Лакку улклул тархъаншиврухлу. Мунихлуну хIакъину жуцала архIал уссар Аллагъу! Аллагъу акбар! Аллагъу акбар! Аллагъу акбар! Утти зун ссят хъ-

инмур хьуннав! Лахъияра дучрайн, бишара зикри, ххяххияра цинявппа ттул хъирив хъхъичІунмай! Аллагъу акбар!

Лагай. Чансса хІаллава гъаз шай аьралуннал зикри бивхъуну нанисса балайлул чІу.

Зикри

**Жулла дингу, жулва асгу буруччин,
Жулва яхІгу, къириятгу дуруччин,
Бутгал ватан душманная дуруччин,
Бавчуссару гъазаватрай, я, Аллагъ!
Лаилагъа, иллаллагъу, я, Аллагъ!
Лаилагъа, иллаллагъу, я, Аллагъ!**

**Вай муруллив, ххяллу, ратІру, хъачІ-бакІру,
Вай дарарду, къанну, рахІру, майданну,
Вай зунтгурду мурдал къабан чиплагънал,
Гъазаватрай бавчуссару, я, Аллагъ!
Лаилагъа, иллаллагъу, я, Аллагъ!
Лаилагъа, иллаллагъу, я, Аллагъ!**

**Бутгахъал чувшиву чувшиврий личІан,
Ниттихъал дакІурдий вас-щах къабикІан,
Ссурваврал намусрайн ттангъа къадагъан,
Бавчуссару аьрайн аслансса виртгал,
Лаилагъа, иллаллагъу, я, Аллагъ!
Лаилагъа, иллаллагъу, я, Аллагъ!**

**Ялусса ссавнилгу заллу, я, Аллагъ!
Лувсса лухччинулгу заллу, я, Аллагъ!
Ина жухъхъун тавпикъ дула, я, Аллагъ!
Душман уний ххит уккан ан, я, Аллагъ!
Лаилагъа, иллаллагъу, я, Аллагъ!
Лаилагъа, иллаллагъу, я, Аллагъ!**

Патааьлил аьрал укун, зикри бивхъуну, гъужумрай най буна, вайннал хъ-ирив сценалийх, цалвами аьралуннал бакІ дургъуну, ачай Меликов.

МЕЛИКОВ. Учара, учара нацІликтал, балай учара!.. Учара балай, зула оьгттувун зува бахълагланнин!.. Учара балай, зулла ттаркІру зува ттихъланнин! Учара балай, Сибирнал вацІраву аьлланнин!.. Ялагу урганна на зух ци цІакъсса балайчиталгу, тур рищултгу бурув?.. Урганна ми каруннай ва ччаннай, махругу къярзатІи дурну, бачин бувсса чІумалгу! Урганна шала дагъусттаннайсса туземцынал лухІи ларххусса чІумалгу, зул къаркъаллахгу щядиркІун, зул ниттихъул, оьрчІру, хъами ва ссурвал вав-шав тІисса чІумалгу...

Мукун, куннал хъунин кув най, кІийла сценалийх лагай Патааьлил ва Меликовлул аьраллу, ахиргу шай куннийн кув, кІияй лап къызгъинсса питна.

ПАТААЬЛИЛ ЧІУ: Битара, уссурвал, ришара турду, личин дара къызил-баштурал бакІру вана ва ккуццирай – цая... кІия... шама... мукъа... ххюя... ряха... КІия-кІия, шан-шама чутну куннайн кув ттиликІну бацІияра, махъа

бувккун рикъашун. Муна мукун, НухІ! Мукун! Цуллу увссара! НухІлул ттуяр шамлий ххишаласса къатІ бувунни.

АБДУЛМАЖИДЛУЛ ЧІУ: Патааълий, ява-ява махъунай ургу!

ПАТААЪЛИЛ ЧІУ: Гъа! Вай... ВайннацІухсса жува цІанакул байссар... Ва арула... вагу... вагу... вагу мыйя!

НУХІЛУЛ ЧІУ: Уссурвал, ттул ка дацІайкун, дарцІунни.

АБДУЛМАЖИДЛУЛ ЧІУ: Ка дарцІунни тІий, ява душмантурал хъхъичІ маацІара, тийнай-шинай хъуну, игъа лагу.

АРХНИЯ МЕЛИКОВЛУЛ ЧІУ: Вторая гвардейская с левого фланга вперед! Бейте! Бейте, не щадите туземцев! Казачий отряд, - на помощь гренадерам справа марш!

ПАТААЪЛИЛ ЧІУ: Да, НицІавкІуллал НухІ, ина чув ура, ттул ка дара-дар-цІунни, шинай хъуча, ттул чІарах виλλα аьйдамирдул турлих ца ххутІала бала!

НУХІЛУЛ ЧІУ: Ва МиликІав тІисса дунгъузрацІухсса бан най ура.

Ва ппурттуву сценалийн бувккун жуламиннаясса кІия, кІисса тІивтІуну, оьруснал саллатІнан Патааъли ккаккан уллай.

- ПосматІри ттуда – вутІ там, видишь, вутІ итІа ес Патааъли, наш камандир, в нигу стрилый. ВутІ итІа уси тужи ес мужчина...

СОЛДАТ (*Патааълийн ттупанг тІайла буллай*). Хорошо, молодец, спасибо... (*Бивтун, гъан бай. Чансса хІаллава тиха Абдулвагъаблул чІу личай*):

- Патааъли увтунни! Патааъли увтунни!

КЪЯНКЪУЕВЛУЛ ЧІУ. Патааъли увтунни!.. Къисас, уссурвал, къисас! Ришара турду, ласияра къисас!

АБДУЛЛА-ХІАЖИНАЛ ЧІУ: Къисас, уссурвал, къисас! Ца-цаннал ацІ-а-цІа литІун аьркинссар!

АБДУЛМАЖИДЛУЛ ЧІУ: Ришара, уссурвал, личин дара къизилбаштурал бакІру... Ришара ца-ца зухлура, ца-ца Патааълихлу.

АБДУЛЛА-ХІАЖИНАЛ ЧІУ: Ришара, уссурвал, Патааъли акъашиву кІул мабару.

АБДУЛМАЖИДЛУЛ ЧІУ: Миккун мабатІларду, цачІун батІирча, къатІ бан бигъассар...

ХІала буххияра, тур ришара. Мугу, ца-кІиннал гъаз увну, кІинай ххул-лучІанай ишара.

Чансса хІаллава, тиха - шиха гъаз увну, лавсун бучІай Патааъли. Ялун учІай Абдулла-хІажи.

АБДУЛЛА-ХІАЖИ (*Патааълийх ках-шахгу куну*). Вания башттан хъуну ур... ХІайп! Къадавиявкъай, уссу, му лавмартшин... Цан ириян авцІура ина му лавмартсса бивкІулул ххяппурттахъхъун?.. Цан къабитав ва захІматсса къини жу жувалу... Цан ласав ина жул ялату виλλα чувшиврул нур дизлазисса чани?.. (*Патааълил хъазамраву бакІгу дирхъуну, агъи-агъи тІий, аьтІунгу ив-кІун, яла цала бакъасса ца вахІиисса чІуний*): Ча-пур-та-а-ал! Къисас! – куну, жанналия ка ларсъсса куна, ххявххун лагай.

Чансса хІаллава:

НИЦІАВКІУЛЛАЛ НУХІЛУЛ ЧІУ: Абдулла-хІажи увтунни!

ЦАЙМИГУ ЧІУРДУ: Абдулла-хІажи увтунни...

Пардав лакъай.

Ялагу тамансса хІаллай пардавлуха талатаврил чІурду баллан бикІай.

АЦИНИЯ ЦАЛЧИНМУР СУРАТ

Сценалул ца чулух, цалла хьуншивруха яласса цичIар къачIалай, генералнал лахсиламанг-таву авцIуну ур Меликов, мунал чIарав столданух щяивкIун ур мунал мирза. Чансса тинмайгу залданувун лажинну, каруннай ва ччаннай махругу дирхьуну, бавцIуну бур ЖахIпар-хан, Абдулмажид, Зубаир, Будугьал Муси, Батирхьал Катиб, НицIавкIуллал НухI, Амир Баратов, ХIажи Кьянкьуев, Малдай.

Миннаяр махь архну мукума, каруннай ва ччаннай махру дирхьуну: Шагьмилав-хIажи, Будугьал Аьлиша, ХIажи-Эса, Парамазов Эса, Абдулвагьаб, Киши Баратов, Бурхьни Аьжа, Халла, ялагу тихун-шихун кьюкьа дурну, сцена бувцIусса инсантал.

МЕЛИКОВ (*Абдулмажидлухь*). Ина паччахIнал аьралуннал хIаписар, паччахIлугърая мажиб ласласисса... Вийн хьуннасса вихшала дурну, жу ина ряхттурша аьскарнал хьунаману ИсучIайн тIайла уккарду, ина тIурча, ми ряхттуршагу аьскаргу вилва хьирив бувцуну, винма ччатI буллалисса паччахIнайнгу, паччахIнал аьралуннайнгу къарщи увккунна... Вища цукун бювхьур лавмартшинна дан?

АБДУЛМАЖИД. Цалчин, ттун ччатI я паччахIнал, я ина, я цаманал къабулайссар. На му нава лякьайссар ва мунияту вингу, вил паччахIнайнгу бутIа булайссар... КIилчингу, на дурмур, вихь цIуххирча, бюхьай лавмартшиву дикIан...

МЕЛИКОВ. Вихь цIуххирча цири му?..

АБДУЛМАЖИД. Ттухь цIуххирча, виричувшиву...

МЕЛИКОВ. Цукунсса виричувшиву?

АБДУЛМАЖИД. Миллатрайн кьини дурксса чIумал, ттуццава шайсса куццуй мунил чIарав авцIусса виричувшиву!..

МЕЛИКОВ. Мува куццуй виричувну ивчIан, ачинтIиссара тихун, Гьунив... Мирза, чича – цува аьс ан... зунттурду, хьу-лухччив, къатта-къуш зеххин! (*Кьянкьуев ХIажинах урувгун.*) Фамилия?

ХIАЖИ КЬЯНКЬУЕВ. Кьянкьуев ХIажи учайссар...

МЕЛИКОВ. Ина ци бусанна виламур «виричувшивруя»?

ХIАЖИ КЬЯНКЬУЕВ. Буслай ура Дикьалла аривсса талатавриву ца муьцIа-ххюцIалаксса оьрус бухлаган бувшиву... Бюхьлай бивкIссания, цинявппагу бухлаган бантIиссия... Кьабюхьунни...

МЕЛИКОВ. Ванияр тинмай оьруснаяту цучIав къаивчIаншиврул, инагу тихун, къарадагърайн, Гьунив... Аьс ан!.. Къатта-къушгу зеххин.

Зубаирдухь

Фамилия?

ЗУБАИР. Сурхайханов.

МЕЛИКОВ. ЦIа?

ЗУБАИР. Зубаир.

МЕЛИКОВ. Та-ак... (*канихьсса чагъарданух ургай.*) Сурхайханов Зубаир, Башир-багнал арс – Патааьли-багнал уссу... Ина бивтссияв Чимбирдуйн ттупанг?

ЗУБАИР. На бивтссия...

МЕЛИКОВ. Циван бивтссия?..

ЗУБАИР. ИвчIан...

МЕЛИКОВ. Нагу ина ивчIарча?

ЗУБАИР. ИвчIарча, ивчIа да инагу на...

МЕЛИКОВ. Яла мунийну цивхъуссар?..

ЗУБАИР. Муния цив хъуссарив бусавив?..

МЕЛИКОВ. Буси...

ЗУБАИР. Чимбир ивкIусса ттул цIа ттул миллатраву личIантIиссар хъин чулий, яни виричув хIисаврай. Ина на ивчIарча, вилмур цIа личIантIиссар оьчулий, яни оьхIачIу - зулкукар хIисаврай...

МЕЛИКОВ. Интересно... Циваннивав му мукун – вилсса хъин чулий, ттулсса оьчулий личIантIисса?..

ЗУБАИР. Цан бакъача, на Чимбир ивкIуну тIий ттулла ичIува, ттулла буттал аьрщарай, ттулагу, ттулва миллатралгу, буттал улклулгу тархъаншиврухлу, ина на ивкIлай уну тIий ттулчIан, ттул шавайн, ттул буттал аьрщарайн увкIун, оьгтухгу, хъуслихгу, хъуншиврухгу мякъсса чапхунчи, зулкукар хIисаврай...

МЕЛИКОВ (мирзанал чулухунай ивкIун). Аьс ан!..

ЖахIпар-ханнахъ

Фамилия?

ЖАХIПАР-ХАН. Сурхайханов ЖахIпар-хан...

МЕЛИКОВ (*чагъарданух урувгун*). Агълар-ханнал арс... (*Жиплува дурккун, ссятрахгу урувгун*.) Ина циксса литIав оьрус?

ЖАХIПАР-ХАН. Иривма, цаягу ххассал хъун къаитав...

МЕЛИКОВ. Иривссания, нагу ивчIантIиссияв?

ЖАХIПАР-ХАН. Ина хъхъичIа-хъхъичI ивчIантIиссия...

МЕЛИКОВ. Винма хъусса ца тIайлабацIулун ккалли ба на вихъхъун ивчIан къаиряву... Вил ппу – паччахIнал армиялул генерал Агъалар-ханнал хатиричун икъавкIуну итлатиссару. ХIисавравун ласласиссар ина ханшиврий вила хушрай къаавцIушивугу... (*Мирзанал чулийнай ивкIун*). Каторгалийн!..

Будугъал Мусихъ.

Фамилия?

БУДУГЪАЛ МУСИ. Будугъал Муси учайссар...

МЕЛИКОВ (*чагъарданух урувгун*). Ина паччахIнал ордендалун лайкъ хъусса паччахIнал аьралуннал хIаписар... ПаччахIнал конвойраву къуллугърай ивкIсса инсан, паччахIнал армиягу, му армиялул ярагъгу, гужгу винма кIулну бунува, виша цукун бювхъур, вай къаммазтуравух хIала увххун, паччахIнайн къарщину уккан?

БУДУГЪАЛ МУСИ. Господин губернатор, ми цимурца на халкъуннал бувчIин буллай уссияв. Ттух щилчIав вичIи къадирхъунни. Восстание халкъуннал дурунни...

МЕЛИКОВ. Восстание халкъуннал дурукун, ина оьруснал аьралуннал хIаписар – жучIан ливхъун цан къаувкIра?

БУДУГЪАЛ МУСИ. Му ттул намусрацIун даркъусса тIул дакъая...

МЕЛИКОВ (*мирзанал чулухунай ивкIун*).

На каторгу!..

НицIавкIуллал НухIлухъ

Фамилия?

НУХI. НицIавкIуллал НухI учайссар...

МЕЛИКОВ (*чагъарданийн урувгун*). Нух Ницовкринский... Огъо-гъо! Вил виричувшивурттая ттул чIявусса баюнни. Ина ХIажимурадлуяр ва Бюкъ МахIаммадлуяр ялттуну талай ия тIиссагума бувккунни... ТIайлану буси, циксса оьрус литIав?

НУХІ. ТтуршунначІан бивсса...

МЕЛИКОВ. Инания учин увкусса молодец ивкІун ура, гьа? Утти вин туземцынал гьарца зунттул бакІрай гьайкаллу дишинссар... Миксса обрусгу ливтІуну буна, ххув циван кьавхьура?

НУХІ. Кивайва аьрал талан бивсса чІумал, цавай ххув шайссар, гайми бух шайссар. Жу бух хьуру. Бювхьуссания, ххувгу хьунтІиссияв... Зугуния цичІар хьуннасса чувшиву дурну-за ххув кьавхьунну... Зу ххув хьунну аь-жуж-мажуж уксса чІявусса бунутІий...

МЕЛИКОВ (*мирзанал чулинай ивкІун*). Каторгалийн... аьллан!..

Амир Баратовлухь

Фамилия?

БАРАТОВ. Баратов Амир учайссар...

МЕЛИКОВ (*чагьарданух урувгун*). Гьа, Баратов, ина ци учинна?

БАРАТОВ. ЦІувххумунин жаваб дулунна.

МЕЛИКОВ. Дулунна уча...

БАРАТОВ. Дулунна.

МЕЛИКОВ. Буси туну, Стамбуллай рурцусса накьаралухун, Гьумук кьа-лалайгу, Дикьалла аривгу цукун кьавтІий уссияв?

БАРАТОВ. Ттущава шайсса куццуй, щикІру бишлай, аьйландирду буллай уссияв...

МЕЛИКОВ. Мадара хІарачат бувхьунссар, тІирхьасса за чІалай ура...

БАРАТОВ. Шаймур цичІав махьун кьабитав...

МЕЛИКОВ. Кьабитав уча... Оьрус циксса литІав?

БАРАТОВ. Ттуршлий зувиннайн иянинн ккалай уссияв. Гихуннай шутІ дяркьуна...

МЕЛИКОВ. Мяйжаннугу тІий уравкьай хьун буллай урав?

БАРАТОВ. КІа Аллагьнайн куну, хьа бан бюхьанссар...

МЕЛИКОВ (*мирзанал чулухунай ивкІун*). Аьс ан!..

Малдайхь

Фамилия?

МАЛДАЙ. Малдай учайссар...

МЕЛИКОВ (*цІунилгу, жиплува дуккан дурну, ссятрах урувгун*). Малдай... КІулли, бавссар... Инагу шийнир гилу хьинсса икІантІиссара... (*Мирзанахунай ивкІун*.) Аьс ан! (*Тива тихунай кьюкьлуй бавцІуцириннахгу урувгун*.) Гьу, цукуна?... Зула пуршругу мукьах бивщуну, щархьавух занай шийва кьахьинав, мукун, биччи бакьа та дунияллийн лагаяр? Уттигу хьунссияв обруснащал талан?

БУДУГЪАЛ МУСИ. Каруннайсса ва ччаннайсса махру дукьарча, цІана-кулгу ккаккан банну шайсса ягу кьашайсса...

МЕЛИКОВ. ДукьантІиссар вил карунная махру, ахьтта най, ца урчІва-а-цІва зурува Сибирнавун ивсса чІумал, ххуй обьрчІ куна ухьурча, ява гьа!.. Му бакьассагу, шикку цІарду увкуминнаща зехлахиссар кьатта-кьушру ва миву думур-дакьамур, зунттурду, лухччив, хьуру ва ятту-гьаттара!.. Мунищала архІал шикку цІарду кІицІ кьалавгми цинявппа бачинтІиссар Щурагьун. Щурагьун бачинминнал сияхІгу баян бантІиссар мирзанал... Аьс бан куну кІицІ лавгми, тІайла буклакиссар кьарадагьрайн Гьунив... Мунищала архІал-гу, Гьази-Гьумучи тІисса цІаницІун бавхІусса «Гьази» тІимур махь ванияр тихунай букьан буллалиссар. Битлатиссар «Гьумучи» тІиссагу, «лак» тІиссагу

махъру... Мунишала архІалгу лакраша зехлахиссар нукІувами дяъвирдаву дурсса виричувшивурттахлу буллусса кІивагу Георгиевский ттугъру, мигу тІайла буклакиссар Гъунив. ЦІанакул махъ буллалиссар мирзанахъхъун (Чагъарданух урувгун.) Шурагъун нанисса шаназарлий зувиллий кІия инсаннал цІарду кІицІ лаган, яний ца-ца тІий ялавай бачин бан.

Мирза сияхІ ккалан икІай:

1. Аблиша-къади
2. Гъарун-къади
3. Мирза-къади
4. Омардул Сулла
5. Баратхъал Киши
6. Шагъмилав ХІажи
7. Парамазхъал Эса
8. Рашкъухъал Абдулвагъаб
9. ПянтІурхъал ХІусман
10. ПянтІурхъал Абдулла-хІажи
11. Ккурккуллал Зайду
12. ХІажи-Эса
13. Аьба-баг
14. НухІ-баг
15. МахІаммад-Аблихан
16. Къячахъал Оммахан
17. Къячахъал Макъсуд

СияхІ ккалай байбивхъукун, цалнияр цал лахъ хъанай бачай музыка. Музыкалувух хІала ккала сияхІрал цІарду тІий буна, байбишай шеърилул ягу балайлул (*бунтрахасса*) ххару, хІалли-хІаллих лагъ хъанай, сияхІ ккалаккисса чІу архнивун бювкъун лагай. Шеъри къуртал шайхту – пардав.

**«Вай ци ххитри ххуллийхсса?
Вай ци халкъри нанисса?
Вай лакрал оьрчІ-виртталли,
Ссибирливппай нанисса»...**

**Дакъассар утти, лирссар
ЖахІпар-ханнал ханшиву...
Паналий дацІан дурссар
Лакку улклул цашиву...**

**Бившуссарив оьттул марч
Вай Дагъусттаннал зунттайх?
Ливкссарив лухІи бала
Лакрал мюрши шархъурдайх?**

**Тти Надир-шагъ ххяххарча,
Мюрш оьрчІай шагъкъирман дан,
Мисри турду цІайтІи дун,
Цуривав хъхъичІун уккан?**

**Лавкъуссарив абадлий
Патяли-багнал яру?
Аьрссарив муххардилу
Будугъал Мусил кару?**

**Мадатов ххявххун нарча,
КъукІма зунттул къуш бищун,
Щилли мунал цІарахъхъун
Царайну ссалам булун?**

**Аьс бувссарив шагъидтал
Гъуниннал даралуву?
Бавчуссарив гъазитал
Ссибирлив жанну дулун?**

**Цури утти хъу дугълан?
Цури тти ххалав уккан?
Щилли мактабрай оьрчІан
Али-ппи-ти лахъхъин бан?**

Арсру бакъа ниттихъул,
Уссурвал бакъа ссурвал,
Ппухълу ливтуну оърчру
Цукуни оърму бутлан?

Хъурдай, таллагъий хъурдай
Ца ттуршку хъхъича дукъан,
Къини дурксса арсаврах
Сурхай-ханнал ябитан!..

Хъурдай Муртазааъли
Патааълил ка дугъан,
Лахина дишай оърус
Лахинттайх зурчайтги бан!..

Хъурдай, Ссугърахъхун лавгун,
Хъун бутга изан уван,
Хъхъургъиял къалалуву
Бувмур тикрал бан уван!

Хайдакълив лавгун, хъурдай
Бюкъ МахIаммад учIан ан,
Ххявххун, турлих оъруснайх
Ца ххутIала бан уван.

Къабарчаллагъ ва къини
Лакрайх дуккан дурвунан,
Азардагу нааъна
Заэвной зулму байнан!..

Ав-ав учара, ссурвал,
Петербурглив бурувгун,
Оърус паччахIнал ялун
Чарттал лачIуннав куну...

Гъуя чара, ниттихъул,
Щурагъунмайгу бивкIун,
Меликовлул чIалъарду,
Обттул лияннав куну!..

Ахир



Критика ва библиография

Абдурахман Обмаршаевлун
115 шин шаверин хасну

Алексей ХИЖИЕВ

АБДУРАХИМАН ОБМАРШАЕВ

Гъашину машгърсса лакрал шаэр, чичу ва драматург Абдурахман Хасанович Обмаршаевлун (1903 – 1936) 115 шин там хъанай дур. Абдурахманнул бувтсса кутласса ва яргсса оърмулул мутталий ванаща бювхъуну бур лакрал миллатраву цалла ца абад дуван ва адабиятраву цанмалусса клану вихшалану бугъан.

1932-ку шинал бувкксса (латин хатлий) «Инкылабрал шаттирду» (Революциялул шаттирду – А.ХІ.) тлссса «лакрал адабиятрал мажмуърай» (литературалул сборник – А.ХІ.) Абдурахманнул оърмулия укун чивчуну бур: «Абдурахман Хасаннул арс Обмаршаюп увссар октябир зуруй 1903-чинмур шинал Хъурукрав, Лаккуй, саняткарнал кулпатраву. 1912-1913 шиннардий дуклай ивкссар Аьнжилий (тлссса МахЛач-Къала [орфография та чумалссар – А.ХІ.] «русско-мусульманский» учкъулалый.

1914 шинал, шамуйлчинмур адилиниялувун (отделение – А.ХІ.) увкун махъ, ппу ивкуну, дуккаву къаритан багъссар.

1915 шинал дуклай ивкссар цалла шыраватусса Чаринхъал Мухуттиннуца, мунал адабиятрах гъира бувтун, чан-чансса тлий чичлан ивкссар. Хъхъичра-хъхъич «Зурулух» тлссса назму чирчуссар 1926 шинал «Лакку балайрдал жуж» тлссса мажмуърай (хъиннува дурусну учин, валуттиран ца дур «Лакку балайрду. №1», бивичуну бур аьраб-аьжам хатлий Буйнакскалийсса «Дагълит» басмаханалий 1926-ку шинал, мужаллатрайгу чивчуну бур «Москавлийсса лакрал усттудинтьтурал ккуружукрал буккан бувссар» куну – А.ХІ.).

1928 шинал цалва назмурдал мажмуъ буккан бувссар. Мунил хъирив ца «Инкылаб» тлссса, цагу «Цу оърму» тлссса назмурдал жужру буккан бувссар цлссса алипбалий (латин хатлийри тлссса – А.ХІ.) Бикъавщусса клива тлссятлсир (пьеса – А.ХІ.): ца «Цан-чани», цагу «Маданий гъужум («Революционный штурм» - А.ХІ.)» тлссса буссар.

Цана цувагу лакрал чичултрал секциялул активнайсса чиленну уссар (шикку ихтилат 1932-ку шиналссар – А.ХІ.).

1919 шинал Абдурахман Обмаршаюп цалла ихтирданий ДеникИнхъайн къаршийсса дяъвилува ПартИзанну дяъвилыйн лавгссар. Мукуна имам Нажмуттиннул (Хуцциннал, Гоцинский – А.ХІ.) бандалушалсса,

тайннайн къаршийсса дъявилувугу талай ивкIссар пIартIизанну. Мий-ра шиннардий шыраву дуллалисса комсомолнал ва цаймий советIрал давуртгаву хIарачатну зий ивкIссар.» («Inqilabral şattirdu». Мэхэс-Qala. Daggiz. 1932ş)

Ганияр махъ АбдурахIман республикалул луттирду итабакъай идаралий редакторну зий ивкIссар, гиккугу лакку мазрайсса литература итадакъаврил даву тамансса хъхьичIуннай дурссар. Санкультштурм байбивхъусса чIумал АбдурахIман Омаршаев Дагъусттаннал Обкомрал чулуха тIайла увккун ивкIссар Гъумукун Лакрал районналий га даврил каялувшиву дуллан.

1928-ку шиная байбивхъуну 1935-ку шинайн бияннин Аь.Омаршаевлул произведениердал ацIва жуж итабавкъуссар, гайннувах «ИнкIилаб», «ЦIу оьрму», «ХIухчу Рамазан» тIисса насрулийсса бусаларду, «Ттул оьрмулул 15 шин» тIисса поэма, «БувчIусса произведениертту» ва цаймийгу. Аь.Омаршаевлул чивчуссар «Маданий гъужум» (*Культурный штурм –А.ХI.*), «Зунзулчани», «Машачи» тIисса пьесардугу. Цалва произведениердайну чичу ивкIссар захIматкаш цIу оьрмулийн кIункIу буллай.

1934-ку шинал, цалчинминнавах, Омаршаев къамул увссар СССР-данул Чичултрал союзравун. Га гьуртту хъуссар Дагъусттаннал чичултрал цалчинмур съездрал давриву.

АбдурахIманнул лакку мазрайн таржума бувссар И.Франкол, А.Пушкиннул, М.Лермонтовлул шеърирду, И.Крыловлул баснярду.

ИвкIуссар АбдурахIман Омаршаев 1936-ку шинал.

* * *

ЦIу оьрмулийн бувксса лакрал халкъуннал цимигу ник патриот зумувну тарбия хъуссар ва уттигу тарбия хъанахъиссар АбдурахIман Омаршаевлул чивчусса назмурдай, хавардай, макъалардай. «Къалам ччаллушал архIал бацIан бувсса» заманнай АбдурахIман шалва цалва чичул гуж ва пагъму революциялул ххувшаву оьрмулуву цIакъ даврин харж буллай ивкIссар, зулмулула бувксса захIматкашнан чаннайнсса ххуллу ккаккан буллалисса чирахъну ивкIссар, цIу оьрму дузал буллалисса тархъансса совет халкъ ххувшавурттая ххувшавурттайн бувцуну нанисса Лениннул – Сталиннул партиялул урчIа кану хъанахъисса агитпропрал вихшаласса ва дакI марцIсса активистну ивкIссар.

Замана баххана хъунни. Миллионнайсса совет халкъуннал захIматрай хъун дурсса, ппухълуннал гъухъ ва оь экъибувтIуну душманная ххассал дурсса, шалла дунияллун эбратну ялу-ялун кутак цIакъ дуллай нанисса «лекъакъай Союз» лавмартсса виваллил душмантурал ва буттал кIану баххайсса хаинтурал ппив-ххив дурну, дарххуну, ччанналун дуртунни. Халкъуннал ахIвал ялавай шаврицIун, ялун нанисса ник ппухълуннал тарихрая махIрум бувунни, бучIантIимуния вихшала къукьин бувунни, рувхIанийсса ххазинартту бухра лаган бувунни, хъхьичI бавцIусса аьмсса мурадру бухлавгунни, массав-мяърипат пасат хъунни, агъалий аьрххи-ххуллу чунмайрив къакIулну ливчIунни.

Ттизаманнул лахънияту ябивтукун цукун чIаларчангу, цIанакулсса жяматийсса мяърипатрал цукун къукьирчагу, лахъхъу жуйра диркIсса къинилул эмаратру хIакъину дух хъуну духъурчагу – АбдурахIманнул

ял-намусрай цукунчавсса ттангъа дакъассар. Жува циняв куна, вагу ия цалва заманалул арс. Дагъусттаннай революция цакъ дуллалиминнавухгу, социализмалул гъанурду сакин буллалиминнавухгу Абдурахман ия хъьичИмур кьукьлуву. Кьукьлул хъьичИгу – хИучИ бакъасса талаталану ва чИу бюхттулсса пропагандист-агитаторну. Балжийсса хИучардаину, бюххансса маслихатрайну, кьутИинсса сатиральнойну бувчИин булла ия ва хИкуматрал ва партиялул агъалийнал хъьичИ бивхъусса масалартту, ккаккан булла ия лавсун нанисса ххуллу, ашкара дулла ия ларсъсса ххувшавуртту, талатаву дулла ия хъуна дакълакьисса диялдакъашивуртташал. Вайнна цаппара ванал назмурду-агиткарду: «ХИуриятрал пар», «Октябрь», «Тархъан Дагъусттан», «Социализмалуха» ва м.ц.

Революциялул ххуллийх цалчинсса шаттирду ласласисса республика душмантурая дуруччин ярагъ кИунттил бувгъусса миски-гъаривнал – ЯтИул аьскарнал ва ЯтИул партизаннал яргсса суратру дурну дур Абдурахманнул «Душмантуран жаваб», «Ившу аьскар», «ЯтИул партизан» ва цаймийгу назмурдаву.

ЧантИ кусса махлукърахъ цИу оьрму дузал буллан вихшалану ххархху ларсун бачияра тИий овъчаврийсса бур ванал «ЗахИматкашнал цашив», «Жу, зузалт ва хъузалт...», «Бачира, хИалтИухъан», «Бачира колхозравун» тИисса назмурду.

ЦИумунил духмунищалсса, «чаннал цИаннащалсса» талатаву, вайннущал бавхИуну зунттал халкъуннал оьрмулуву хъанахъисса ишру балжийну ккаккан бувну бур шаэрнал «Кулакнал ва малланал маслихат», «Вих машари, мискинтал», «КИия усттар» тИисса назмурдаву. АрхИалсса ихтиярду ларсун жяматийсса ва сиясийсса иширттаву хъами хИала бухлахисса, зунттал хъаннил оьрму ва багъу-бизу мархлуцИакул баххана хъанахъисса цИушиннарду чИалачИи дансса кИанттурдугу лявкъуну бур Оьмаршаевлул творчестволуву («Къахъунна давлатлувнан», «ЧантИ кира, ссурвал», «Хъами Советраву», «Мактаб ва душру», «Мюрш душварал балай»). ЦИу оьрму дузал булла ия щиривкИусса бугъараминнащал архИал ванал ккаккан бувну бур махъун къабагъну, ппухълуннан лайкъну хъьичИунмай нанисса цИумур никирал вакилталгу («Пионертурал балай», «Комсомолнал балай», «ОьрчИахъ»). «Нину ва оьрчИ», «Къуран лахъхъин баву ва шура мактаб», «Лахъхъинну латин» тИисса назмурдаву чИалачИи бувну бур чантИ кусса зунттал халкъуннал дуккаврийсса гъира, элму лахъхъавривусса цИушиннарду, маданиятравусса хъин чулийсса дахханишивуртту, «культурный революциялул» цалчинсса хИасиллу.

Билаятрай цИу оьрму дузал булла ия щиривкИусса совет халкъуннаха лакрал литературалуву Аь.Оьмаршаевлул бувсса къуллугъ лашан бан бюхъанссар оьрус мазрайсса совет литературалуву В.Маяковскийл дурсса давриха. Тай шиннардий, гъарца ишираву кунна, литературалувугу, хаснува поэзиялувугу най диркИссар цИумунил бухмунищалсса талатаву. ЦИушиннарду хъун дулла ия бивкИссар поэзиялувугу. Дагъусттаннал мюрш миллатирттал цИусса оьрму ккаккан булла ия, Аь.Оьмаршаевлул «Ттул оьрмулул 15 шин» тИисса поэма чивчуну бур Маяковскийл зумуну «чурттурду» ишла бувну. Вайннал кИинналагу творчестволувун хъунмасса къувват нани бувсса ва шавкъ рутлатисса бакИщарацину хъанахъиссар совет билаятрахсса хъуннасса ччаву ва социализм ххув шаврийнсса хъуннасса вихшала.

Щалава революциялувун лавгсса АбдурахІманнун хъама риртун дакъар амну инсанийсса язихъусгу. ЗахІматрал агъуланухсса хъуннасса ччаврил дурцусса санна, захІматчинахасса гимн хъанай дур ванал «ХІухІалал балай». ЗахІматрах шавкъ дагъанну бувсса бусалалуву ванал магъирну дурну дур Табиатрал суратгу. Сурат даврил, учиннуча пейзажная лирикалул ляличиссава усттар, хІакъсса художник ур АбдурахІман. Ххал дара ванал дурсса, эмаратшиврул ябатІин къашайсса суратру «Гъинтнил кІюрх», «Ціуку», «Зурулух» тІисса назмурдаву. Амма ва художникгу так пейзажист акъар – ванал «Душниха» тІисса назмулувусса «портретная живопись» дур буниялара мукъурттил пилчлух аьшукънал дурсса зунтгал душнил, лакку ссурухІилул мйажаннугусса шакил.

Вана укун революциялул, дявилул, захІматрал, оьрмулул, багъу-бизулул, дух аьдатирттачалсса талатаврил, Табиатрал, эшкъи-ччаврил темардал цанма-цанмасса кІантурду бувгъуну бур Оьмаршаевлул творчестволуву. Вай лахълай буссар школардайгу, бивщуну буссар антологиялийгу, чІун-чІумуй буккайссар кказит-журналлайгу.

Амма, ттул пикрилий, чІярусса шинну хъунни ванал чичрурду буккултрачІан къадирну ва машгъурсса шаэр адабият ххираминначІа махъххуттавун агъну. АбдурахІманнул поэзиялушал кІулну бивкІминнан дакІнин бутаншиврул ва жагъилмигу кІул баншиврул, аьжамрая ва латинналия накълу бувну, буккултрал хъхъичІ бихълай ура ванал шеърирдавасса цаппара.

* * *

Революциялул душмантурахъ янсав-ккуллалух дакъассагу, къаламрагугу жаваб дуллуссар АбдурахІман Оьмаршаевлул. Ціу оьрмулул ххуллийх цалчинсса инкџилабрал шаттирду ласласисса республика душмантурая дуруччин ярагъ кІунттил бувгъусса миски-гъаривнал – ЯтІул аьскарнал, ЯтІул партизаннал, «тархъансса уздансса махлукърал» чулуха душманнахъ лайкъсса жаваб дуллай ур шаэр ва назмулуву.

ДУШМАНТУРАН ЖАВАБ

**Жу цаняв тархъансса, уздансса махлукъ
Зузалт, хъузалт, мискин, пакъиртал – цаняв,
Миллат личІий бакъа цаняв цахъушив –
Цалчинмур жавабри душмантурахъхъун.
Чийл бияла бакъа захІматрал ялув,
Цахава цивппа зий арулла ссятрай,
Бигъашиву давур захІмат бувайнан–**

**КІийлучинмур жаваб душмантурахъхъун.
Залимтал ва зулму аьршлул ххартІ бувну,
Мазлумну бивкІмийннал хІукму бувуну,
ХІакимтал ва хІукму шуралий бавур
Шамийлчинсса жаваб душмантурахъхъун.
Мактабру тІивтІуну, элму гъаз дурну,
Аьвамсса миллатру чантІ учин бувну,**

**Ккаллийбакъулт цаняв инсантал бавур
 Мукъийлчинсса жаваб душмантурахъхъун.
 ПабрикIа-завудрал даву дуз дурну,
 Хъудугъул маэшат цану жям бувну,
 Ххюра шинал палан мукъшинал давур
 Ххюйл учинмур жаваб душмантурахъхъун.
 Цаняппа агъалий ца кулпат бувну,
 Ялапаршин, оърму цакуцну бувну,
 Сациализмалул ххуллийх бачавур
 Ряххийлчинсса жаваб душмантурахъхъун.
 Динналул, давлатрал жуйнна къаст дурну,
 Жува зия буван ялун бачирча,
 МухI, къютIилу, ттупанг кIа иттавн шавур
 Арийлчинсса жаваб душмантурахъхъун.**

* * *

Революциялул цIаний талай ивкIсса, жагъилсса «шура хIукумат» (Совет хIукумат – А.ХI.) виваллил ва къатIаллил душмантурая ярагъ канихъну дуручлай ивкIсса Аь.Оьмаршаевлун шинниаргу гъанну кIулну бивкIссар ЯтIул аьскарнал нигъачIийсса ва жапасса оьрму. БивкIулул иттавн цимийлгу цува уруглай ивкIсса аьскар-шаэрнал Оьмаршаевлул усттарну аьч бувну бур талатавриву ивщусса аьскарнал дакIнивусса асарду ва назмулуву.

ИВЩУ АЬСКАР

Агъ, ттул дакIнивусса
 Дяъвилух гъира,
 ЦIуцIаву кIул къашай
 Ккулла шунугу.
 Агъ, ттул чурххирайсса
 Оьгтул шаращив,
 Щавул цIурхъхъу бакъар
 Парчри багънугу.
 Агъ, чувнал бурж лахъан
 Дяъвилийн лавгсса,
 Аслан чурх чакъалтран
 Нясив шавай бур.
 Агъ, ина ябитан
 Ва ттул хIалланих,
 Цимилул чув акъа
 Чулланий ливчIсса.
 Агъ, ттул лагма барцIру,
 Гъаваллав хъатIулт,
 Ттул рухIрах ялугъий
 БавцIуну бури.
 Ттул лагма кIутIутIи

ТIутIив ва уртту,
 Цимилулсса хъуну
 Маоьлий бури.
 Мий ссалчIав къайгъулий
 Ттул чурх бакъари,
 Талатаврих мякъну
 Гъавасрай бури.
 Тархъаншиврул душман
 Гъагъан къаувна,

 Аьрщарал канихъхъун
 Ясирну най бур.
 Гъалмахтал, аманат,
 ХIучI маучару,
 ЛитIаврил нигъ дагълай
 Махъун машару.
 Душманнащал биллай,
 Ша хъхъичIун ласлай,
 Илкиншиврул цIаний
 Жан пида дара.

* * *

«Оьрмурду гьанцІа чийха зий оьрмурду авьсса, тти цІусса дунъяллий, шурацца (советский – А.ХІ) чІумуву», цахава цивпа зий, цІулаглай, цІу оьрму дузал буллалисса, «ца кулпатрал кунма оьрму бутан» шавкьирайсса зузалтрал ва хьузалтрал цІанияту чивчуну бур АбдурахІманнул ва назмулуву.

ЖУ, ЗУЗАЛТ ВА ХЬУЗАЛТ ...

Жу, зузалт ва хьузалт,
ЗахІматрал агьлу,
Оьрму гьан чийха зий
Оьрмурду авьсса,
Тти цІусса дунъяллий,
Шурацца чІумув,
Жухава жува зий,
ЦІулаглай буру.
Зузалал кьютІилу
КьютІатІи дурну,
Хьудугьул ттарактур
Хьу гьайтІи дурну,

ТІайласса мурадсса
Ххуллу бувгьуну,
Сациализмалийн
Жу бавчуссару.
Маэшат цабанну
Зузалт-хьузалтрал,
Ца кулпатрал кунма
Оьрму бутанну,
Жулва душмантурал
Яру букканну,
ЗахІматрал виргталну
Ялапар хьунну.

* * *

ЧІумуха лавхьхьусса бур АбдурахІманнул «Кьумасса чагурт» тІисса назмулувусса бусала. ЦІусса оьрму дузал буван партиялул ва хІукуматрал бакІрайн лавсьсса, Совет обществолул хьхьичІ бивхьусса хьунисса масалартту анаварсса бушилий биттур булланшиврул аьркинну диркІссар даву талатаврил низамрай дачин дуван. Яьни, хІаллицІух, эволюционнийну дакьача, дирину, гьарца духмур ххит дуллай, хьхьичІун дагьаймунишал, данди дуккаймунишал рахІму бакьасса «синпийсса талатаву» (классовая борьба – А.ХІ) дачин дуван. КІани-кІанттурдай укунсса тагьар багьай ххуллий, тІайлану ккаклайгу диркІссар. Амма жулва кІанай, кьанатсса Лакку кІанай цІуоьрму дузал буллалисса гужирдахун бахчинсса, кьаршийну буккансса антогонист гужру кьабивкІссар. Гай аьркинну бивкІун бур бачІвасса кІанай ляхьан буван. Вана укунни дянивсса даражалулу шьраваллил захІматчитурая, хьузалтрая ва ризкьичитурая «кулактал» буллай бивкІсса.

Хьу-лухччинуха зузисса зунттал халкьуннава, гайннавухва лакравагу дахьва-дахьва личлай бивкІссар саняткартал, дахьва хІасул хьанай байбихьлай бивкІссар зузалтрал класс. Мюршсса дуссукуьатраву, фабрик-заводирттаву зун чан-чанну тІий зунттал халкьуннаягу бухлай бивкІссар зузалт. Га хІалатраву куннашал куннал душманшиврий бацІаву, антогонист зумувнусса арарду уттигу кьадиркІссар. Талатаврил низамрай давуртту цирикІин даншиврул аьркинну бивкІссар гайннал дянивугу душманшиву хІасул дан. Аьркинну бивкІссар зулмукартал ва зулмулулу ливчІми ккаккан бан. Мичча нанисса затри чагуртнал оьрмулул сурат лухІи-цІансса рангирдай ккаккан дуллалавугу. Усттарнал ва чагуртнал дянивугу дакьассагу, микку душманшиву хьун дуллалиссар гьартасса масштабрай, тІайлан-

ма учин, ялун нанисса цусса никирал ва хъхьичимур, дугъарамур никирал дяниву. Пикри бивкиссар «насу куну гъан ув» ниттихъайн нааьна дулла- лисса («...на зана икИаннин лув къалякъивуй...») оьрчIру тарбия бувансса.

Усттарная зулмукар увну, га «синпийсса душманну» (классовый враг – А.ХІ.) ккаккан уллалисса яргесса суратру дурну дуссар та чIумалсса ре- волуционер-чичултрал: Гь. Саэдовлул, С. ХIабиевлул, К. Закуевлул ва цайминналгу. Гай цивппа «захIмат пишалул агьлу» къабивкиссар, «инкби- лабрал элму» ххуйну кIулу диркIнугу, «оьрмулулми университетру» гайннал къабувкиссар. «Оьрмулул университетрал» ца лувмур хIужрар, усттаршиврийнсса ца лувмур шачIанур чагуртшивугу. Га «университетра- ву» «дурккусса» АбутIалиб Гъапууровлулгу цалва назмурдаву бившуссар усттар-чагуртшиврун къалпсса кьимат, чура-чувгу хъуна даклай диркIсса чIава жагьилтурал оьрмулувусса захIматшивурттал бакIшаращину ккак- кан дурссар усттарнал ва чагуртнал дянивусса синпийсса (классовый) дан- ди бацIаву. Энад къабивтун, бачIвасса хIучча къабувгъуну, бугъараминнал бусласаврийн бувну ва дакI тIайлану оьрмулул хIакъикъатру хIисавравун ласурчаннив, чагуртшиву – мискинсса ужагърал ахIвал ххуй бансса ца агъамсса шартIну диркIшиву мйжансса затри. Гукунсса шартIругу га чIу- мал чIярусса къадиркIсар.

«КислатIалул бугълиал, кIулшул пуркIурал» бувцIусса дуссукъат- луву чагуртнащал цачIу цивппа усттарталгур зий бивкIсса. Багъу-бизулул къянатшиврулгу, давил шартIирдал щаллу дакъашиврулгу, оьрмулуву хъанахъимунил ва ду-дакъашиврулгу щавщи цара-ца тагъарданий уст- тартурайхгур бишлай бивкIсса, яъни ххункIлихун дикI дакъамур чIумал усттарнан цаннагур къадиркIсса.

Гъаннайсса, усттар ва чагурт оьрмулул захIматшивуртту кIидачIлай бивкIссар. Цикссагу ургъил банма акъасса ятинтурая, оьрмугу лавхъхъуну, саняту кIунттил дургъуну, къянкъану ччаннай бавцIусса арантал хъуссар усттартурал къайгъу-аякъалийну.

Бюхъай на аьйкълай икIангу, амма ттун усттарная бусраврай ва барчал- лагърай гъалгъа тIисса бакъа къаккавкиссар. Халкъуннал пикри-зикрилул къакъамул дарчангу, литературалул классикалуву цIакъ хъуну дур «зулму- кар-усттарнал» щялусса сурат-сипат (образ). Чансса дакъассар тарихраву арсавран нач хъанансса ппухълуннал чирчусса чIапIивгу. Амма, шиккува учин, та заманалул хасшиннарду хIисавравун къаларсун хIакъинусса ду- цинналий пикрилул къукъаву, кьимат бищаву щалва тIайланугу къахъунс- сар. АьбдурахIман Оьмаршаевгу, туну, ивкIссар цалва заманалул арс. Вана заманалул тIалавшиннардай усттарну дурсса суратгу:

КЪУМАССА ЧАГУРТ

**Агъ, оьттун лийивуй,
Ттул чIава оьрмуй,
ЧIаракIуннил кунма
Къавкъун нанисса.
Къавкъсса ччатI щинахун,
ДикI дакъасса ххункI,**

**Усттарнах уруглай
Нигъай букайсса.
Насу куну гъан ув
Ттул хъунна бава,
На зана икIаннин
Лув къалякъивуй.**

Зана хьун шайссарив
Чун дуранува,
Шанна шин икьралну
Гьан увну уна.
Ттул къатта ччуччивуй,
Ччуччавай бурхха,
Чун дияннин яру
Буккавай бурхха.
КислатIалул бугьлил,
КIулщул пуркIурал,
Ттул сагьсса дикIул дакI
Сакъат дуннихха.
Ххяк-ххюк тIий, ссуку тIий,
Хьхьу, кьини дакъа,

Чурх бяхълай, зурзу тIий,
Янна-ус дакъа,
Устгарнан хьус хьуннин,
Яру буччиннин,
Навама гьаттаву
Уччинссарахха.
Аман иян хьурдай
Лявхьу шяравун,
Уччиннин ябитан
Щюллисса къурувх.
Лелуххи уния
Леххан хьа дусса,
Гьава бан, ххассал хьун
Дуссукъатлуца.

* * *

«Оьрму – кьаршийшиннардал талатавур» тIисса диалектикалул кьанун цалла зумувну иширайну дачин дурсса «инкьилабчитуран» ччай бивкIс-сар щаращисса оьрму дуз буван, оьрмулул гьар мурцIу-ккутIувгу талатаву дачин дуван. Ялунгу гужлан дуллаи бивкIссар ппухьруннал ва арсаврал дандилугьру (противостояние), оьлукьин дуллаи бивкIссар ппухьруннал ва арсаврал жяматийсса тагьар, муданнасса «проблема отцов и детей». Дух аьдатиртташал ва бухсса пикрирдащалсса цIушинначитурал талата-ву оьрчIру нитти-буттайн кьарший буккавуну ккаккан дуллаи бивкIссар. ЦIусса оьрму дуз буллалисса билаятрай нину ва оьрчI ца пикрилийн къаб-учIаву ккаккан буллалисса бур назмулуву вайннал дяниву хьусса ихтилат.

НИНУ ВА ОЬРЧИ

ОьрчI:
Дадай, аьчIа дирхьунни
ХIакьину бюхттулния,
Цанявппа мюрщи оьрчIру
Мактабравн чичара тIий.

ДукIувавагу ина
Дуклан къаавкъуннача,
Лажинни, дачу гьунтгий
На мактабравун чичин.

Дадай, на чичин увкун
Ина ттун ци ласунна,
Аьйшахьал Суллан кунма
Сумкка, ттитрат ласуннав?

Мяммаингу чагьар чича
На дуклай ур увкуну,

Ранг-рангсса ккарандашру,
Ппирурду гьан ба куну.

Ца ххуй бизайхха, дадай,
Ттун мактабраву оьрчIру,
Усттуллайгу щябивкIун
Дарс дуклакисса чIумал!

Нину:
Цибанна, дадал, мактаб,
Гьашинусса ссавур да,
Кьуран лахьхьин увана
Мактабравн уххайссарив?

Кьуран ва иман, ислам –
Мий лахьхьин хIарачат ба,
Яла ялун ялунчIин
Акьинна мактабравун.

ОбрчI:
Дадай, цитIссаракъай,
Лажинни къаакъиннав,
МахIмудхъал АхIмадгума
Чичин увну ияхха?!

Нину:
Гъай, инай, къанч лахъхъивуй,
Мунтаний-я мунтаний,

Къуран дакIнив татаннин
ТIутIсса махъру ххал а!

Вил ппу дуклай ивкIссарив?
Дуклакимий къаличIан,
Ххишала мукун тIурча
Чагуртшиврий гъан анна.

... Гъай-гъай, цумурцагу цIушиннарду циняв агъалийнал хIурматрай къамул дуллалисса тагъар чувчIаврагу къадикIайссар, цIумунил бухмуни-шалсса талатаву – ва оърмулулла тIабиатри. Шикку ккаккан бувсса ишру-гу цIубутIуй хъуна дакълай диркIсса дахчичрурдур. «Ххишала мукун тIурча чагуртшиврий гъан анна» тIисса гъужумгу – «къуран дакIнив татаннин» ниттихъ «мактабравун чичин» дачу тIисса «мунтанийнавун» нигъ дутанс-са, «вилаххав душмантурайн», «зулмукар-усттартурайнсса» зид цIусса ни-кираву цIакъ буллалисса давур. ЦIусса ник тарбия дувултрал цIаниятур «Зу учара, обрчIрув» тIисса назмулуву АбдурахIман «...анурайн (ОНО-райн, Отдел Народного Образования – А.ХI.) лавгун ... аърз бан» маслихIат ккаклакисса чIава павликморозовтурахъ.

ЗУ УЧАРА, ОБРЧIРУВ ...

**Зу учара, обрчIрув,
Ниттихъ ва бутгахъ
Зу дуклан мактабравн
Гъан бара куну,
Зулва кунма оърму
Аьдада къагъан
Инсантал бан элму
Дуккин ба куну.**

**Къуран лахъхъира тIий,
Чагурт анна тIий,
Зунна нигъ дулларча
Мийннахъ учара:
Мюрщи обрчIал къайим,
Анурайн лавгун,
Дуккин къабитаврил
Аърз банну куну.**

* * *

ЦIумур ххуйну ккаккан даншиврул духмур аски дуллалисса тIул-тIа-биат цIанагу дур жулва халкъуннаву. Укунсса тагъар ккаккан дуллаи дур АбдурахIманнул «Къуран лахъхъин баву ва шура мактаб» тIисса («шура мактаб» – совет школа. – А.ХI.). назмулувугу. Шикку ляличIину «чIюлу» дурсса суратрайну, дусса куццуйнир оькки чулийсса тагъар ккаккан дав-рийну, нажагъ хъуна дакълай диркIсса диялдакъашивуртту аьмну цIакъ хъусса низам кунна чIалачIи даврийну аьч дурну дур та чIумалсса дин-ис-ламрал ва элму лахъхъаврил чулухуннайсса идеологийсса бургаву. Абду-рахIманнул поэзиялуву назмурдал ххуттардийну чивчусса вай асарду бур оърмулул цилвава проза. ЦIанасса заманалул баххана хъусса пикри-зикри-лул лахънияту буруганшиврул, ваца тарихравун аърххи бувсса кунма лавг заманнул сурат хъхъичI дацIан даншиврул буккинну ва назмулул ххаругу.

КЪУРАН ЛАХЪХЪИН БАВУ
ВА ШУРА МАКТАБ

ОърчІру, зу пикри бара,
Гъарманал вивн бутира,
Къуран лахъхъин баврия
Ци мюнпатрив ххал бара.
Нитти-буттал ухъурчан
Цала ца чІивисса оърчІ,
Ххюра шин таман шайхту,
Къуранналий итавай.
ХъхъичІва хъхъичІ нани къини
Гъилисса дукрардашал,
ДикІул ччанну архІалну
ИтайначІан лагавай,
Ца къуран байбивхъувкун
Ганил цІагу лархІуну,
«Насилун», «палакъилун»,
«Къулгъулунсса» учавай,
«Аьммалун» аьммалулсса,
Жужрал бакІрах ганилсса,
«ХІаминтран», «ясинналун»
Ккурч-пулаврду дан авай,
ОърчІал къуран лавхъхъувкун,
Нину-ппу ххарил лехлай,
Лохъхъин бувманан цалла
Думур дулун биявай.
Му лахъхъин буву цува
Ци инсаннив учирча –
Я хъуннархъусса къари,
Ягу мудун ва дивир.
Циннарагу дакъасса
Къарил тарбиялухун,
Мизит бакъа къаккавксса
Мудуннахун бичавай.
Тахталул ултгуйн увтун
«Алип-би-ти-си-дал» тІий,
ОърчІал рухІ ва ссихІ дуклай,
Азарийлва чин буллай.
«Алип»-лул ялув «А» тІий,
«Би»-лул хъхъичІния «Бу» тІий,
«Дал»-луй чІурчІав дан уллай,
ОърчІан аькъува дуллай.
Му лахълахъимунишал
Тарбиямур цир чирча –

Тартала кунасса оърчІ
Ттуршалух уккан авай.
КъутІайсса ццуцул щяпа,
ХъхъичІун хъат дугъан увну,
Мюрщисса витІянхъиртту
Оьттул шавари давай.
Ххюрхху увну увцуну,
ЦІансса ппалавн авкъуну,
«Сухасулуй, уки!» тІий,
Ццахханнарал хъун авай.
Миккува кару-ччаннай
ТІаннул къатІа бивхъуну,
ОърчІ мййжанну вих увну,
Нигъал цІуцІаврил шавай.
МарцІшивурич учирча –
Муния хъинну архсса,
Къатлуву луххал ттурлу,
ОърчІ цумарив къаувчІлай.
Му къияма къинилул
Мурад мийннахъ цІуххирча –
Мунийну бусурманшив
ОърчІаву личІанни тІар.
Вана вари щалвава
Къуран лахъхъаврил мурад,
Дуклакимурич къабувчІлай
Ризкъи куна «вя» тІисса.
Тти мактабралмуниху
Ца чансса пикри бувну,
Мунил чанна ххуллуя
Ша жард чин мабитару.
Зун мактабрал чІун шайхту,
Му оьрмулийн бияйхту,
ТІивтІуну хІадурну бур
Мактабирттал ххуллурду.
Муаьллим арцух акъар,
Луттирду зун гъуква бур,
Зува дуллан бучІарча
Аьркинмур укунна дур.
МарцІсса, чаннасса къатта,
ЩябикІансса усттуллу,
Рикъащайсса муаьллим
Дарс дишин хІадурну ур.

**Жагърапия ва хІисав,
Сиясат, ижтимааът,
Инсаншиврун аьркинсса
Дунияллул дарсру дур.
Марці-чапалшив кІул даву,
Цуллишив дуруччаву,
Маэшатран аьркинмур
Миву лахъхьин буллай бур.**

**ОьрчІрув, хІадурну бури,
Шурарал мактабиртту,
Ххуллурдугу тІивтІуну
Зу дарсирайн бучІаннин.
Ласияра луттирду,
ДахІияра мюрш кьюкьри,
Бачияра мактабрайн
Муаьллим оьвтІий урча.**

* * *

«Маданий инкѳилабрал» (культурная революция – А.ХІ.) ххуллийх ххархху ларсун нанисса совет халкъуннайн, вайннал цІусса никирайн оьвчаву дуллай ур шаэр «Лохъхьинну латин» тІисса назмулуву. Шикку АьбдурахІманнуву мяълунну чІалай дур «инкѳилабрал чавшнал» (глашатай революции – А.ХІ.) сипат. Шаэр гьалгъа тІий ур аьжамраяту латин хатІлийн бучІансса давурттаха зузисса чялиштурал (активистътал) зумату. Кьулагъас дурну бувккунан ххуттардил лях чивчуну чІалантІиссар ва давриву жулла маданиятран, тарихран биян бувсса хІат-хІисав дан къашайсса зараллания. Циксса багъа бищун къашайсса эмаратру бат хьухьунссарив къавтІирдал цІараву ва «чара гьаврдаву»? АбутІалиблуд къачирчагу, вана укунсса ттупанчарду лавгмунийн битлайнутІийри ялун нанимунил жуйнма уттива ттупру битлатисса. Чанссавагу жулва бияла бучІантІимунийн бухьурчагу, лавгмур жуцава баххана бан къашай, хьама битавугу мудан хайрданунсса къадикІай. ТІитІинну, дакІнийн бутаншиврул, тарихрал ца чІапІи уттигу.

ЛАХЪХЬИННУ ЛАТИН

**ЗинкІлил къалан, кьуран
Суйхун бутанну,
Луттирдащал сумкка
Хъарайх бутанну.
Кьуран бишай къари
Къазразан хьунну
Мактабрал къапулийн
Цаняв батІинну.
Аьраб алиппити
ХІатгаллийн лавсун,
Гай буклай бивкІмийннал
Гьаттав бишинну.**

**Цанявппа луттирдал
Чара гьав дурну,
Дайдишай улттуя
КІялабарз банну.
Лениннул дирхьу дарс
ДакІних лахъхьинну,
Ганал ххуллийх хьалтлий
ХьхьичІунмай гьанну.
Элмулуд ардарав
Цаняв жям хьуну,
Латин хатІлил байран
Ххарину данну.**

* * *

Аь.Оьмаршаевлул щалла творчество дархІуну дур билаятрай хьанахьисса дахханашивурттащал. Цалва назмурдаву ва ккаккан буллай ур цІанну ливчІсса зунттал халкъуннал багъу-бизу, захІматкашнайн оьвтІий ур цІусса оьрму дузал буллай, чялишну гьуртту хьира тІий. Цу оьрмулуцІун даркъусса цІусса никирал инсантурал сипатру ккаккан дурну дур шаэрнал

«Сакинат Советраву», «Заводравусса зунттал шарсса», «Студент душ», «Тарбия бара оьрчІру» тІисса назмурдаву. Вай назмурдаву автор хъуннасса къулагъас дуллау ур жагъилсса ник элму дурккуну ва захІмат ххирану тарбия баврих, «дуккаву ва давурттив/ архІалла дачин дурну/ захІмат ва элму кІулсса/ инсантал бан аьркинссар» тІий ур.

Мюрщиминнахъ насихІат буслай ур АьбурахІман «ОьрчІахъ» тІисса назмулуву. Ваца дуклаки оьрчІал кьинилул низам чирчусса инструкци-ялуха, расписаниелуха лащай ва назму. Чумул дух къадайсса тарбиялул дарсру ласун бучІир шива хІакьину «элмулул чару цавцІлацІисса» мюр-щултрангу.

ОЬРЧІАХЪ

ОьрчІ, кІюрххила изайх,
Лажин дилусса,
Янна-ус шутккалух
МарцІ дурну лаххи.
Мунир чансса хъхьчІ,
Чурх аьчух буван,
ТтурникІрай укунна
Пизккултура да.
Базу тІитІин бувну,
Дукан иштахІну,
КІийлучин шяивкІун
КІюрххилсса дуки.
Дукрагу дуркуну,
ЧІалгу къавхъуну,
Аьркинмургу ларсун
Мактабрайн насу.
Дарсирайсса чІумал,
Чийщал къаиллай,
НахІуну вивн руртун
Дарс лахъхьинмур ба.

Шавай зана шайхту,
Дукра дукайхту,
Бигъасса къатлул дай
Даврин кумаг ба.
Яла игъа лавгун,
Чансса аьлавхъун,
Вихъра дирхъу дарсру
Дуклай тикрал да.
Хъхъу дуркІун, цІан лакъайх,
Гъанттайн за дукайх,
Ссят мьянний-урчІунний
Уттугу ихъу.
Къатлул гъава марцІ ба,
Шану кІутІу ба,
БакІ чІалай, чурх кІучІну
Шанавун насу.
КІюрххил ччяни ивзун,
ХъхьчІ кьини куна,
Винна дан аьркинмур
Цаняр тамам да.

* * *

«Шинал чІунну» тІисса назмулуву ляличІину яргну аьч хъанай дур АьбурахІманнул гьунарданул ца цамургу тІиму. Шаэрнаща бювхъуну бур шинаву хъанакъисса тІабиаьтрал дахханашивуртту ва инсаннал дулла-лисса маэшатрал давуртту цачІу дишин, тІабиаьтрал ва инсаннал дахІаву яргну ккаккан дан. Ванал шяирнал къаламрах усттарну дурну дур щал-лу-ккурккисса шинал тІабиаьтрал сурат. Мукъва бутІуя сакин хъусса ва су-ратраву саргъунну, цаннил хъирив ца тІитІлатІисса рузламалул (календарь) чІапІив кунна дирхъуну дур тІабиаьтрал чІуннардил мукъра сурат. Гъарца суратгу – цирда-цирдалу дузалсса ва щаллусса.

ШИНАЛ ЧІУННУ

Интнил урттул мархри
Цулаган байссар,
МикІлачІру, марххалтту
Бассан бувайссар,
Мурхьру, тІутІул щяпри
Кьупай бичайссар,
Инсантал ва ризкьи
КьатІувн буккайссар.
Гьинттул гьарал ларчІун
Гьили дагьайссар,
Маршри, кьур, зунтту, хьачІ
Щюлли лагайссар,
ТІутІив хьяувкуну,
Ахьулери дирну,
Лелуххал макьантрал
Гьава буцайссар.

Сеутнил марч бившуну,
Гьава бякьайссар,
ЧапІив, хьахьи лавгун,
КьатІ тІун бикІайссар,
Дуканмур ичІуннай,
Шардай духхайссар,
Гьарца рухІ ватаннай
КІура даяйссар.
КІинттул, дяркьу хьуну,
Марххалтту байссар,
Цимурца микІ ларчІун,
Чарийн дуккайссар,
Дуниял гьапІ куну
Щалла лакьайссар,
Ялугьий инттунин
Мукун бикІайссар.

* * *

«Гьинтнил кІюрх» тІисса Аь.Оьмаршаевлул назмулул ххару ккалак-
кимагу, шугьлурдал хьаттирдай шаэрначІан ивну, тІабиабт чантІ тІисса ка-
раматсса лахІзалул барану хьанай ур. Ва дур шаэрнал цалва буттал улклюя
дурсса сурат. Амма цума-цагу ккалаккисса зунтталчув хІайран уллай ур,
гьарнал хьхьичІ дацІан дуллай дур хасну цалламур «чІири ватан», цалла-
мур буттал шяравалу, цаллами оьрчІшиврул макьантру ва цалвами жегь-
ирххуллурду. Мьяйжаннугу, гьарнал дакІнивун ликьаххайсса мякь ва бай-
гьин кьашайсса гьавас бутлатисса дур АьбдурахІманнул дурсса гьинтнил
кІюрхнил караматсса сурат.

ГЬИНТНИЛ КІЮРХ

Дия гьинтнил кьини,
ТІааьн кІюрхнил чІун.
Баргь бакІух бунува
ТІинтту пар-пар тІий
Бюхттулмий бизанттайх
Мусийл ранг риртун
Ххют дуний щюлли кавс
Хьхьемал цІай-цІай тІий.
Бия дюхрул дахьва
Янусса гьава,
Бургьил хьхьичІ илчину
Икрамрай бувкІсса
Хьхьурай гьалак дурксса
Неххал ххавтІи чІу
Арх буллай, гьан буллай,
Лагь буллалисса.

Лелуххант лахь хьанай,
Лехлай ххарину,
Бургьихгу бурувгун
Бигьлай гьирану,
Уртту, тІутІив, мурхьру
ЛахІлай, хьюлчай тІий,
Хьхьунил гьапулшиву
КІутІу-кьатІ дуллай.
Оьл-ницал, ттукку-чал,
Цаняв ризкьилул
Гьарца цилва мазрай
Ссаламру буллай,
Цаняв гьущу-щулгьи
ЧІиртта-ккутІава
КьатІувппай ппив хьуну
Лукьмалул хьирив.

Инсантал-захІматкаш
Шания бивзун,
Цумаца цалагай
Даврих машгълуну,
ХІазрайсса гъаварал
Къункъайн ссунтІа тІий,
Тяхъану хъай-пишлий
Гъайтлий зий бия.
Къужри баркъут лавххун,
КкурчІав щябивкІун,
Къарихъл мюрш оърчІру
Бувцуну бия.

ЗахІмат къабуваймий
Шанул кІу бувну,
Мукусса кІюрхния
МахІрумну бия.
Агъ, на хІайран хъунна
Авчи укуна,
Жайраннуйн ящуну
Ялугъий ливчІсса.
Хъхъувайя кІюрххилнин
Шану къабияй
ХІазрайсса гъаварал
Ав бан дакІнийну.

* * *

АбдурахІман Омаршаевлул поэзиялуву хасъсса кІану бугълай бур эшкьї-ччаврихасса шеърирдал. ЛяличІисса, цайминнащал бяйкъакъинсса бур ванал ччаврил къаламрал хатІ.

Лавайсса, так бюхттулсса поэзиялун лайкъсса даражалий ккаккан дурну дур душнил ва оърчІал ччаву Аб.Омаршаевлул цалва назмурдаву. КуртІсса асардай пасихІну ккаккан дурну дур ванал ччиссаннуяту личІи шавугума. «Барчаллагъ» тІисса назмулуву шаэр чичлай ур:

Барчаллагъ, ххуйсса тІутІий,
Ялумагъра ина ттух,
ЛухІи тІутІул иттату
КІири макъ нани дурну.
Барчаллагъ, хъункІултІутІий,
Хъл личІа ина ттуя,
Иттату нани мукъал
КІяла гъухъа аьяннин.

Барчаллагъ, ттул ххира дус,
Ка ласи ина ттуя,
ЦІу майлул кІяла хъазам
Бавссуну экъи гъаннин.
Барчаллагъ, ттул дакІнил дус,
Къаккакканссара янин,
Чинарданул мурхъ кунма
Къавкъун гъюжу букканнин
<...>

Оьсса къисматрал ччиссаннуя личІи увсса, гания «архун ливчІсса» лирикий герой, ялагу вихшалларай ур «ччаврил шаммарду бусса эшкьїлул чагъарданух»:

<...>

Барчаллагъ, ттул чІантІив ххуй,
Чича эшкьїлул чагъар,
Архун лавгсса дусначІан
Ччаврил шаммарду бусса.

<...>

Ччиссаннул сурат дуваншиврул шаэр ляхълай ур яла ххуй-ххуйми лащанбавуртту. Шикку дурсса лащанбавурттал чарсса «нузручІи – хъункІултІутІи – булбул – чаннацІуку» тІайланна супий шеърирдава ларсъсса хханссар.

<...>

Барчаллагъ, ттул нузручІий,
Хъяувку хъункІултІутІий,

**Ина, ххал къашайнугу,
ДакІния къалагара.
<...>
Барчаллагь, пасихІ булбул,
Балайчитурал паччахІ,
ДакІнийн къувтІуну ура**

**Ина дуцай макъантру.
Барчаллагь, чаннаЦукуй,
ЛипІ куну левххун гъайсса,
Вил симан пар ку яру
ХьюхьутІи бувну ура.**

* * *

«Душниха» тІисса назмулугу Аь.Оьмаршаевлул дурсса ччиссаннул сурат дур буниядасса «портретная живопись», мукъурттил пилчлук хІакъсса художникнал дурсса зунттал душнил, лакку ссурухІилул мййжаннугусса шакил. Шиву хІала бувххун бур аьшукънал ва рассамнал (художникнал) пагьмурду. Цума-цанналгу дакІнивусса къюлтІсса асардал синттава тІааьнсса эшкбилул макъан личин дуллалисса бур аьчухну, аьшукънал зумувну дуллалисса, ттюнгану-интимсса мукІрушиннарду.

ЧІярур назмулугу чІюлусса эпитетру ва аьжаивсса лашанбавуртту («журужанттул щинан лавхъхьусса кІиз», «бургъил куннасса нур рирт симан», «ятІул-кІяласса, оьтту, накІ хІалану дурсса куннасса тІутІул чІаврду», «оьталатисса хьункІултІултІул мурччив», «ссуруха лавхъхьусса ненттабакІ», «ссурул-ккуртри куннасса иттацІантту», «къимат лавайсса ттеркьюкбалсса ссурессу», «хІави кунмасса качаруннил чурх» ва цаймигу).

Назмулугу шаэрнал устарну ишла дурну дур машрикь шеьриятрал сурсатругу (душнил «кІукІлу-кІяласса арцул хъазам, сими ва махмургу цийн лаян хІайпсса» ва цаймигу эпитетру ва лашанбавуртту, рефренналул зумувну къуртал хъанахьисса строфарду). Шиккува чІалай бур шаэрнайн супий шеьриятрал биян бувсса биялагу – душнил ккуккурдайн «цил (арцул хъазамрал – А.ХІ.) мархрай ххярхсса тІааьнсса ахьулсса», яьни сунурду учаву – ва машрикьрай супий шеьриятраву миналул хьусса машгуресса лашанбавур. Оьрмулул ца яла яргмур мурадну эшкьи-ччаву ккаклакисса шеьриятрал, гедоническая поэзиялул аьламатри назмулул жям дуллалисса ххаругу (*«аман, ца лахІукъай ва ттул чулийнмай, хІасрат хъама ритай хІаз ласуннача»*).

ДУШНИХА


**Душ, вил бакІрайсса кІиз, сими кунмасса,
Ххяллул журужанттул щинан лавхъхьуну,
Гъайбатсса, утгасса мий вил хъачІунттайх
КІай щинан лавхъхьуну экъинай бури.
Душ, вил нур рирт симан, бургъил куннасса,
Ттурлу дакъа ссавний цІу чанна лавхъсса,
Пар-пар тІий цІу лархъсса тІинтган лавхъхьуну
Ялугълан къабюхълай, нач хьунну бура.
Душ, вил бакІрав яру, цІуртган лавхъхьусса,
ЛухІи-цІансса хъхьуну цІай-цІай тІутІисса,
Пар-пар тІий, буруглай, ччаву дагьанну,
Урувгнал хьурдай тІий мяш хьунну бура.
Душ вил тІутІул чІаврду ятІул-кІяласса,**

Оьтту, накI хIалану дурсса куннасса,
ХьункIултIултIул мурччив оьталатисса –
Ххал хьуманал тамахI багьанну бура.
Душ вил ненттабакIмур, ссуруха лавхьхьу,
ИтгацIантту ссурул-ккуртри куннасса,
Ссуресеу ттеркьюкьялсса кьимат лавайсса.
Цал ккавкнан ка рутан хьул чинну бура.
Душ вил арцул хьазам кIукIлу-кIяласса,
Сими ва махмургу цийн лаян хIайпсса,
ТIааьнсса ахьулсса цил мархрай ххярхсса,
Я шума хIал лавсун агьанну бура.
Душ, качаруннил чурх хIави кунмасса,
ХIахI щувкун, сукку тIий, лахIлай кунмасса,
Аман, ца лахIукьай ва ттул чулийнмай,
ХIасрат хьама ритай хIаз ласуннача.


* * *

Лакрал литературалул классик АбдурахIман Оьмаршаевлул творчестволул хIакьиравусса хьун бакъасса ихтилат кьуртал буллай, учин ччай бур: вай жува ххал бивгьусса так цаппара назмурдалгума аьямну ккаккан буллалиссар шаэрнан, халкьуннал шеьрилугьрая ва миллатрал фольклордануя дакъассагу, дунияллул поэзиялул ттиркьюкьяягу куртIсса кIулшиву диркIшиву ва гайннул сурсатру цалла поэзиялуву усттарну ишла дуллай ивкIшиву. Миллатрал поэзиялул ххазиналуву ванал асардал лайкьсса кIану бувгьуну буссар. Машгьурсса шаэрнал ва патриотнал бусравсса цIа лакрал литература ва литературалул тарих ххираминнал дакIурдиву мудан личIантIиссар.





Индекс годовой 63334
Индекс полугодовой 73894



ш. Ккурккул

НОВОЛУНИЕ
На лакском языке